

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

कृष्ण यजुर्वेदीय तैत्तिरीय संहिता

तृतीयं काण्डं

Note: Please refer to the book, TS Kandam 1 for notes and conventions used in this Compilation.

Version Notes:

This is now the current Version 1.0 dated May 31,2020

1. This replaces the earlier version 0.1 dated July 31,2019
2. This version has been updated with the errors found and reported till May 15,2020
3. Required convention, style and presentation improvements or standardisations has been done wherever applicable

Table of Contents

3 कृष्ण यजुर्वेदीय तैत्तिरीय संहितायं तृतीयं काण्डं	4
3.1 तृतीयकाण्डे प्रथमः प्रश्नः – न्यूनकर्माभिधानं	4
3.1.1 Appendix	27
3.2 तृतीयकाण्डे द्वितीयः प्रश्नः – पवमानग्राहादीनां व्याख्यानं	29
3.3 तृतीयकाण्डे तृतीयः प्रश्नः – वैकृतविधीनामभिधानं	53
3.3.1 Appendix	73
3.4 तृतीयकाण्डे चतुर्थः प्रश्नः – इष्टिहोमाभिधानं	74
3.5 तृतीयकाण्डे पञ्चमः प्रश्नः – इष्टिशेषाभिधानं	98

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3 कृष्ण यजुर्वेदीय तैत्तिरीय संहितायां तृतीयं काण्डं

3.1 तृतीयकाण्डे प्रथमः प्रश्नः – न्यूनकर्माभिधानं

TS 3.1.1.1

प्र॒जाप॑तिर॒काम॑यत प्र॒जाः सृ॑जे॒येति॑ स तपो॑ऽतप्यत स सर्पा॑नसृजत
सोऽकाम॑यत प्र॒जाः सृ॑जे॒येति॑ स॒द्वितीय॑मतप्यत स वया॑ऽस्य सृजत
सोऽकाम॑यत प्र॒जाः सृ॑जे॒येति॑ स तृतीय॑मतप्यत स ए॒तं दी॑क्षितवा॒द-
मप॑श्यत् तमव॑दत् ततो॑ वै स प्र॒जा असृ॑जत यत् तप॑स्तप्त्वा
दी॑क्षितवा॒दँव॑दति प्र॒जा ए॒व तद्य॑जमानः – [] 1

TS 3.1.1.2

सृ॒जते॑ यद्वै दी॑क्षितोऽमे॒द्ध्यं प॑श्यत्यपा॒स्मादी॑क्षाक्रामति नील॑मस्य
हरो॑ व्येत्यब॒द्धं मनो॑ दरि॒द्रं चक्षुः॑ सूर्यो॑ ज्योतिषा॒ऽश्रेष्ठो॑ दीक्षे॒ मा
माहा॑सीरित्याह नास्मादी॒क्षाऽप॑क्रामति नास्य नीलं न हरो॑ व्येति॒ यद्वै
दी॑क्षितम॒भिवर्ष॑ति दि॒व्या आपो॑ऽशान्ता ओजो॑ बलं दीक्षां – [] 2

TS 3.1.1.3

तपोऽस्य॑नि॒र्घन्त्यु॑न्दतीर् बलं॑ धत्तौ॑जो धत्त॑ बलं॑ धत्त॑ मा मे॑ दीक्षां
 मा तपो॑निर्व॒धिष्टे॑त्याहै तदे॒व सर्व॑मा॒त्मन् धत्ते॑ नास्यौ॑जो बलं॑ न दीक्षां
 न तपो॑नि॒र्घन्त्यग्नि॑र्वै दी॒क्षित॑स्य दे॒वता॑ सोऽस्मा॑दे॒तर्हि॑तिर॒ इव॑
 यर्हि॒ याति॑ तमी॑श्वर॒ञ् रक्षा॑ञ्सि हन्तौ॑ -[] 3

TS 3.1.1.4

र्भद्रा॑दभि॒श्रेयः॑ प्रेहि॒बृह॑स्पतिः॒ पुर ए॒ता ते अ॒स्त्वित्या॑हब्र॒ह्म वै दे॒वानां॑
 बृह॑स्पतिस्तमे॒वान्वा र॑भते स ए॒नञ् सं पा॑रयत्ये दम॒गन्म दे॒वय॑जनं
 पृथि॒व्या इत्या॑ह दे॒वय॑जनञ् ह्येष॑ पृथि॒व्या आ॒गच्छ॑ति यो यज॑ते वि॒श्वे
 दे॒वा यद॑जुषन्त॒ पूर्वं इत्या॑ह वि॒श्वे ह्येत॑दे॒वा जोष॑यन्ते यद्ब्रा॒ह्मणा ()
 ऋ॒क्सामा॑भ्यां य॒जुषा स॑न्तरन्त॒ इत्या॑ह॒ र्सामा॑भ्याञ् ह्येष॑ यजुषा
 स॑न्तरति यो यज॑ते रा॒यस्पोषे॑ण स॒मिषा॑-मदे॒मेत्या॑-हाऽशि॒षमे॑वै
 तामा॑ शास्ते ॥ 4

(यज॑मानो - दीक्षा॑ञ् - हन्तौ॑ - ब्रा॒ह्मणा -श्चतुर्वि॑ञ्शतिश्च) (A1)

TS 3.1.2.1

ए॒ष ते॑ गा॒य॒त्रो भा॒ग इति॑ मे॒ सोमा॑य ब्रू॒ता॒देष॑ ते॒ त्रैष्टु॑भो जा॒गतो॑ भा॒ग
इति॑ मे॒ सोमा॑य ब्रू॒ता॒च्छन्द्ो॒माना॑ꣳ सा॒म्राज्यं॑ ग॒च्छेति॑ मे॒ सोमा॑य
ब्रू॒ताद् यो॑ वै सोम॑ꣳ रा॒जा॒नꣳ सा॒म्राज्यं॑ लो॒कं ग॑मयित्वा क्री॒णाति॑
ग॒च्छति॑ स्वा॒नाꣳ सा॒म्राज्यं॑ छन्दा॑ꣳसि॒ खलु॑ वै सोम॑स्य रा॒ज्ञः
सा॒म्राज्यो॑ लो॒कः पु॒रस्ता॑त् सोम॑स्य क॒यादे॒वम॒भि म॑न्त्रयेत्
सा॒म्राज्यमे॒वै - [] 5

TS 3.1.2.2

नं लो॒कं ग॑मयित्वा क्री॒णाति॑ ग॒च्छति॑ स्वा॒नाꣳ सा॒म्राज्यं॑ यो॒ वै
ता॒नू॒न॒प्त्रस्य॑ प्र॒तिष्ठां॑ वे॒द प्र॒त्येव॑ तिष्ठति ब्र॒ह्मवा॒दिनो॑ वदन्ति न
प्रा॒श्नन्ति॑ न जु॒ह्वत्य॑थ क्व ता॒नू॒न॒प्त्रं प्र॒ति तिष्ठ॑तीति प्र॒जाप॑तौ
मन॑सीति ब्रू॒यात् त्रि॒रव॑ जिघ्रेत् प्र॒जाप॑तौ त्वा मन॑सि जुहोमीत्येषा वै
ता॒नू॒न॒प्त्रस्य॑ प्र॒तिष्ठा॑ य ए॒वं वे॒द प्र॒त्येव॑ तिष्ठति यो - [] 6

TS 3.1.2.3

वा अ॒ध्व॒र्योः प्र॒तिष्ठां॑ वे॒द प्र॒त्येव॑ तिष्ठति यतो म॒न्येता॑नभिक्रम्य
हो॒ष्यामी॑ति तत् तिष्ठ॒न्ना श्रा॑वयेदेषा वा अ॒ध्व॒र्योः प्र॒तिष्ठा॑ य ए॒वं

ॐ वे॒द प्र॒त्ये॒व ति॒ष्ठति॒ यद॒भिक्र॑म्य जुहु॒यात् प्र॒तिष्ठा॑या इ॒यात् तस्मा॑त्
समा॒नत्र ति॒ष्ठता हो॒तव्यं॑ प्र॒तिष्ठि॑त्यै यो वा अ॒ध्व॒र्योः स्वं वे॒द
स्ववा॒ने॒व भव॑ति सु॒गवा॑ अस्य स्वं वा॒यव्य॑मस्य - [] 7

TS 3.1.2.4

स्वं च॒मसो॑ऽस्य स्वं य॒द्वा॒यव्यं॑ वा च॒मसं॑ वाऽन॒न्वार॑भ्याऽऽश्रा॒वये॑त्
स्वादि॒यात् तस्मा॑ दन्वा॒रभ्या॑ ऽऽश्रा॒व्यञ् स्वा॒दे॒व नैति॑ यो वै सोम॒म-
प्र॒तिष्ठा॑प्य स्तो॒त्र-मु॒पाक॑रोत्य प्र॒तिष्ठि॑तः सोमो भव॒त्यप्र॑तिष्ठि॒तः
स्तोमो॑- ऽप्र॒तिष्ठि॑ता-न्यु॒क्थान्य॑प्र॒तिष्ठि॑तो यज॒मानो॑ ऽप्र॒तिष्ठि॑तो ऽध्व॒र्युर्वा
यव्यं॑ वै सोम॒स्य प्र॒तिष्ठा॑ च॒मसो॑ऽस्य प्र॒तिष्ठा॑ सोमः स्तोम॒स्य स्तोम॑
उ॒क्थानां॑ ग्र॒हं वा॑ () गृही॒त्वा च॒मसं॑ वो॒न्नीय॑ स्तो॒त्रमु॒पा कुर्या॑त्
प्र॒त्ये॒व सोम॑ञ् स्था॒पय॑ति प्र॒तिस्तो॑मं प्रत्यु॒क्थानि॑ प्रति
यज॒मान॑स्तिष्ठति प्रत्य॒ध्व॒र्युः ॥ 8

(ए॒व - ति॒ष्ठति॑ यो - वा॒यव्य॑मस्य - ग्र॒हं वै - का॒त्र
- वि॒श्व॑तिश्च) (A2)

TS 3.1.3.1

य॒ज्ञं वा॑ ए॒तत् सं भ॑रन्ति य॒त् सो॑म॒क्रय॑ण्यै प॒दं य॑ज्ञ॒मुख॑
ह॒वि॒र्धा॒ने य॑र्हि ह॒वि॒र्धा॒ने प्रा॑ची॒ प्रव॑र्तये॒युस्तर॑हि ते॒नाक्ष॑मुपा॒-
ञ्ज्याद्-य॑ज्ञ॒मुख॑ ए॒व य॑ज्ञ॒मनु॑ स॒न्तनो॑ति प्राञ्च॒मग्निं॑ प्र ह॒रन्त्यु॑त्
प॒त्नी॒मा न॑य॒न्त्यन्व॑ना॒सि प्र॑ वर्तय॒न्त्यथ॑ वा अ॒स्यैष॑ धि॒ष्णि॒यो ही॑यते
सोऽनु॑ ध्यायति स ई॒श्वरो॑ रु॒द्रो भू॒त्वा - [] 9

TS 3.1.3.2

प्र॒जां प॒शून् य॑ज॒मान॑स्य श॒मयि॑तो॒र्यर्हि॑ प॒शुमा॑ प्री॒तमु॑दञ्चं न॑यन्ति
तर्हि॑ तस्य प॒शुश्र॑पणं ह॒रेत् ते॒नैवैनं॑ भा॒गिनं॑ करोति य॒जमा॑नो वा
आ॒हव॑नी॒यो य॑ज॒मानं॑ वा ए॒तद्वि॑ क॒र्षन्ते॑ यदा॒हव॑नीयात् प॒शुश्र॑पणं
ह॒रन्ति॑ स वै॒व स्या॑न्नि॒र्मन्थ्यं॑ वा कुर्याद्-य॑ज॒मान॑स्य सा॒त्मत्वा॑य यदि
प॒शो॒रव॑दानं न॒श्येदा॑ज्यस्य प्र॒त्या॒ख्याय॑मव द्वे॒थ सै॒व ततः॑ ()
प्रायश्चि॒त्तिर्ये॑ प॒शुं वि॑म॒थ्नी॒रन् य॑स्तान् का॒मये॑ता ऽऽ*॒र्तिमा॑र्च्छे॒युरिति॑
कु॒वि॒दङ्गे॒ति न॑मो वृ॒क्तिव॑त्य॒र्चाऽऽग्नी॑द्ध्ये जुहु॒यान्न॑मो वृ॒क्तिमे॒वैषां॑ वृ॒द्धे
ता॒जगा॑र्ति॒मा॒र्च्छन्ति॑ ॥ 10 (भू॒त्वा - ततः॑ - षड्विंश॑तिश्च) (A3)

TS 3.1.4.1

प्र॒जाप॑ते॒र्जाय॑मानाः प्र॒जा जा॒ताश्च॒ या इ॒माः ।
तस्मै॒ प्र॒ति प्र॒ वे॒दय॑चि॒कित्वा॑ अनु॒ मन्य॑तां ॥
इ॒मं प॒शुं प॒शुप॑ते ते अ॒द्य ब॒द्ध्ना॑म्यग्ने सु॒कृत॑स्य म॒द्ध्ये ॥
अनु॒ मन्य॑स्व सु॒यजा॑ य॒जाम जु॑ष्टं दे॒वाना॑मि॒दम॑स्तु ह॒व्यं ॥
प्र॒जान॑न्तः प्र॒तिगृ॑ह्णन्ति पूर्वे प्रा॒णम॑ङ्गेभ्यः पर्या॒चर॑न्तं ।
सु॒वर्गं या॑हि प॒थिभि॑ दे॒वयानै॑-रोष॒धीषु॑ प्र॒तिति॑ष्ठा शरी॒रैः ॥
येषा॑मीशे - [] 11

TS 3.1.4.2

प॒शुप॑तिः प॒शूनां॑ चतु॒ष्पदा॑मु॒त च द्वि॒पदां॑ ।
निष्क्री॑तोऽयं य॒ज्ञियं॑ भा॒गमे॑तु रा॒यस्पो॑षा य॒जमा॑नस्य सन्तु ॥
ये ब॒द्ध्य॑मा॒नम॒नु ब॒द्ध्य॑मा॒ना अ॒भ्यैक्ष॑न्त मन॒सा चक्षु॑षा च ।
अ॒ग्निस्ता॑ अ॒ग्रे प्र॑मु॒मोक्तु॑ दे॒वः प्र॒जाप॑तिः प्र॒जया॑ सँवि॒दानः॑ ॥
य आ॒रण्याः॑ प॒शवो॑ वि॒श्वरू॑पा वि॒रूपाः॑ सन्तो बहु॒धैक॑रूपाः ।

वा॒युस्ता॑ अ॒ग्रे प्र॒मुमो॑क्तु दे॒वः प्र॒जाप॑तिः प्र॒जया॑ सँवि॒दानः॑ ॥

प्र॒मुञ्च॑मा॒ना – [] 12

TS 3.1.4.3

भुव॑नस्य रे॒तो गा॒तुं ध॒त्त य॑ज॒मा॒नाय॑ दे॒वाः ।

उपा॑कृतं श॒शमा॑नं यँद॒स्थाज्जी॑वं दे॒वाना॑म॒प्येतु॑ पाथः ॥

ना॒ना प्रा॑णो यज॒मान॑स्य प॒शुना॑ य॒ज्ञो दे॒वेभिः॑ स॒ह दे॒वया॑नः ।

जी॒वं दे॒वाना॑म॒प्येतु॑ पाथः स॒त्याः स॒न्तु य॑ज॒मान॑स्य का॒माः ॥

यत् प॒शुर्मा॒युम॑कृ॒तोरो॑ वा प॒द्भि॒रा॒हते॑ ।

अ॒ग्नि॒र्मा त॑स्मादे॒नसो॑ वि॒श्वान् मु॑ञ्च॒त्वह॑सः ॥

श॒मि॒तार॑ उ॒पेत॑न य॒ज्ञं – [] 13

TS 3.1.4.4

दे॒वेभि॑रि॒न्वितं॑ ।

पा॒शात् प॒शुं प्र॒मुञ्च॑त ब॒न्धाद्य॑ज्ञ॒पतिं॑ परि ॥

अ॒दि॒तिः पा॒शं प्र॒मुमो॑क्त्वे॒तं नमः॑ प॒शुभ्यः॑ प॒शुप॑तये करोमि ॥

अ॒रा॒ती॒यन्त॑-म॒धरं॑ कृ॒णोमि॑ यं द्वि॒ष्मस्त॑स्मिन् प्र॒ति मु॑ञ्चामि पा॒शं ॥

त्वा॒मु ते द॑धिरे ह॒व्यवा॑हं शृ॒तं क॑र्तारि॒मुत॑ य॒ज्ञियं॑ च ।

अग्ने॑ सद॒क्षः सत॑नुर॒हि भू॒त्वाऽथ॑ ह॒व्या जा॑तवेदो जुषस्व ॥
जा॑तवेदो व॒पया॑ गच्छ दे॒वान्त्व॑ () हि होता॑ प्रथ॒मो ब॒भूथ॑ ।
घृ॒तेन॑ त्वं त॒नुवो॑ व॒र्धय॑स्व स्वाहा॑कृतं ह॒विर॑दन्तु दे॒वाः ॥
स्वाहा॑ दे॒वेभ्यो॑ दे॒वेभ्यः॑ स्वाहा ॥ 14

(ई॒शं - प्र॒मुञ्च॑मा॒ना - य॒ज्ञं - त्व॑ - षोड॑श च) (A4)

TS 3.1.5.1

प्रा॒जाप॑त्या वै प॒शव॑स्तेषां रु॒द्रोऽधि॑पतिर्य-दे॒ताभ्या॑-मुपा॒ करो॑ति
ता॒भ्यामे॒वैनं॑ प्र॒तिप्रो॑च्याऽऽल॒भत॑ आ॒त्मनो॑ऽना॒व्रस्का॑य द्वा॒भ्यामु॑पा॒करो॑ति
द्वि॒पाद्य॑ज॒मानः॑ प्र॒तिष्ठि॑त्या उपा॒कृत्य॑ पञ्च जु॒होति॑ पा॒ङ्गाः प॒शवः॑
प॒शूने॒वा व॑रु॒न्धेमृ॑त्यवे वा ए॒ष नी॑यते यत् प॒शुस्तं॑ यद॒न्वार॑भेत
प्र॒मायु॑को यज॒मानः॑ स्या॒न्नाना॑ प्रा॒णो यज॑मानस्य प॒शुने॒त्याह॑
व्यावृ॑त्यै - [] 15

TS 3.1.5.2

यत् प॒शुर्मा॒युम॑कृ॒तेति॑ जु॒होति॑ शान्त्यै श॒मितार॑ उपे॒तने॒त्याह॑
यथा॒यजु॑रे॒वैत॑द्व॒पायां॑ वा आ॒ह्रिय॑माणाया-म॒ग्नेर्मे॑धोऽप॒ क्राम॑ति त्वा॒मु

ते दधिरे हव्यवाहमिति वपामभि जुहोत्यग्नेरेव मेधमव रुन्धेऽथो
 शृतत्वाय पुरस्ताथ् स्वाहा कृतयो वा अन्ये देवा उपरिष्ठाथ्
 स्वाहाकृतयोऽन्ये स्वाहा देवेभ्यो देवेभ्यः स्वाहेत्यभितो वपां ()
 जुहोति तानेवोभयान् प्रीणाति ॥ 16

(व्यावृत्त्या - अभितो वपां - पञ्च च) (A5)

TS 3.1.6.1

यो वा अयथादेवतं यज्ञमुपचरत्या देवताभ्यो वृश्च्यते पापीयान् भवति
 यो यथादेवतन्न देवताभ्य आ वृश्च्यते वसीयान् भवत्याग्नेय्यर्चा
 ऽऽग्नीद्ध्रमभि मृशेद् वैष्णव्या हविर्धानमाग्नेय्या सुचो वायव्यया
 वायव्यान्यैन्द्रिया सदो यथादेवतमेव यज्ञमुप चरति न देवताभ्य आ
 वृश्च्यते वसीयान् भवति युनज्मि ते पृथिवीं ज्योतिषा सह युनज्मि
 वायुमन्तरिक्षेण - [] 17

TS 3.1.6.2

ते सह युनज्मि वाचं सह सूर्येण ते युनज्मि तिस्रो विपृचः
 सूर्यस्य ते ।

अ॒ग्नि॒र्दे॒वता॑ गा॒यत्री॑ छन्द॑ उपा॒ञ्शोः॑ पा॒त्रम॑सि॒ सोमो॑ दे॒वता॑ त्रि॒ष्टुप्
छन्दो॑ऽन्तर्या॒मस्य॑ पा॒त्रम॑सीन्द्रो दे॒वता॑ जगती॑ छन्द॑ इन्द्र॒वायु॑वोः
पा॒त्रम॑सि बृह॒स्पति॑ दे॒वता॑ऽनु॒ष्टुप् छन्दो॑ मि॒त्रावरु॑णयोः पा॒त्रम॑स्यश्चि॒नौ
दे॒वता॑ पङ्क्तिश्छन्दो॑ऽश्चि॒नोः॑ पा॒त्रम॑सि॒ सूर्यो॑ दे॒वता॑ बृहती॑ – [] 18

TS 3.1.6.3

छन्दः॑ शु॒क्रस्य॑ पा॒त्रम॑सि चन्द्र॒मा दे॒वता॑ स॒तो बृहती॑ छन्दो॑ म॒न्थिनः॑
पा॒त्रम॑सि वि॒श्वेदे॒वा दे॒वतो॑ष्णिहा छन्द॑ आग्रयणस्य पा॒त्रम॑सीन्द्रो दे॒वता॑
क॒कुच्छ॑न्द उ॒क्थानां॑ पा॒त्रम॑सि पृथि॒वी दे॒वता॑ वि॒राट् छन्दो॑
ध्रु॒वस्य॑ पा॒त्रम॑सि ॥ 19

(अ॒न्तरि॑क्षेण – बृहती – त्रय॑स्त्रि॒ञ्शच्च॑) (A6)

TS 3.1.7.1

इष्ट॒र्गो वा अ॒ध्वर्यु॑र्यज॒मान॑स्येष्ट॒र्गः खलु॑ वै पूर्॒वोऽर्षुः॑ क्षी॒यत॑
आ॒स॒न्यान्मा॑ मन्त्रात् पाहि॑ कस्याश्चि॒दभि॑शस्त्या इति॑ पु॒रा
प्रा॒तरनु॑वाकाज्जुहुयादात्मन॑ ए॒व तद॑ध्वर्युः पु॒रस्ता॑च्छर्म॑ नह्यतेऽना॒त्यै
सँ॒वेशाय॑ त्वोपवेशाय॑ त्वा गा॒यत्रि॑या स्त्रि॒ष्टुभो॑ जगत्या॑ अ॒भिभू॑त्यै

स्वाहा प्राणापानौ मृत्योर्मा पातं प्राणापानौ मा मा हासिष्टं देवतासु
वा एते प्राणापानयोर् - [] 20

TS 3.1.7.2

व्यायच्छन्ते येषाँ सोमः समृच्छते सँवेशाय त्वोपवेशाय
त्वेत्याह छन्दाँसि वै सँवेश उपवेशश्छन्दोभिरेवास्य छन्दाँसि
वृद्धे प्रेतिवन्त्याज्यानि भवन्त्यभिजित्यै मरुत्वतीः प्रतिपदो
विजित्या उभे बृहद्रथन्तरे भवत इयं वाव रथन्तरमसौ
बृहदाभ्यामेवैनमन्तरेत्यद्य वाव रथन्तरं श्रो बृहदद्याश्वा
देवैनमन्तरेति भूतं - [] 21

TS 3.1.7.3

वाव रथन्तरं भविष्यद्-बृहद् भूताच्चैवैनं भविष्यतश्चान्तरेतिपरिमितं
वाव रथन्तरमपरिमितं बृहत् परिमिताच्चैवैन-मपरिमिताच्चाऽन्तरेति
विश्वामित्रजमदग्नी वसिष्ठेनास्पदर्धेताँस एतज्जमदग्नि विहव्यम
पश्यत् तेन वै स वसिष्ठस्येन्द्रियं वीर्यमवृद्ध यद्विहव्यँ शस्यत
इन्द्रियमेव तद्वीर्यं यजमानो भ्रातृव्यस्य वृद्धे () यस्य भूयाँसो
यज्ञक्रतव इत्याहुः स देवता वृद्ध इति यद्यग्निष्टोमः सोमः परस्ताथ

स्या-दु॒क्थ्यं॑ कु॒र्वीत॑ यद्यु॒क्थ्यः॑ स्यादति॒रात्रं॑ कु॒र्वीत॑ यज्ञ॒क्रतु॑भिरे॒वास्य॑
दे॒वता॑ वृ॒द्धे वसी॑यान् भवति ॥ 22

(प्रा॒णापा॒नयो॑" – भू॒तं – वृ॒द्धे – ऽष्टा॑वि॒ंशति॑श्च) (A7)

TS 3.1.8.1

नि॒ग्राभ्याः॑ स्थ दे॒वश्रु॑त आ॒युर्मे॑ तर्प॒यत॑ प्रा॒णं मे॑ तर्प॒यता॑पा॒नं मे॑ तर्प॒यत॑
व्या॒नं मे॑ तर्प॒यत॑ चक्षु॒र्मे॑ तर्प॒यत॑ श्रो॒त्रं मे॑ तर्प॒यत॑ मनो॑मे॒ तर्प॒यत॑
वाचं॑ मे॒ तर्प॒यता॑ऽऽ*त्मानं॑ मे॒ तर्प॒यता॑ङ्गानि॑ मे॒ तर्प॒यत॑ प्र॒जां मे॑ तर्प॒यत॑
प॒शून् मे॑ तर्प॒यत॑ गृ॒हान् मे॑ तर्प॒यत॑ ग॒णान् मे॑ तर्प॒यत॑ स॒र्वग॑णं मा
तर्प॒यत॑ तर्प॒यत॑ मा – [] 23

TS 3.1.8.2

ग॒णा मे॑ मा वि तृ॒षन्तो॑ष॒धयो॑ वै सोम॑स्य वि॒शो वि॒शः खलु॑ वै
रा॒ज्ञः प्र॑दातोरी॒श्वरा॑ ऐ॒न्द्रः सोमो॑ऽवीवृ॒धं वो॑ मन॒सा सु॑जा॒ता
ऋ॒तप्र॑जा॒ता भग॑ इ॒द्वः स्याम॑ ।

इ॒न्द्रेण॑ दे॒वीर्वी॒रुधः॑ सँवि॒दाना॑ अनु॒ मन्य॑न्ताँ॒ सव॑नाय॒

सोम॑मित्या॒हौष॑धीभ्य॒ ए॒वैन॑ꣳ स्वायै॑ वि॒शः स्वायै॑ दे॒वता॑यै नि॒र्या॒च्याभि॑
षु॒णोति॑ यो वै सोम॑स्याभिषूयमाणस्य - [] 24

TS 3.1.8.3

प्रथ॑मोऽꣳशुः॑ स्क्व॑न्दति॒ स ई॑श्वर॒ इन्द्रि॑यं वी॒र्यं॑ प्र॒जां प॒शून्
यज॑मानस्य नि॒र्ह॑न्तोस्तम॒भि म॑न्त्रये॒ताऽऽ मा॑ऽस्क्वा॒न्त्सह॑ प्र॒जया॑ सह
रा॒यस्पोषे॑णेन्द्रि॒यं मे॑ वी॒र्यं॑ मा नि॒र्वधी॑रित्याशिषमेवैता॒मा शा॑स्त
इन्द्रि॑यस्य॒ वी॒र्यस्य॑ प्र॒जायै॑ प॒शूना॑मनिर्घा॒ताय॑ द्र॒प्सश्च॑स्कन्द
पृथि॑वीमनु॒ द्यामि॑मञ्च॒ योनि॑मनु॒ यश्च॑ () पूर्॒वः ।
तृती॑यं यो॒निमनु॑ सञ्च॒रन्तं॑ द्र॒प्सं जु॑हो॒म्यनु॑ स॒प्त हो॒त्राः ॥ 25

(तर्प॑यत मा - ऽभिषू॑यमाणस्य - यश्च॑ - दश॑ च) (A8)

TS 3.1.9.1

यो वै दे॒वान् दे॑वयश॒सेना॑र्पयति॒ मनु॑ष्यान् मनु॒ष्यय॑श॒सेन॑ दे॒वय॑श॒स्यैव॑
दे॒वेषु॑ भवति॒ मनु॑ष्ययश॒सी म॑नु॒ष्येषु॑ या॒न् प्रा॒चीन॑-मा॒ग्रय॑णाद्
ग्र॒हान् गृ॑ह्णीयात् ता॒नुपा॑ꣳशु गृ॒ह्णीया॑द्यानू॒र्ध्वाꣳस्ता॑नुप॒ब्दिम॑तो
दे॒वाने॑व तद्दे॒वय॑श॒सेना॑र्पयति॒ मनु॑ष्यान् मनु॒ष्यय॑श॒सेन॑ दे॒वय॑श॒स्यैव॑

दे॒वेषु॑ भ॒वति॑ म॒नुष्य॑य॒शसी॑ म॒नुष्ये॑ष्व॒ग्निः प्रा॑तस्स॒वने॑ पा॒त्वस्मा॑न्
वै॒श्वान॑रो म॒हिना॑ वि॒श्वश॑म्भूः । स नः॑ पा॒वको॑ द्र॒विणं॑ दधा॒त्वा- [] 26

TS 3.1.9.2

युष्म॑न्तः स॒हभ॑क्षाः स्याम ॥

वि॒श्वे दे॒वा म॒रुत॑ इन्द्रो॑ अ॒स्मान॑स्मिन् द्वि॒तीये॑ स॒वने॑ न ज॒ह्युः ।

आयु॑ष्मन्तः प्रि॒यमै॑षां व॒दन्तो॑ व॒यं दे॒वाना॑ सु॒मतौ॑ स्याम ॥

इ॒दं तृ॒तीयं॑ स॒वनं॑ क॒वीना॑मृ॒तेन॑ ये च॒मस॑मैर॒यन्त॑ ।

ते सौ॑ध॒न्वनाः॑ सु॒व॒रान॑शा॒नाः स्वि॑ष्टिं नो अ॒भि व॑सी॒यो न॑यन्तु ॥

आ॒य॒त॒न॒वती॑र्वा अ॒न्या आ॑हु॒तयो॑ हू॒यन्ते॑ऽना॒य॒त॒ना अ॒न्या या॑

आ॒घा॒र॒वती॑स्ता आ॒य॒त॒न॒वती॑र्याः - [] 27

TS 3.1.9.3

सौ॒म्यास्ता॑ अ॒नाय॑त॒ना ऐ॒न्द्रवा॑यव-मा॒दाया॑ऽऽ*घा॒रमा॑ घा॒रये॑द॒ध्वरो॑

य॒ज्ञोऽय॑मस्तु दे॒वा ओष॑धी॒भ्यः प॒शवे॑ नो ज॒नाय॑ वि॒श्वस्मै॑

भू॒ताया॑ऽध्व॒रोऽसि॑ स पि॒न्वस्व॑ घृ॒तव॑द्दे॒व सो॒मेति॑ सौ॒म्या ए॒व

तदा॑हु॒तीरा॑य॒त॒न॒वतीः॑ करो॒त्याय॑त॒नवान्॑ भ॒वति॑ य ए॒वं वै॒दाथो॑

द्या॒वापृ॒थि॒वी ए॒व घृ॒तेन॒ व्यु॒नत्ति॒ ते व्यु॒त्ते उप॒जीव॒नीये॒ भव॒त
उप॒जीव॒नीयो॒ भव॒ति - [] 28

TS 3.1.9.4

य ए॒वं वै॒दैष॒ ते रु॒द्रभा॒गो यं नि॒रया॑च॒थास्तं॑ जु॒षस्व॑ वि॒देर्गो॑प॒त्यञ्
रा॒यस्पोष॑ञ् सु॒वीर्य॑ञ् सँव॒त्सरी॑णाञ् स्व॒स्तिं ॥
मनुः॑ पु॒त्रेभ्यो॑ दा॒यं व्य॑भ॒जथ् स ना॒भाने॑दि॒ष्टं ब्र॑ह्म॒चर्यं॑ व॒सन्तं॑
नि॒रभ॒जथ् स आ॒गच्छ॑थ् सोऽब्र॑वीत् क॒था मा नि॒रभा॑गि॒ति न त्वा
नि॒रभा॑क्ष॒मित्य॑-ब्र॒वीद॑ङ्गि॒रस॒ इमे स॒त्रमा॑स॒ते ते - [] 29

TS 3.1.9.5

सु॒वर्गं लो॒कं न प्र॒जान॑न्ति॒ तेभ्य॑ इ॒दं ब्रा॑ह्म॒णं ब्रू॑हि ते सु॒वर्गं
लो॒कं य॑न्तो॒ य ए॒षां प॒शव॑स्ताञ्स्ते दा॒स्यन्ती॑ति॒ तदे॑भ्योऽब्र॑वीत्
ते सु॒वर्गं लो॒कं य॑न्तो॒ य ए॒षां प॒शव॑ आ॒सन् ता॑न॒स्मा अ॒ददु॑स्तं
प॒शुभि॑श्चर॒न्तं य॑ज्ञ॒वास्तौ॑ रु॒द्र आ॒गच्छ॑थ् सोऽब्र॑वीन्मम
वा इ॒मे प॒शव॑ इ॒त्यदु॑र्वै - [] 30

TS 3.1.9.6

म॒ह्यमि॒मानि॒त्यब्र॒वीन्न॒ वै तस्य॒ त ई॒शत॒ इत्य॑ब्र॒वीद्-यद्-य॒ज्ञवा॒स्तौ
 ही॒यते॒ मम॒ वै तदि॒ति तस्मा॑द्-य॒ज्ञवा॒स्तु नाभ्य॑वेत्य॒ꣳ सौऽब्र॑वीद्-
 य॒ज्ञे मा ऽऽभ॑जाथ॒ ते प॒शून् नाभि॑ मꣳस्य॒ इति॒ तस्मा॑ ए॒तं म॒न्थिनः॑
 सꣳ स्रा॒वम॑जुहोत् ततो॒ वै तस्य॑ रु॒द्रः प॒शून् नाभ्य॑मन्यत॒ यत्रै॑त ()
 मे॒वं वि॒द्वान् म॒न्थिनः॑ सꣳ स्रा॒वं जु॒होति॒ न तत्र॑ रु॒द्रः
 प॒शून्नाभि॑ मन्यते ॥ 31

(द॒धात्वा - यत॑नवतीर्या - उ॒पजी॒वनी॒र्यो भव॑ति - तेऽ - दु॒र्वै -
 यत्रै॑त - मे॒काद॑श च) (A9)

TS 3.1.10.1

जु॒ष्टो वा॒चो भू॒यासं॑ जु॒ष्टो वा॒चस्प॑तये॒ देवि॑ वाक् ।
 यद्वा॒चो म॒धुम॑त् तस्मिन् मा॒ धाः स्वा॒हा सर॑स्वत्यै ॥
 ऋ॒चा स्तोम॑ꣳ स॒मर्ध॑य गाय॒त्रेण॑ रथं॒तरं ।
 बृ॒हद्-गा॑य॒त्रव॑र्तनि ॥
 यस्ते॑ द्र॒प्सः स्क्व॑न्दति॒ यस्ते॑ अꣳशु॒र्बाहु॑च्युतो॒ धिष॑ण॒योरु॒पस्था॑त् ।

अ॒ध्व॒र्यो॒र्वा परि॒ यस्ते॑ प॒वि॒त्रा॒थ् स्वा॒हाकृ॑तमिन्द्रा॒य तं जु॑होमि ॥

यो द्र॒प्सो अ॒शुः प॑तितः पृ॒थि॒व्यां परि॑वापात् – [] 32

TS 3.1.10.2

पु॒रो॒डा॒शात् कर॑म्भात् ।

धा॒ना॒सो॒मा॒न्म॒न्थि॒न इन्द्र॑ शु॒क्रा॒थ् स्वा॒हाकृ॑तमिन्द्रा॒य तं जु॑होमि ॥

यस्ते॑ द्र॒प्सो म॑धुमा॒ इन्द्रि॒यावा॑न्थ् स्वा॒हाकृ॑तः पु॒नर॒प्येति॑ दे॒वान् ।

दि॒वः पृ॒थि॒व्याः पर्य॑न्तरि॒क्षा॒थ् स्वा॒हा कृ॑तमिन्द्रा॒य तं जु॑होमि ॥

अ॒ध्व॒र्यु॒र्वा ऋ॒त्वि॒जां प्र॑थ॒मो यु॑ज्यते ते॒न स्तो॒मो यो॑क्तव्य

इ॒त्याहु॑र्वा॒गि॒ग्रे॒गा अ॒ग्र ए॒त्वृ॒जु॒गा दे॒वेभ्यो॑ य॒शो म॑यि दध॒ती प्रा॒णान्

प॒शुषु॑ प्र॒जां म॑यि – [] 33

TS 3.1.10.3

च य॒ज॒मा॒ने चे॒त्याह॑ वा॒चमे॒व तद्य॑ज्ञ॒मुखे॑ यु॒नक्ति॑ वा॒स्तु वा ए॒तद्य॑ज्ञ॒स्य

क्रि॒यते॒ यद्ग्र॑हा॒न् गृ॒ही॒त्वा ब॑हिष्प॒वमा॑न् सर्प॒न्ति॒परा॑ञ्चो हि य॒न्ति

प॒रा॒ची॒भिः स्तु॑वते वैष्ण॒व्यर्चा॑ पु॒नरे॒त्योप॑ तिष्ठते य॒ज्ञो वै वि॑ष्णु

र्य॒ज्ञमे॒वाक॑र्विष्णो॒ त्वन्नो॑ अ॒न्तमः॑ शर्म॒ यच्छ॑ सह॒न्त्य ।

प्र ते धारा मधुश्चुत उथ्सं दुहते () अक्षितमित्याह यदेवास्य
शयानस्योपशुष्यति तदेवास्यैतेना ऽऽप्याययति ॥ 34

(परिवापात् – प्रजां मयि – दुहते – चतुर्दश च) (A10)

TS 3.1.11.1

अग्निना रयिमश्नवत् पोषमेव दिवेदिवे ।

यशसं वीरवत्तमं ॥

गोमाँ अग्नेऽविमाँ अश्वी यज्ञो नृवत्सखा सदमिदप्रमृष्यः ।

इडावाँ एषो असुर प्रजावान् दीर्घो रयिः पृथुबुध्नः सभावान् ॥

आप्यायस्व>[1], सन्ते>[2] ॥

इह त्वष्टारमग्रियं विश्वरूपमुप ह्वये ।

अस्माकमस्तु केवलः ॥

तन्नस्तुरीपमध पोषयितु देव त्वष्टर्वि रराणः स्यस्व ।

यतो वीरः – [] 35

TS 3.1.11.2

कर्म॑ण्यः सु॒दक्षो॑ यु॒क्तग्रा॑वा जा॒यते॑ दे॒वका॑मः ॥

शि॒वस्त्वष्ट॑रिहाऽऽ* ग॒हि वि॒भुः पोष॑ उ॒त॒त्मना॑ ॥

य॒ज्ञेय॑ज्ञे न उ॒दव॑ ॥

पि॒शङ्ग॑रूपः सु॒भरो॑ वयो॒धाः श्रु॒ष्टी वी॒रो जा॒यते॑ दे॒वका॑मः ।

प्र॒जां त्वष्टा॑ वि॒ष्यतु॑ नाभि॒मस्मे॑ अथा॒ दे॒वाना॑मप्येतु॒ पाथः॑ ॥

प्र॒णोदे॑ > [3] व्या, नो दि॒वः > [4] ॥

पी॒पिवा॑ꣳ सꣳ सर॑स्वतः स्तनं॒ यो वि॒श्वदर्श॑तः ।

धु॒क्षीम॑हि प्र॒जामि॑षं ॥ 36

TS 3.1.11.3

ये ते॑ सर॒स्व ऊ॒र्मयो॑ मधु॒मन्तो॑ घृ॒तश्चु॑तः ।

तेषां॑ ते सु॒म्नमी॑महे ॥

यस्य॑ व्र॒तं प॒शवो॑ यन्ति॒ सर्वे॑ यस्य॑ व्र॒तमु॑पतिष्ठन्त॒ आपः॑ ।

यस्य॑ व्र॒ते पु॒ष्टिप॑तिर्नि॒विष्ट॑स्तꣳ सर॑स्वन्त॒मव॑से हुवेम ॥

दि॒व्यꣳ सु॒पर्णं॑ व॒यसं॑ बृ॒हन्त॑म॒पां गर्भं॑ वृष॒भमो॑षधीनां ।

अ॒भी॒पतो॑ वृ॒ष्ट्या॑ त॒र्पय॑न्तं त॒ꣳ सर॑स्वन्तमवसे हुवेम ॥

सिनी॑वालि॒ पृथु॑ष्टुके॒ या दे॒वाना॑मसि॒ स्वसा॑ ॥

जुष॑स्व ह॒व्य - [] 37

TS 3.1.11.4

माहु॑तं प्र॒जां दे॒वि दि॒दिङ्नि॑ नः ॥

या सु॒पाणिः॑ स्व॒ङ्गुरिः॑ सु॒षूमा॑ बहु॒सूवरी॑ ।

तस्यै॑ वि॒श्व॒न्नियै॑ ह॒विः सिनी॑वा॒ल्यै जु॑होतन ॥

इन्द्रं॑ ँ॒वो वि॒श्वत॑स्परी>[5], न्द्रं॑ नरः>[6] ॥

अ॒सि॒तव॑र्णा ह॒रयः॑ सु॒पर्णा॑ मि॒हो व॑साना दि॒वमु॑त् प॒तन्ति॑ ॥

त आ॒ऽव॑वृ॒त्रन्थ् सद॑नानि कृ॒त्वाऽऽदि॑त् पृ॒थि॒वी घृ॑तैर्व्यु॒द्यते॑ ॥

हि॒रण्य॑के॒शो रज॑सो वि॒सारे॑ऽहि॒र्धुनि॑र्वात इ॒व ध्र॑जी॒मान् ।

शु॒चिभ्रा॑जा उ॒षसो॑ - [] 38

TS 3.1.11.5

नवे॑दा यश॒स्वती॑रप॒स्युवो॑ न स॒त्याः ॥

आ ते॑ सु॒पर्णा॑ अ॒मिन॑न्त ए॒वैः कृ॒ष्णो नो॑नाव वृष॒भो यदी॑दं ।

शि॒वाभि॒र्न स्म॑य॒माना॒भिरा॒ङ्गात् प॑तन्ति॒ मि॒हः स्त॒नय॑न्त्य॒भ्रा ॥

वा॒श्रे॒व वि॒द्युन्मि॑माति॒ व॒थ्सं न॒ मा॒ता सि॑षक्ति ।

यदे॑षां वृ॒ष्टि॒रस॑र्जि ॥

पर्व॑तश्चिन्महि॒ वृ॒द्धो बि॑भाय॒ दि॒वश्चि॒थ् सानु॑ रेजत॒ स्व॒ने वः॑ ।

यत् क्री॑डथ मरुत - [] 39

TS 3.1.11.6

ऋ॒ष्टि॒मन्त॒ आप॑ इ॒व स॒दि॒ध्रय॑ञ्चो॒ धव॑द्ध्वे ॥

अ॒भि क्र॑न्द॒ स्त॒नय॑ गर्भ॒मा धा॑ उद॒न्वता॒ परि॑ दी॒या र॑थेन ।

दृ॒तिꣳ सु॑ कर्ष॒ वि॒षितं॑ न्यञ्चꣳ स॒मा भ॑वन्तू॒द्धता॑ नि॒पादाः॑ ॥

त्वं त्या॑ चिद॒च्युता॑ग्ने॒ पशु॑र्न यव॒से ।

धा॒मा ह॒ यत् ते॑ अ॒जर॒ वना॑ वृ॒श्चन्ति॒ शि॒क्वसः॑ ॥

अ॒ग्ने भू॑री॒णि तव॑ जा॒तवे॒दो दे॒व स्व॑धा॒वोऽमृत॑स्य॒ धाम॑ ।

याश्च - [] 40

TS 3.1.11.7

मा॒या मा॒यिनां॑ वि॒श्वमि॑न्व॒ त्वे पू॒र्वीः स॒न्दधुः॑ पृ॒ष्ठब॑न्धो ॥

दि॒वो नो॑ वृ॒ष्टिं म॑रुतो॒ ररी॑द्ध्वं प्र॒पि॒न्वत॑ वृ॒ष्णो अ॑श्व॒स्य धा॑राः ॥

अ॒र्वा॒डे॒तेन॑ स्तनयि॒त्तुने॒ह्यपो॑ नि॒षिञ्च॑न्नसुरः पि॒ता नः॑ ॥
 पि॒न्वन्त्य॑पो मरुतः सु॒दान॑वः पयो॑ घृ॒तव॑द्वि॒दथै॑ष्वा भुवः ।
 अत्यं॑ न मि॒हे वि॑ नयन्ति वा॒जिन॑मु॒त्सं दु॑हन्ति स्तनयन्त॑मक्षितं ॥
 उद॒प्रुतो॑ मरुतस्ता॒ꣳ इ॒यर्त॑ वृष्टिं – [] 41

TS 3.1.11.8

ये॑ वि॒श्वे म॒रुतो॑ जु॒नन्ति॑ ।
 क्रो॒शाति॑ गर्दा क॒न्येव॑ तु॒न्ना पे॑रुं तु॒ज्जाना॑ पत्ये॒व जा॒या ॥
 घृ॒तेन॑ द्यावापृ॒थिवी॑ मधु॒ना स॑मु॒क्षत॑ पयस्वतीः कृ॒णु॒ताऽऽप॑ ओष॒धीः ।
 ऊ॒र्जं च॑ तत्र सु॒मतिं॑ च पि॒न्वथ॑ यत्रा नरो मरुतः सि॒ञ्चथा॑ मधु ॥
 उदु॒त्यं > [7], चि॒त्रं > [8] ॥
 और्व॑-भृ॒गुव॑च्छुचि॒म॒प्न॒वान॒वदा॑ हुवे ।
 अ॒ग्निꣳ स॑मु॒द्रवा॑ससं ॥
 आ स॒वꣳ स॑वि॒तुर्य॑था भग॒स्ये () व॑ भु॒जिꣳ हु॑वे ।
 अ॒ग्निꣳ स॑मु॒द्रवा॑ससं ॥
 हु॒वे वा॑तस्वनं क॒विं प॒र्जन्य॑क्र॒न्धꣳ स॒हः ।

अ॒ग्नि॒ꣳ स॒मु॒द्र॒वा॒स॒सं ॥ 42 (वी॒र - इ॒ष॒ꣳ - ह॒व्य - मु॒ष॒सो -
म॒रु॒त - श्र - वृ॒ष्टिं - भ॒ग॒स्य - द्वा॒द॒श च) (A11)

Prasna Korvai with starting Padams of 1 to 11 Anuvaakams :-

(प्र॒जा॒प॒ति॒र॒का॒म॒य॒तै - ष॒ ते॒ गा॒य॒त्रो - य॒ज्ञं वै - प्र॒जा॒प॒ते॒र्जा॒यि॒मा॒नाः
- प्रा॒जा॒प॒त्या - यो॒ वा अ॒य॒था॒दे॒व॒त - मि॒ष्ट॒र्गो - नि॒ग्रा॒भ्याः स्थ -
यो॒ वै दे॒वा - ज्जु॒ष्टो - ऽग्नि॒ना र॒यि - मे॒का॒द॒श)

Korvai with starting Padams of 1, 11, 21 Series of Panchaatis :-

(प्र॒जा॒प॒ति॒र॒का॒म॒य॒त - प्र॒जा॒प॒ते॒र्जा॒यि॒मा॒ना - व्या॒य॒च्छ॒न्ते - म॒ह्य॒मि॒मा -
न्मा॒या मा॒यि॒नान् - द्वि॒च॒त्वा॒रि॒ꣳश॒त्)

First and Last Padam of First Prasnam of Kandam 3:-

(प्र॒जा॒प॒ति॒र॒का॒म॒य॒ता - ऽग्नि॒ꣳ स॒मु॒द्र॒वा॒स॒सं)

॥ हरिः ओं ॥

॥ कृष्ण यजुर्वेदीय तैत्तिरीय संहितायां तृतीयकाण्डे प्रथमः

प्रश्नः समाप्तः ॥

3.1.1 Appendix

1. 3.1.11.1 – आ॒ प्या॒यस्व॑ > 1

आ॒प्या॒यस्व॑ समेतु॑ ते वि॒श्वतः॑ सोम॒ वृष्णि॑यं ।

भवा॒ वाज॑स्य संग॒थे ॥ (Appearing in TS 4-2-7-4)

2. 3.1.11.1 – सन्ते॑ > 2

सं ते॑ पया॒सि॑ समु॒ यन्तु॑ वाजाः॒ सं वृष्णि॑यान् यभिमाति॒षाहः॑ ।

आ॒प्याय॑मानो अ॒मृता॑य सोम॒ दिवि॑ श्रवा॒स्युत्त॑मानि॒ धिष्व॑ ॥

(Appearing in TS 4-2-7-4)

3 & 4. 3.1.11.2 – प्र॒णो दे॒व्या > 3, नो॑ दि॒वः > 4

प्र॒णो दे॒वी सर॑स्वती॒ वाजे॑भिर्वा॒जिनी॑वती । धी॒नाम॑वि॒त्र्यव॑तु ॥

आ नो॑ दि॒वो बृ॒हतः॑ पर्व॒तादा॑ सर॒स्वती॑ यज॒ता ग॑न्तु य॒ज्ञं ।

हवं॑ दे॒वी जु॒जुषा॑णा घृ॒ताची॑ श॒ग्मां नो॑ वाचमु॒शती॑ शृ॒णोतु॑ ।

(Appearing in TS 1.8.22.1)

5 & 6. 3.1.11.4 – इन्द्रं॑ वो॑ विश्वत॑स्परी>५, न्द्रं॑ नरः>६

इन्द्रं॑ वो॑ विश्वत॑स्परी हवामहे॑ जने॑भ्यः । अस्माक॑मस्तु॑ केवलः॑ ॥

इन्द्रं॑ नरो॑ नेम॑धिता हवन्ते॑ यत्पार्या॑ युनज॑ते धिय॑स्ताः ।

शूरो॑ नृषा॑ता शव॑सश्चकान॑ आ गोम॑ति ब्रजे॑ भजा॑ त्वन्नः॑ ॥

(Appearing in TS 1.6.12.1)

7 & 8. 3.1.11.8 – उदु॑त्यं>७, चि॒त्रं>८ ।

उदु॑ त्यं जा॒तवे॑दसं दे॒वं वह॑न्ति के॒तवः॑ । दृ॒शे वि॒श्वाय॑ सूर्यं॑ ॥

चि॒त्रं दे॒वाना॑मुद॑गादनी॒कं चक्षु॑ मि॒त्रस्य॑ वरु॒णस्या॑ग्नेः ।

आऽप्रा॑ द्यावा॑पृथि॒वी अ॒न्तरि॑क्ष॒ञ्च सूर्य॑ आ॒त्मा जग॑तस्त॒स्थुषश्च॑ ॥

(Appearing in TS 1.4.43.1)

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3.2 तृतीयकाण्डे द्वितीयः प्रश्नः – पवमानग्राहादीनां व्याख्यानं

TS 3.2.1.1

यो वै पवमानानामन्वारो॒हान् वि॒द्वान् यज॑तेऽनु पवमानाना रो॒हति॑
न पवमानेभ्यो-॒ऽव च्छि॑द्यते इ॒येनो॑ऽसि गाय॒त्रछन्दा॑ अनु त्वाऽऽर॒भे
स्व॒स्ति मा सं पा॑रय सु॒पर्णो॑ऽसि त्रि॒ष्टुच्छन्दा॑ अनु त्वाऽऽर॒भे स्व॒स्ति
मा सं पा॑रय स॒घाऽसि॑ जगतीछन्दा॑ अनु त्वाऽऽर॒भे स्व॒स्ति मा
संपा॑रयेत्याहैते- [] 1

TS 3.2.1.2

वै पवमानानामन्वारो॒हास्तान् य एवं वि॒द्वान् यज॑तेऽनु पवमानाना
रो॒हति॑ न पवमानेभ्यो॒ऽव च्छि॑द्यते यो वै पवमानस्य सन्ततिं
वे॒द सर्व॑मायुरेति न पु॒राऽऽयु॑षः प्र मी॒यते प॑शुमान् भवति वि॒न्दते॑
प्र॒जां पव॑मानस्य ग्रहा गृह्यन्तेऽथ वा अ॒स्यैते॑ऽगृहीता द्रोणकलश
आध॒वनी॑यः पू॒तभृ॑त् तान् यदगृहीत्वोपाकुर्यात् पवमानं वि - [] 2

TS 3.2.1.3

च्छि॑न्धा॒त् तं॑ वि॒च्छिद्य॑मानम॒ध्वर्योः॑ प्रा॒णोऽनु॑ वि॒च्छिद्ये॑-
तोप॒याम॑गृहीतोऽसि॒ प्रजा॑प॒तये॑ त्वेति॒ द्रोण॑कल॒शम॑भि मृ॒शेदिन्द्रा॑य
त्वेत्या॑धवनीयं॒ वि॒श्वेभ्य॑स्त्वा दे॒वेभ्य॑ इति॒ पूत॑भृतं॒ पव॑मानमेव तथ्
सं त॑नोति॒ सर्व॑मायुरेति॒ न पु॒राऽऽयु॑षः प्र॒मीय॑ते प॒शुमान्॑ भवति
वि॒न्दते॑ प्र॒जां ॥ 3

(एते॑ - वि - द्विच॑त्वारि॒शच्च॑) (A1)

TS 3.2.2.1

त्रीणि॑ वाव॒ सव॑नान्यथ॒ तृतीय॑ꣳ स॒वनम॑व॒ लुम्प॑न्त्यन॒ꣳशु कु॑र्वन्त
उपा॑ꣳशुꣳहु॒त्वोपा॑ꣳशुपा॒त्रेऽꣳशुम॑वास्य॒ तन्तृ॑तीयस॒वने॑ ऽपि॒सृज्या॑भि
षु॒णुया॑द्यदा॒प्याय॑यति॒ तेना॑ꣳशुम॒द्यद॑भिषु॒णोति॑ तेन॒र्जीषि॑ सर्वा॒ण्येव॑
तथ् स॒वनान्य॑ꣳशुम॒न्ति शु॒क्रव॑न्ति स॒माव॑द्दीर्याणि॒ करो॑ति॒ द्वौ स॒मुद्रौ॑
वि॒तता॑वजू॒र्यो पर्या॑वर्तेते॒ जठ॑रेव॒ पादाः॑ ।
तयोः॑ प॒श्यन्तो॑ अति॒ यन्त्य॑न्यमप॒श्यन्तः॑ - [] 4

TS 3.2.2.2

से॒तुना॑ऽति॒ यन्त्य॑न्यं ॥

द्वे द्र॑ध॒सी स॒तती॑ वस्त॒ एकः॑ के॒शी वि॒श्वा भु॒वनानि॑ वि॒द्वान् ।

ति॒रो॒धा॒यै॒त्य॒सि॒तं व॑सानः शु॒क्रमा॑ द॒त्ते अ॒नुहा॑य जा॒र्यै ॥

दे॒वा वै य॒द्य॒ज्ञेऽकु॑र्वत॒ तद॑सुरा अकुर्वत॒ ते दे॒वा ए॒तं

महा॑य॒ज्ञम॒पश्य॑न् तम॒तन्व॑ताग्नि॒होत्रं॑ व्र॒तम॑कुर्वत॒ तस्मा॑द् द्वि॒व्रतः॑

स्या॑द् द्वि॒ह्यग्नि॑होत्रं जु॒ह्वति॑ पौ॒र्णमा॑सं य॒ज्ञम॑ग्नी॒षोमी॑यं – [] 5

TS 3.2.2.3

प॒शुम॑कुर्वत॒ दार्यं॑ य॒ज्ञमा॑ग्ने॒यं प॒शुम॑कुर्वत॒ वैश्व॑दे॒वं प्रा॑तस्स॒वन –

म॑कुर्वत॒ वरु॑णप्र॒धासान्॑ मा॒द्ध्यंदि॑नं स॒वनं सा॑कमे॒धान् पि॑तृय॒ज्ञं

त्र्य॑म्ब॒का – स्तृ॑तीयस॒वनम॑कुर्वत॒ तमे॑षाम॒सुरा॑ य॒ज्ञ – म॒न्ववा॑जिगां

सं तं॑ नाऽन्व॒वाय॑न् तेऽब्रु॒वन्न॑द्ध्व॒र्तव्या॑ वा इ॒मे दे॒वा अ॑भू॒वन्निति॑

तद॑द्ध्व॒रस्याऽद्ध्व॑रत्वं ततो॑ दे॒वा अ॑भवन्॒ पराऽसुरा॑ य ए॒वं वि॒द्वान्थ्

सोमे॑न॒ यज॑ते॒ भव॑त्यात्म॒ना परा॑ () ऽस्य॒ भ्रातृ॑व्यो भवति ॥ 6

(अ॒पश्य॑न्तोऽ – ग्नी॒षोमी॑य – मा॒त्मना॑ परा – त्रीणि॑ च) (A2)

TS 3.2.3.1

परि॒भूर॒ग्निं परि॒भूरिन्द्रं॑ परि॒भूर्विश्वा॑न् दे॒वान् परि॒भूर्मा॑ꣳ सह
 ब्र॒ह्मव॑र्च॒सेन॒ स नः॑ पव॒स्व शं ग॒वे शं ज॒नाय॑ शम॒र्वते॒ शꣳ
 राज॒न्नोष॑धी॒भ्यो ऽच्छि॑न्नस्य ते रयिपते सु॒वीर्य॑स्य रा॒यस्पोष॑स्य
 ददि॒तारः॑ स्याम ।

तस्य॑ मे रा॒स्व तस्य॑ ते भक्षी॒य तस्य॑ त इ॒दमु॑न्मृजे ॥

प्रा॒णाय॑ मे वर्चो॒दा वर्च॑से पव॒स्वा पा॒नाय॑ व्या॒नाय॑ वा॒चे – [] 7

TS 3.2.3.2

दक्ष॑क्रतु॒भ्यां चक्षु॑र्भ्यां मे वर्चो॒दौ वर्च॑से पवे॒थाꣳ श्रो॑त्रा॒या ऽऽ*त्म॑ने
 ऽङ्गे॑भ्य॒ आयु॑षे वी॒र्या॑य वि॒ष्णोरिन्द्र॑स्य वि॒श्वेषां॑ दे॒वानां॑ ज॒ठर॑मसि
 वर्चो॒दा मे वर्च॑से पव॒स्व कोऽसि॑ को ना॒म क॑स्मै त्वा का॒य त्वा
 यं त्वा सोमे॑नातीतृपं यं त्वा सोमे॑नामीमदꣳ सु॒प्रजाः॑ प्र॒जया॑
 भूया॑सꣳ सु॒वीरो॑ वी॒रैः सु॒वर्चा॑ वर्च॒सा सु॒पोषः॑ पोषै॒र्विश्वे॑भ्यो
 मे रू॒पेभ्यो॑ वर्चो॒दा – [] 8

TS 3.2.3.3

वर्च॑से पव॒स्व तस्य॑ मे रा॒स्व तस्य॑ ते भक्षी॒य तस्य॑ त इ॒दमु॒न्मृ॑जे ॥
 बु॒भूष॑न्नवे॒क्षेतै॑ष वै पा॒त्रियः॑ प्र॒जाप॑तिर्य॒ज्ञः प्र॒जाप॑तिस्तमे॒व तर्प॑यति
 स ए॒नं तृ॒प्तो भू॒त्याऽभि॑ पव॒ते ब्र॒ह्मव॑र्चसका॒मो-ऽवे॒क्षेतै॑ष
 वै पा॒त्रियः॑ प्र॒जाप॑तिर्य॒ज्ञः प्र॒जाप॑तिस्तमे॒व तर्प॑यति स ए॒नं तृ॒प्तो
 ब्र॒ह्मव॑र्चसे॒नाभि॑ पव॒त आ॒मया॑व्य - [] 9

TS 3.2.3.4

वे॒क्षेतै॑ष वै पा॒त्रियः॑ प्र॒जाप॑तिर्य॒ज्ञः प्र॒जाप॑तिस्तमे॒व तर्प॑यति स ए॒नं
 तृ॒प्त आ॒युषा॑ऽभि॑ पव॒तेऽभि॑चरन्नवे॒क्षेतै॑ष वै पा॒त्रियः॑ प्र॒जाप॑तिर्य॒ज्ञः
 प्र॒जाप॑तिस्तमे॒व तर्प॑यति स ए॒नं तृ॒प्तः प्रा॑णापा॒नाभ्यां॑ वा॒चो
 दक्ष॑क्र॒तुभ्यां॑ चक्षु॒र्भ्या॑ च श्रो॒त्राभ्या॑-मा॒त्मनो॑ऽङ्गेभ्य
 आ॒युषो॑ऽन्तरेति ता॒जक् प्र॑ ध॒न्वति॑ ॥ 10

(वा॒चे-रूपे॑भ्यो॒ वचो॑दा - आ॒मया॑वी - पञ्च॑चत्वारि॒ंशच्च॑) (A3)

TS 3.2.4.1

स्फ्यः॑ स्व॒स्तिर्वि॑घ्नः स्व॒स्तिः पर॑.शुर्वे॒दिः पर॑शुर्नः स्व॒स्तिः ।
 य॒ज्ञिया॑ य॒ज्ञकृ॑तः स्थ॒ ते मा॒ऽस्मिन् य॒ज्ञ उप॑ ह्यद॒ध्वमु॑प मा॒

द्यावा॑पृ॒थिवी॑ ह॒येता॒मुपा॑ऽऽ*स्तावः॑ क॒लशः॑ सोमो॑ अ॒ग्निरुप॑ दे॒वा
उप॑ य॒ज्ञ उप॑ मा हो॒त्रा उप॑हवे ह॒यन्तां॑ नमो॑ऽग्नये म॒ख॒घ्नेम॒खस्य॑
मा यशो॑ऽर्यादि॒त्याह॒वनीय॑मुप तिष्ठते य॒ज्ञो वै म॒खो - [] 11

TS 3.2.4.2

य॒ज्ञं वा॑व स तद॒हन् तस्मा॑ ए॒व नम॑स्कृत्य स॒दः प्र॑स॒र्पत्या॒त्मनो॑ऽना॒र्त्यै
नमो॑ रु॒द्राय॑ म॒ख॒घ्ने नम॑स्कृत्या मा पा॒हीत्या॒ग्नीध्रं॑ तस्मा॑ ए॒व
नम॑स्कृत्य स॒दः प्र॑स॒र्पत्या॒त्मनो॑ऽना॒र्त्यै नम॑ इन्द्राय म॒ख॒घ्न इन्द्रि॑यं
मे वी॒र्यं॑ मा निर्व॒धीरि॑ति हो॒त्रीय॑मा॒शिषमे॑वैतामा शा॒स्तइन्द्रि॑यस्य
वी॒र्यस्या॑निर्घा॒ताय॑ या वै - [] 12

TS 3.2.4.3

दे॒वताः॑ स॒दस्या॑र्तिमा॒र्पय॑न्ति यस्ता वि॒द्वान् प्र॑स॒र्पति॑ न
स॒दस्या॑र्तिमा॒च्छति॑ नमो॑ऽग्नये म॒ख॒घ्न इत्या॑हैता वै दे॒वताः॑
स॒दस्या॑र्तिमा॒र्पय॑न्ति ता य ए॒वं वि॒द्वान् प्र॑स॒र्पति॑ न स॒दस्या॑र्तिमा॒च्छति॑
दृ॒ढे स्थः॑ शि॒थिरे॑ स॒मीची॑ माऽह॑स॒स्पात॑ सूर्यो॑ मा दे॒वो
दि॒व्याद॑ह॒सस्पा॑तु वा॒युरन्त॑रि॒क्षा - [] 13

TS 3.2.4.4

द॒ग्निः पृ॒थि॒व्या य॒मः पि॒तृ॒भ्यः सर॑स्वती म॒नुष्ये॑भ्यो दे॒वी द्वा॒रौ मा॒ मा
सं ता॒प्तं न॒मः सद॑से न॒मः सद॑सस्प॒तये न॒मः स॒खीनां॑ पु॒रोगा॑णां
चक्षु॑षे न॒मो दि॒वे न॒मः पृ॒थि॒व्या अ॒हे दै॒धिष॑व्योद॒तस्ति॑ष्ठाऽन्यस्य॒ स॒दने॑
सीद॒ योऽस्मत् पा॑क॒तर उ॒न्नि॒वत उ॒दुद्ध॑तश्च गे॒षं पा॒तं मा॒ द्या॒वापृ॑थि॒वी
अ॒द्याहः॑ स॒दो वै प्र॑स॒र्पन्तं॑ – [] 14

TS 3.2.4.5

पि॒तरोऽनु॑ प्र॒स॒र्पन्ति॑ त ए॒नमी॑श्च॒रा हि॒सि॒तोः स॒दः प्र॑सृ॒प्य
दक्षि॑णा॒र्धं परे॑क्षेताऽग॒न्त पि॑तरः पि॒तृमा॑न॒हं यु॒ष्माभि॑र्भूयास॒
सुप्र॑ज॒सो म॒या यू॒यं भू॒यास्ते॑ति॒ तेभ्य॑ ए॒व न॒मस्कृ॑त्य॒ स॒दः
प्र॒स॒र्प॒त्यात्म॑नोऽना॒त्यै ॥ 15

(म॒खो – वा – अ॒न्तरि॑क्षात् – प्र॒स॒र्पन्तं॑ – त्रय॑स्त्रि॒श॒च्च) (A4)

TS 3.2.5.1

भक्षे॑हि मा॒ ऽऽवि॑श दी॒र्घायु॑त्वाय॒ शन्त॑नु॒त्वाय॑ रा॒यस्पोषा॑य
वर्च॑से सुप्र॒जास्त्वा॑येहि॒ वसो॑ पु॒रो वसो॑ प्रि॒यो मे हृदो॑ऽस्य॒श्विनो॑स्त्वा
बा॒हुभ्या॑ च॒ स॒ध्यासं॑ नृ॒चक्ष॑सं त्वा दे॒व सोम॑ सु॒चक्षा॑ अव॒ ख्ये॑षं

म॒न्द्राऽभि॑भूतिः॒ के॒तुर्य॒ज्ञानां॑ वा॒ग्जु॑षा॒णा सोम॑स्य तृ॒प्यतु॑ म॒न्द्रा
स्व॒र्वाच्य॑दि॒तिर॒नाहत॑ शी॒र्ष्णी वा॒ग्जु॑षा॒णा सोम॑स्य तृ॒प्यत्वे॑हि

विश्वच॒र॒षणे॑ – [] 16

TS 3.2.5.2

श॒म्भूर्म॑यो॒भूः स्व॒स्ति मा॑ हरि॒वर्ण॑ प्र॒चर॑ क्र॒त्वे द॑क्षाय रा॒यस्पो॑षाय
सु॒वीर॑तायै मा मा राज॒न् वि बी॑भिषो मा मे हा॒र्दि त्वि॒षा व॑धीः ।
वृ॒षणे शु॒ष्मायाऽऽयु॑षे वर्च॑से ॥

वसु॑मद्-गणस्य सोम देव ते मति॒विदः॑ प्रा॒तस्स॒वनस्य॑ गा॒यत्र॑छन्दस
इन्द्र॑पीतस्य नरा॒श॑ꣳसपीतस्य पि॒तृपी॑तस्य मधु॒मत॑ उप॒हूत॑स्योप॒हूतो॑
भक्ष॑यामि रु॒द्रव॑द्-गणस्य सोम देव ते मति॒विदो॑ मा॒द्ध्य॑न्दिनस्य
स॒वनस्य॑ त्रि॒ष्टुछ॑न्दस इन्द्र॑पीतस्य नरा॒श॑ꣳ सपीतस्य – [] 17

TS 3.2.5.3

पि॒तृपी॑तस्य मधु॒मत॑ उप॒हूत॑स्योप॒हूतो॑ भक्ष॑याम्यादि॒त्यव॑द्-गणस्य
सोम देव ते मति॒विदस्तृ॑तीयस्य स॒वनस्य॑ जग॒तीछ॑न्दस इन्द्र॑पीतस्य
नरा॒श॑ꣳ सपीतस्य पि॒तृपी॑तस्य मधु॒मत॑ उप॒हूत॑स्योप॒हूतो॑ भक्ष॑यामि ॥

आ॒प्या॒य॒स्व॒ समे॑तु ते वि॒श्वतः॑ सोम॒ वृ॒ष्णि॒यं ।

भवा॒ वाज॑स्य स॒ङ्ग॒थे ॥

हि॒न्व॒ मे गा॑त्रा हरि॒वो ग॒णान् मे॒ मा वि॑ती॒तृषः॑ ।

शि॒वो मे॑ स॒प्त॒र्षी॒नुप॑ तिष्ठ॒स्व मा मे॒ऽवा॒ङ्नाभि॑मति – [] 18

TS 3.2.5.4

गाः ॥

अपा॑म सोम॑ममृ॒ता अ॒भू॒माऽद॑श्म॒ ज्योति॑रवि॒दाम॑ दे॒वान् ।

कि॒मस्मा॑न् कृ॒णव॑दरा॒तिः कि॒मु धू॒र्ति॑रमृ॒त म॑र्त्यस्य ॥

यन्म॑ आ॒त्मनो॑ मि॒न्दाऽभू॑दग्निस्तत् पुन॒राऽहा॑र्जा॒तवे॑दा वि॒चर्ष॑णिः ॥

पुन॑रग्निश्चक्षु॒रदा॑त्-पुन॒रिन्द्रो॑ बृ॒हस्प॑तिः ।

पुन॑र्मे अ॒श्विना॑ यु॒वं चक्षु॑रा ध॒त्तम॑क्ष्योः ॥

इ॒ष्टय॑जुषस्ते दे॒व सोम॑ स्तु॒तस्तो॑मस्य – [] 19

TS 3.2.5.5

श॒स्तोक्थ॑स्य॒ हरि॑वत॒ इन्द्र॑पी॒तस्य॒ मधु॑मत॒ उप॑हू॒तस्यो॑पहू॒तो

भक्ष॑यामि ॥

आ॒पूर्वाः॑ स्थाऽऽमा॑ पू॒रय॑त प्र॒जया॑ च॒ धने॑न च ॥

ए॒तत् ते॑ त॒त ये च॑ त्वामन्वे॒तत् ते॑ पि॒ताम॑ह प्र॒पिता॑मह॒ ये च॑ त्वामन्व॒त्र
पि॒तरो॑ यथाभा॒गं म॑न्द॒ध्वं न॑मो वः पि॒तरो॑ रसा॒य न॑मो वः पि॒तरः॑
शु॒ष्माय॑ नमो वः पि॒तरो जी॒वाय॑ नमो वः पि॒तरः॑ – [] 20

TS 3.2.5.6

स्व॒धायै॑ नमो वः पि॒तरो म॑न्यवे॒ नमो॑ वः पि॒तरो घो॒राय॑ पि॒तरो॑ नमो
वो॒ य ए॒तस्मिन्॑ ँलो॒के स्थ॑ यु॒ष्मा ऽस्तेऽनु॑ येऽस्मिन्॑ ँलो॒के मां॑ तेऽनु॑ य
ए॒तस्मिन्॑ ँलो॒के स्थ॑ यू॒यं तेषां॑ ँव॒सिष्ठा॑ भू॒यास्त॑ येऽस्मिन्॑ ँलो॒केऽहं॑
तेषां॑ ँव॒सिष्ठो॑ भू॒यासं॑ प्र॒जाप॑ते न त्वदे॒तान्य॑न्यो वि॒श्वा जा॒तानि॑
प॒रिता॑ ब॒भूव॑ । 21

TS 3.2.5.7

यत् का॒मास्ते॑ जुहु॒मस्त॑न्नो अस्तु व॒य ऽ स्या॑म प॒तयो॑ र॒यीणां॑ ॥
दे॒वकृ॑त॒स्यै॒नसो॑ ऽव॒यज॑नम॒सि म॑नु॒ष्यकृ॑त॒स्यै॒नसो॑ ऽव॒यज॑नम॒सि
पि॒तृकृ॑त॒स्यै॒नसो॑ ऽव॒यज॑नम॒स्यप्सु॑ धौ॒तस्य॑ सोम॒ देव॑ ते नृ॒भिः
सु॒तस्ये॑ष्ट यजुषः स्तु॒तस्तो॑मस्य श॒स्तोक्थ॑स्य यो भ॒क्षो अ॑श्व॒सनि॑र्यो

गो॒स॒नि॒स्तस्य॑ ते पि॒तृभि॑र्भक्षं कृ॒तस्यो॑-प॒हूत॑स्योप॒हूतो॑ भक्षयामि ॥ 22
 (वि॒श्वच॑र्ष॒णो - त्रि॒ष्टु॒च्छ॒न्दस॑ इन्द्र॒पीत॑स्य नरा॒शर्ष॑ स॒पीत॑स्या - ऽति॑
 -स्तु॒तस्तो॑मस्य - जी॒वाय॑ नमो॒ वः पि॒तरो॑ - ब॒भूव॑ -
 चतु॑श्च॒त्वारि॑श॒च्च) (A5)

TS 3.2.6.1

म॒हीनां॑ पयो॒ऽसि॑ वि॒श्वेषां॑ दे॒वानां॑ तनू॒र्ऋ॒द्ध्य॒ास॒मद्य॑ पृष॒तीनां॑ ग्र॒हं
 पृष॒तीनां॑ ग्र॒हो॒ऽसि॑ वि॒ष्णोर्हृ॒दय॑मस्येकमिष वि॒ष्णुस्त्वा॒ऽनु॒ विच॑क्रमे
 भूति॑र्द॒ध्ना घृ॒तेन॑ व॒र्धतां॑ तस्य मे॒ष्टस्य॑ वी॒तस्य॑ द्रवि॒णमा
 ग॒म्याज्ज्योति॑रसि वैश्वान॒रं पृ॒श्नि॒जयै॑ दुग्धं या॒वती॑ द्यावापृ॒थिवी
 म॒हित्वा॑ यावच्च स॒प्त सि॒न्धवो॑ वि॒तस्थुः॑ ।

ताव॑न्तमिन्द्र ते - [] 23

TS 3.2.6.2

ग्र॒हर्ष॑ स॒होर्जा॑ गृ॒ह्णाम्यस्तृ॑तं ॥
 यत् कृ॒ष्णश॑कुनः पृष॒दाज्य॑मवमृ॒शेच्छू॒द्रा अस्य॑ प्र॒मायु॑काः
 स्यु॒र्यच्छ्वा॑ ऽवमृ॒शेच्च॑तुष्पादो॒ऽस्य प॒शवः॑ प्र॒मायु॑काः स्यु॒र्यथ्

स्कन्देद्-यजमानः प्रमायुकः स्यात् पशवो वै पृषदाज्यं पशवो वा
 एतस्य स्कन्दन्ति यस्य पृषदाज्यं७ स्कन्दति यत् पृषदाज्यं
 पुनर्गृह्णाति पशूनेवास्मै पुनर्गृह्णाति प्राणो वै पृषदाज्यं

प्राणो वा - [] 24

TS 3.2.6.3

एतस्य स्कन्दति यस्य पृषदाज्यं७ स्कन्दति यत् पृषदाज्यं पुनर्गृह्णाति
 प्राणमेवास्मै पुनर्गृह्णाति हिरण्यमवधाय गृह्णात्यमृतं वै हिरण्यं प्राणः
 पृषदाज्यममृतमेवास्य प्राणे दधाति शतमानं भवति शतायुः पुरुषः
 शतेन्द्रिय आयुष्येवेन्द्रिये प्रतितिष्ठत्यश्वमव घ्रापयति प्राजापत्यो वा
 अश्वः प्राजापत्यः प्राणः स्वादेवास्मै योनेः प्राणं () निर्मिमीते वि
 वा एतस्य यज्ञश्छिद्यते यस्य पृषदाज्यं७ स्कन्दति वैष्णव्यर्चा
 पुनर्गृह्णाति यज्ञो वै विष्णुर्यज्ञेनैव यज्ञं सं तनोति ॥ 25

(ते - पृषदाज्यं प्राणो वै - योनेः प्राणं - द्वाविंशतिश्च) (A6)

TS 3.2.7.1

दे॒व॑ स॒वि॒त॒रे॒त॒त् ते॒ प्रा॒ऽऽ*ह॒ तत् प्र॒ च॒ सु॒व॒ प्र॒ च॒ य॒ज॒ बृ॒ह॒स्प॒ति॒र्ब्र॒ह्मा
 ऽऽयु॑ष्म॒त्या ऋ॒चो॒ मा गा॒त त॒नू॒पाथ् सा॒म॒नः॒ स॒त्या व॒ आ॒शि॒षः॒ स॒न्तु
 स॒त्या आ॒कू॒तय॒ ऋ॒तं च॒ स॒त्यं च॒ वद॑त स्तु॒त दे॒वस्य॑ स॒वि॒तुः॒ प्र॒स॒वे
 स्तु॒तस्य॑ स्तु॒तम॒स्यूर्जं॑ म॒ह्य॒७ स्तु॒तं दु॒हा॒मा मा॑ स्तु॒तस्य॑ स्तु॒तं
 ग॒म्याच्छ॑स्त्रस्य श॒स्त्र – [] 26

TS 3.2.7.2

म॒स्यूर्जं॑ म॒ह्य॒७ श॒स्त्रं दु॒हा॒मा मा॑ श॒स्त्रस्य॑ श॒स्त्रं ग॒म्या–
 दि॒न्द्रि॒याव॑न्तो वना॒महे॑ धु॒क्षी॒महि॑ प्र॒जामि॑षं ॥
 सा मे॑ स॒त्याऽऽशी॑र्दे॒वेषु॑ भू॒याद्–ब्र॒ह्मव॑र्च॒सं मा॒ऽऽ ग॒म्यात् ॥
 य॒ज्ञो ब॒भूव॑ स आ ब॒भूव॑ स॒प्रज॑ज्ञे स वावृ॒धे ।
 स दे॒वाना॑म॒धि–प॑तिर्ब॒भूव॑ सो अ॒स्मा॒७ अ॒धि॒पती॑न् करोतु व॒य॒७
 स्या॒म प॑तयो र॒यीणां॑ ॥
 य॒ज्ञो वा॒ वै – [] 27

TS 3.2.7.3

य॒ज्ञप॑तिं दु॒हे य॒ज्ञप॑तिर्वा य॒ज्ञं दु॒हे स यः स्तु॑तश॒स्त्रयो॒र्दोह॑म
वि॒द्वान् य॒जते॑ तं य॒ज्ञो दु॒हे स इ॒ष्ट्वा पा॑पी॒यान् भ॑वति य ए॒नयो॒र्दोहं॑
वि॒द्वान् य॒जते॑ स य॒ज्ञं दु॒हे स इ॒ष्ट्वा व॑सी॒यान् भ॑वति स्तु॑तस्य
स्तु॑तम॒स्यू॒र्जं म॒ह्यं स्तु॑तं दु॒हामा॑ मा स्तु॑तस्य स्तु॑तं
ग॒म्याच्छ॑स्त्रस्य श॒स्त्रम॒स्यू॒र्जं म॒ह्यं श॒स्त्रं दु॒हा () मा मा
श॒स्त्रस्य॑ श॒स्त्रं ग॒म्यादि॑त्याहैष वै स्तु॑तश॒स्त्रयो॒र्दोह॑स्तं
य॒ एवं वि॒द्वान् य॒जते॑ दु॒ह ए॒व य॒ज्ञमि॒ष्ट्वा व॑सी॒यान् भ॑वति ॥ 28

(श॒स्त्रं - वै - श॒स्त्रन्दु॑हां - द्वाविं॑शतिश्च) (A7)

TS 3.2.8.1

श्ये॒नाय॑ प॒त्वने॑ स्वा॒हा वट्थ॑स्वयम॒भिगू॑र्ताय नमो वि॒ष्टम्भा॑य
ध॒र्मणे॑ स्वा॒हा वट्थ॑स्वयम॒भिगू॑र्ताय नमः प॒रि॒धये॑ ज॒नप्र॑थ॒नाय॑ स्वा॒हा
वट्थ॑स्वयम॒भिगू॑र्ताय नम ऊ॒र्जे हो॑त्राणां स्वा॒हा वट्थ॑स्वयम॒भिगू॑र्ताय
नमः प॒य॒से हो॑त्राणां स्वा॒हा वट्थ॑स्वयम॒भिगू॑र्ताय नमः प्र॒जाप॑तये
म॒नवे॑ स्वा॒हा वट्थ॑स्वयम॒भिगू॑र्ताय नम ऋ॒तमृ॑तपाः सु॒वर्वा॑ट्थस्वा॒हा

वट्॑थ॒स्वय॑म॒भिगू॑र्ताय॒ नम॑स्तृ॒न्पन्ता॑ ॐ हो॒त्रा म॑धो॒र्घ॒तस्य॑ य॒ज्ञप॑ति॒मृष॑य
ए॒नसा॑ – [] 29

TS 3.2.8.2

ऽऽहुः ।

प्र॒जा निर्भ॑क्ता अ॒नुत॑प्यमा॒ना म॑ध॒व्यौ स्तो॑कावप॒ तौ र॑राध ॥
सं न॒स्ताभ्या॑ ॐ सृ॒जतु॑वि॒श्वक॑र्मा घो॒रा ऋ॑षयो॒ नमो॑ अ॒स्त्वेभ्यः॑ ।
चक्षु॑ष ए॒षां म॑नसश्च स॒न्धौ बृ॒हस्प॑तये॒ महि॑ षद् द्यु॒मन्न॑मः ॥
नमो॑ वि॒श्वक॑र्मणे॒ स उ॑ पा॒त्वस्मा॑न॒नन्या॑न्थ्-सो॒मपा॑न् म॒न्यमा॑नः ।
प्रा॒णस्य॑ वि॒द्वान्थ् स॑म॒रे न॒ धीर॑ ए॒नश्च॑कृ॒वान् महि॑ ब॒द्ध ए॒षां ॥
तं वि॑श्वक॒र्मन् – [] 30

TS 3.2.8.3

-प्र मु॒ञ्चा स्व॑स्तये॒ ये भ॑क्षय॒न्तो न॒ वसू॑न्या॒नृहुः॑ ।
या॒नग्न॑यो॒ऽन्वत॑प्यन्त॒ धि॒ष्णि॒या इ॒यं तेषा॑म॒वया॑ दु॒रिष्ट्यै॑ स्वि॒ष्टिं न॒स्तां
कृ॑णोतु वि॒श्वक॑र्मा ॥

नमः॑ पि॒तृ॒भ्यो॑ अ॒भि ये नो॑ अ॒ख्यन् य॒ज्ञकृ॑तो य॒ज्ञका॑माः सु॒दे॒वा
अ॒का॒मा वो॑ दक्षि॒णां न नी॑निम मा नस्तस्मा॒ दे॒नसः॑ पा॒पयि॑ष्ट ।
याव॑न्तो वै स॒दस्या॑स्ते स॒र्वे दक्षि॑ण्यास्ते॒भ्यो यो दक्षि॑णां न-[] 31

TS 3.2.8.4

नये॑दै॒भ्यो वृ॑श्येत यद्-वै॒श्वक॑र्म॒णानि॑ जु॒होति॑ स॒दस्या॑ने॒व तत्
प्री॑णात्यस्मे दे॒वासो॑ व॒पुषे चि॑किथ्सत यमा॒शिरा॑ दम्प॒ती वा॒मम॑श्नुतः ।
पु॒मान् पु॒त्रो जा॑यते वि॒न्दते॑ वस्वथ वि॒श्वे अ॒रपा॑ ए॒धते॑ गृ॒हः ॥
आ॒शी॒र्दा॒या दम्प॑ती वा॒मम॑श्नुताम॒रिष्टो॑ रा॒यः स॒चता॑ꣳ स॒मो॒कसा॑ ।
य आ॑ऽसिच॒थ् सं दु॑ग्धं कु॒म्भ्या स॒हेष्टे॑न या॒मन्न॑मतिं जहातु सः ॥

स॒र्पि॒र्ग्री॒वी - [] 32

TS 3.2.8.5

पी॒वर्य॑स्य जा॒या पी॒वानः॑ पु॒त्रा अ॒कृ॒शासो॑ अस्य ।
स॒हजा॑निर्यः सु॒मख॑स्यमा॒न इन्द्रा॑याऽऽ*शि॒रꣳ स॒ह कु॒म्भ्याऽदा॑त् ॥
आ॒शी॒र्म ऊ॒र्जमु॑त सु॒प्रजा॑स्त्वमिषं दधातु द्र॒विणꣳ स॒वर्च॑सं ।
सं ज॒यन् क्षे॑त्राणि स॒हसा॑ऽहमिन्द्र कृ॒ण्वानो॑ अ॒न्याꣳ अध॑रान्थ्सप॒त्नान् ॥

भू॒तम॑सि भू॒ते मा॑ धा॒ मुख॑मसि॒ मुखं॑ भू॒यासं॑ द्यावा॑पृथि॒वीभ्यां॑
त्वा परि॑गृह्णामि॒ विश्वे॑ त्वा दे॒वा वै॑श्वा॒नराः॑ - [] 33

TS 3.2.8.6

प्र॒च्याव॑यन्तु दि॒वि दे॒वान् दृ॒हान्तरि॑क्षे वया॑सि पृथि॒व्यां पा॑रि॒थिवान्॑
ध्रु॒वं ध्रु॒वेण॑ ह॒विषा॑ऽव सोमं॑ नयामसि ।

यथा॑ नः॒ सर्व॑मिज्जगदयक्ष्म॑ सु॒मना॑ असत् ।

यथा॑ न इन्द्र॒ इद्वि॑शः के॒वलीः॑ सर्वाः॒ सम॑नसः करत् ।

यथा॑ नः॒ सर्वा॑ इद्विशोऽस्माकं॒ केव॑लीरसन् ॥ 34

(ए॒नसा॑ - वि॒श्वक॑र्मन् - यो दक्षि॑णां न - सर्पि॑र्ग्री॒वी - वै॑श्वा॒नरा -
श्च॑त्वा॒रि॒श॒च्य) (A8)

TS 3.2.9.1

यद्वै॑ हो॒ताऽध्व॑र्युम॒भ्याह्व॑यते वज्र॑मे॒नम॑भि प्रव॑र्तयत्युक्थ॑शा इत्या॑ह
प्रा॒तस्स॑वनं॒ प्रति॑गीर्य॒ त्री॒ण्येता॑न्यक्षराणि॒ त्रि॒पदा॑ गा॒यत्री॑ गा॒यत्रं॑
प्रा॒तस्स॑वनं॒ गा॒यत्रि॑यैव प्रा॒तस्स॑वने वज्र॑मन्तर्द॒धत्त॑ उक्थं॒ वा॒चीत्या॑ह
मा॒द्ध्यंदि॑न॒स॒वनं॑ प्रति॑गीर्य॒ च॒त्वार्ये॑ता॒न्य-क्ष॑राणि॒ चतु॑ष्पदा॒ त्रि॒ष्टुप्

त्रैष्टु॑भं॒ मा॒द्ध्यं॑दि॒न॒ꣳ स॒वनं॑ त्रि॒ष्टुभै॑व मा॒द्ध्यन्दि॑ने स॒वने॑
वज्र॑मन्त॒र्धत्त॑- [] 35

TS 3.2.9.2

उ॒क्थं॑ वा॒चीन्द्रा॑येत्याह तृतीय॑स॒वनं॑ प्र॒तिगी॑र्य स॒प्तैतान्य॑क्षराणि
स॒प्तप॑दा श॒क्वरी॑ शा॒क्वरो॑ वज्रो॒ वज्रे॑णै॒व तृतीय॑स॒वने॑ वज्र॑मन्त॒र्धत्ते॑
ब्र॒ह्मवा॑दिनो॒ वद॑न्ति स त्वा अ॒ध्वर्युः॑ स्याद्यो यथा॑स॒वनं॑ प्र॒तिगरे॑
छन्दा॑ꣳसि स॒म्पाद॑येत् तेजः॑ प्रा॒तः स॒वन आ॒त्मन् द॑धी॒तेन्द्रि॑यं
मा॒द्ध्यन्दि॑ने स॒वने॑ प॒शूꣳ स्तृतीय॑स॒वन इत्यु॑क्थशा॒ इत्या॑ह
प्रा॒तस्स॑वनं॑ प्र॒तिगी॑र्य त्री॒ण्येतान्य॑क्षराणि - [] 36

TS 3.2.9.3

त्रि॒पदा॑ गा॒यत्री॑ गा॒यत्रं॑ प्रा॒तस्स॑वनं॑ प्रा॒तस्स॑वन ए॒व प्र॒तिगरे॑
छन्दा॑ꣳसि स॒ंपाद॑यत्यथो तेजो॒ वै गा॒यत्री॑ तेजः॑ प्रा॒तः स॒वनं॑ तेज
ए॒व प्रा॒तस्स॑वन आ॒त्मन् ध॑त्त उ॒क्थं॑ वा॒चीत्या॑ह मा॒द्ध्यन्दि॑न॒ꣳ
स॒वनं॑ प्र॒तिगी॑र्य च॒त्वार्ये॑तान्य॑क्षराणि चतु॑ष्पदा त्रि॒ष्टुप् त्रैष्टु॑भं

मा॒द्ध्यन्दि॒नꣳ स॒वनं॑ मा॒द्ध्यंदि॒न ए॒व स॒वने॑ प्र॒तिग॒रे छन्दाꣳसि॑
सं॒पाद॒यत्यथो॑ इन्द्रि॒यं वै त्रि॒ष्टुगिन्द्रि॒यं मा॒द्ध्यंदि॒नꣳ स॒वन - [] 37

TS 3.2.9.4

-मिन्द्रि॒यमे॒व मा॒द्ध्यन्दि॒ने स॒वन आ॒त्मन् ध॑त्त उ॒क्तं वा॒चीन्द्रा॒येत्या॑ह
तृ॒तीयस॒वनं प्र॒तिगी॒र्य स॒प्तैतान्य॑क्षराणि स॒प्तप॒दा श॒क्वरी॑ शा॒क्वराः
प॒शवो॑ जा॒गतं तृ॒तीयस॒वनं तृ॒तीयस॒वन ए॒व प्र॒तिग॒रे छन्दाꣳसि॑
सं॒पाद॒यत्यथो॑ प॒शवो॑ वै ज॒गती॑ प॒शवस्तृ॒तीयस॒वनं प॒शूने॒व
तृ॒तीयस॒वन आ॒त्मन् ध॑त्ते य॒द्वै हो॒ताऽध्व॑र्युम॒भ्याह्व॑यत
आ॒व्यम॑स्मिन् द॒धाति॑ तद्य॒न्ना - [] 38

TS 3.2.9.5

प॒हनी॑त पु॒राऽस्य॑ सँव॒त्सरा॑द्-गृ॒ह आ वे॒वीर॒ञ्छोꣳसा॒ मोद॑ इ॒वेति॑
प्र॒त्याह्व॑यते तेनै॒व तद॑प॒ हते॑ यथा॒ वा आ॒यतां॑ प्र॒तीक्ष॑त ए॒वम॑ध्व॒र्युः
प्र॒तिग॒रं प्र॒तीक्ष॑ते यद॒भि प्र॒तिगृ॑णीयाद्यथा ऽऽय॒तया॑ स॒मृच्छ॑ते ता॒दृगे॒व
तद्य॑द॒र्धर्चा॑ल्लुप्ये॒त यथा॑ धा॒वद्भ्यो॑ ही॒यते॑ ता॒दृगे॒व तत् प्र॒बाहु॑ग्वा
ऋ॒त्विजा॑मु॒द्गीथा॑ उ॒द्गीथ॑ ए॒वोद्-गा॑तृणा - [] 39

TS 3.2.9.6

मृ॒चः प्र॒णव॑ उ॒क्थ॑श्॒सिनां॒॑ प्रति॒गरो॑ऽ॒ध्वर्यू॑णां॒ य ए॒वं वि॒द्वान्
प्रति॒गृणा॑त्यन्नाद॒ एव॑ भ॒वत्या॑ऽस्य॒ प्रजा॑यां॒ वा॒जी जा॑यत॒ इयं॑ वै
होता॑ऽसाव॒ध्वर्यु॑र्यदासीनः॒ श॒स॒त्यस्या॑ ए॒व तद्धो॑ता नैत्यास्त॒ इव॑
ही॒यम॑थो॒ इमा॑मे॒व तेन॑ यज॒मानो॑ दु॒हे यत् तिष्ठ॑न् प्रति॒गृणा॑त्यमु॒ष्या
ए॒व तद॑ध्वर्युर्नैति - [] 40

TS 3.2.9.7

तिष्ठ॑ती॒व ह्य॑साव॒थो अ॒मूमे॑व तेन॒ यज॑मानो दु॒हे यदा॑सीनः॒ श॒स॒ति
तस्मा॑दितः॒ प्र॒दानं॑ दे॒वा उप॑ जी॒वन्ति॑ यत् तिष्ठ॑न् प्रति॒गृणा॑ति
तस्मा॑दमु॒तः प्र॒दानं॑ म॒नुष्या॑ उप॒ जीव॑न्ति॒ यत् प्रा॑डासीनः॒ श॒स॒ति
प्र॒त्यङ् तिष्ठ॑न् प्रति॒गृणा॑ति॒ तस्मा॑त् प्रा॒चीन॑रेतो॒ धी॒यते॑ प्र॒तीचीः॑
प्र॒जा जा॑यन्ते॒ यद्वै होता॑ऽध्वर्युम॒भ्याह्व॑यते॒ वज्र॑मे॒नम॒भि प्र॑वर्तयति ()
परा॑डा वर्तते॒ वज्र॑मे॒व तन्नि॑ करोति ॥ 41

(सर्व॑ने॒ वज्र॑मन्तर्धत्ते - त्री॒ण्येता॑न्यक्षरा॒णी - द्रि॒यं मा॒ध्यन्दि॑नः
सर्व॑नं - नो - द्रा॒तृणा॑ - म॒ध्वर्यु॑र्नैति - वर्त॑यत्य - षौ च) (A9)

TS 3.2.10.1

उ॒प॒याम॑गृ॒हीतो॑ऽसि वा॒क्षस॑दसि वा॒क्पाभ्यां॑ त्वा क्र॒तुपा॑भ्याम॒स्य
य॒ज्ञस्य॑ ध्रु॒वस्याऽ॒ध्य-क्षा॑भ्यां गृ॒ह्णाम्यु॒प॒याम॑गृ॒हीतो॑ऽस्य॒तस॑दसि
चक्षु॑ष्पाभ्यां त्वा क्र॒तुपा॑भ्याम॒स्य य॒ज्ञस्य॑ ध्रु॒वस्याऽ॒ध्यक्षा॑भ्यां
गृ॒ह्णाम्यु॒प॒याम॑गृ॒हीतो॑ऽसि श्रु॒तस॑दसि श्रो॒त्रपा॑भ्यां त्वा क्र॒तुपा॑भ्याम॒स्य
य॒ज्ञस्य॑ ध्रु॒वस्याऽ॒ध्यक्षा॑भ्यां गृ॒ह्णामि॑ दे॒वेभ्य॑स्त्वा वि॒श्वदे॑वेभ्यस्त्वा
वि॒श्वेभ्य॑स्त्वा दे॒वेभ्यो॑ वि॒ष्णवु॑रु॒क्रमै॑ष ते सोम॒स्तꣳ
रक्ष॑स्व - [] 42

TS 3.2.10.2

तं ते दु॒श्चक्षा॑ मा॒ऽव ख्य॑न्मयि वसुः पु॒रोव॑सु॒र्वाक्पा॑ वाचं मे पाहि
मयि वसु॒र्विद॑द्वसुश्चक्षु॑ष्पाश्चक्षु॒र्मे पाहि॑ मयि वसुः सँय॑द्वसुः
श्रो॒त्रपाः॑ श्रो॒त्रं मे पाहि॑ भू॒रसि॑ श्रेष्ठो र॒श्मीनां॑ प्रा॒णपाः॑ प्रा॒णं
मे पाहि॑ धू॒रसि॑ श्रेष्ठो र॒श्मीना॑म॒पान॑पा अ॒पानं॑ मे पाहि यो न इन्द्र॑वायू
मि॒त्राव॑रुणा-व॒श्विना॑व॒भिदा॑सति भ्रातृ॒व्य () उत्पि॑पीते शु॒भस्प॑ती
इ॒दम॑हं तम॒धरं॑ पादयामि यथेन्द्रा॒ऽहमु॑त्तमश्चे॒तया॑नि ॥ 43

(रक्षस्व - भ्रातृव्य - स्त्रयोदश च) (A10)

TS 3.2.11.1

प्र सो अग्ने तवोतिभिः सुवीराभिस्तरति वाजकर्मभिः ।

यस्य त्वं सख्यमाविथ ॥

प्र होत्रे पूर्व्यं वचोऽग्नये भरता बृहत् ।

विपां ज्योतींषि बिभ्रते न वेधसे ॥

अग्ने त्री ते वाजिना त्री षधस्था तिस्रस्ते जिह्वा ऋतजात पूर्वीः ।

तिस्र उ ते तनुवो देववातास्ताभिर्नः पाहि गिरो अप्रयुच्छन् ॥

सं वाम् कर्मणा समिषा - [] 44

TS 3.2.11.2

हिनोमीन्द्रा-विष्णू अपसस्पारे अस्य ।

जुषेथां यज्ञं द्रविणं च धत्तमरिष्टैर्नः पथिभिः पारयन्ता ॥

उभा जिग्यथुर्न परा जयेथे न परा जिग्ये कतरश्चनैनौः ।

इन्द्रश्च विष्णो यदपस्पृधेथां त्रेधा सहस्रं वि तदैरयेथां ॥

त्री॒ण्यायू॑षि॒ तव॑ जा॒तवे॑दस्ति॒स्र आ॒जानी॑रु॒षस॑स्ते अ॒ग्ने ।

ताभि॑र्दे॒वाना॑मवो॒ यक्षि॑ वि॒द्वान॑था – [] 45

TS 3.2.11.3

–भव॑ यज॒मानाय॑ शँ॒ योः ॥

अ॒ग्निस्त्री॑णि॒ त्रिधा॑तू॒न्या क्षे॑ति वि॒दथा॑ क॒विः ।

स त्री॑रे॒काद॑शाँ॒ इह ॥

यक्ष॑च्च पि॒प्रय॑च्च नो॒ विप्रो॑ दू॒तः परि॑ष्कृतः ।

नभ॑न्तामन्य॒के स॑मे ॥

इन्द्रा॑विष्णू दृ॒हिताः॑ श॒म्बर॑स्य नव॒ पुरो॑ नव॒तिं च॑ – श॒त्रि॑ष्टं ।

श॒तं व॑र्चि॒नः स॒हस्रं॑ च सा॒कँ ह॒थो अ॑प्र॒त्यसु॑रस्य वी॒रान् ॥

उ॒त मा॒ता म॒हिष॑ मन्व॒वेन॑दमी॒ त्वा () ज॑हति पु॒त्र दे॒वाः ।

अथा॑ब्रवीद्–वृ॒त्रमिन्द्रो॑ ह॒निष्य॑न्थ्–स॒खे वि॑ष्णो वि॒तरं॑ विक्र॒मस्व ॥ 46

(इ॒षा – ऽथ॑ – त्वा – त्रयो॑दश च) (A11)

Prasna Korvai with starting Padams of 1 to 11 Anuvaakams :-

(यो वै पवमानानां – त्रीणि – परिभूरः – स्प्यः स्वस्ति – भक्षेहि
– महीनां पयोऽसि – देव सवितरेतत् – श्येनाय – यद्वै होतो –
पयामगृहीतोऽसि वाक्षसत् – प्र सो अग्न – एकादश)

Korvai with starting Padams of 1, 11, 21 Series of Panchaatis :-

(यो वै – स्प्यः स्वस्तिः – स्वधायै नमः – प्रमुञ्च – तिष्ठतीव –
षट्चत्वारिंशत्)

First and Last Padam of Second Prasnam of Kandam 3:-

(यो वै पवमानानां – विक्रमस्व)

॥ हरिः ओं ॥

॥ कृष्ण यजुर्वेदीय तैत्तिरीय संहितायां

तृतीयकाण्डे द्वितीयः प्रश्नः समाप्तः ॥

=====

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3.3 तृतीयकाण्डे तृतीयः प्रश्नः – वैकृतविधीनामभिधानं

TS 3.3.1.1

अग्ने॑ तेज॑स्विन् तेज॑स्वी त्वं दे॒वेषु॑ भूया॒स्तेज॑स्वन्तं॒ मामा॑युष्मन्तं॒
वर्च॑स्वन्तं मनु॒ष्येषु॑ कुरु दी॒क्षायै॑ च त्वा तप॑सश्च तेज॑से जुहोमि
तेजो॑विद॒सि तेजो॑ मा मा हा॒सीन्माऽहं॑ तेजो॑ हा॒सिषं॑ मा मां तेजो॑
हासी॒दिन्द्रो॑जस्विन्नो॒जस्वी त्वं दे॒वेषु॑ भूया॒ ओज॑स्वन्तं॒ मामा॑युष्मन्तं॒
वर्च॑स्वन्तं मनु॒ष्येषु॑ कुरु ब्र॒ह्मणश्च॑ त्वा क्ष॒त्रस्य॑ चौ – [] 1

TS 3.3.1.2

– जसे जुहोम्यो॒जोवि॒दस्यो॒जो मा मा हा॒सीन्माऽहमो॒जो हा॒सिषं॑ मा
मामो॒जो हा॒सीथ् सूर्य॑ भ्राज॑स्विन् भ्राज॑स्वी त्वं दे॒वेषु॑ भूया
भ्राज॑स्वन्तं॒ मामा॑युष्मन्तं॒ वर्च॑स्वन्तं मनु॒ष्येषु॑ कुरु वा॒योश्च॑ त्वाऽपाञ्च॑
भ्राज॑से जुहोमि सु॒र्विद॒सि सु॒वर्मा॑ मा हा॒सीन्माऽहं॑ सु॒वर्.हा॒सिषं॑
मा माऽ सु॒वर्.हा॒सीन् मयि॑ () मे॒धां मयि॑ प्र॒जां मय्य॑ग्निस्तेजो॑

दधातु॑ मयि॑ मे॒धां मयि॑ प्र॒जां मयीन्द्र॑ इन्द्रि॒यं दधातु॑ मयि॑ मे॒धां मयि॑
प्र॒जां मयि॑ सूर्यो॑ भ्राजो॑ दधातु ॥ 2

(क्षत्रस्य॑ च – मयि॑ – त्रयोविंशतिश्च) (A1)

TS 3.3.2.1

वा॒युर्हि॑ क॒र्ताऽग्निः॑ प्र॒स्तो॒ता प्र॒जाप॑तिः साम॒ बृह॑स्पतिरु॒द्गाता॑ विश्वे॑
दे॒वा उप॑गा॒तारो॑ मरु॒तः प्र॑तिह॒र्तार॑ इन्द्रो॑ नि॒धन॑न्ते दे॒वाः प्रा॑णभृ॒तः
प्रा॒णं मयि॑ दध॒त्वेत॑द्वै सर्व॑म॒ध्वर्यु॑-रु॒पाकु॑र्वन्नु॒द्गातृ॑भ्य उ॒पाक॑रोति ते
दे॒वाः प्रा॑णभृ॒तः प्रा॒णं मयि॑ दध॒त्वित्या॑ है॒तदे॒व सर्व॑मा॒त्मन् ध॑त्त इ॒डा
दे॒वहू॑ र्मनु॑-र्यज्ञ॒नी-बृ॑ह॒स्पति॑रु॒क्थाम॑दानि श॒सिष॑द् विश्वे॑

दे॒वाः – [] 3

TS 3.3.2.2

॥ सू॒क्तवा॑चः पृथि॒वि मा॒तर्मा॑ माहि॒ंसी र्मधु॑ म॒निष्ये॑ मधु॑ ज॒निष्ये॑
मधु॑वक्ष्यामि मधु॑वदि॒ष्यामि॑ मधु॑मतीं दे॒वेभ्यो॑ वाचमु॒द्यास॑
शुश्रू॑षेण्यां मनु॒ष्येभ्य॑स्तं मा दे॒वा अव॑न्तु शो॒भायै॑ पि॒तरोऽनु॑ मदन्तु ॥ 4

(श॒सिष॑द् विश्वे॑ दे॒वा – अष्टाविंशतिश्च) (A2)

TS 3.3.3.1

वस॑वस्त्वा प्र॑वृहन्तु गाय॑त्रेण छन्द॑साऽग्नेः प्रि॒यं पाथ॑ उपे॑हि
रुद्रा॑स्त्वा प्र॑वृहन्तु त्रैष्टु॑भेन छन्द॑सेन्द्रस्य प्रि॒यं पाथ॑ उपे॑ह्यादित्यास्त्वा
प्र॑वृहन्तु जा॑गतेन छन्द॑सा विश्वे॑षां दे॒वानां॑ प्रि॒यं पाथ॑ उपे॑हि मान्दा॑सु
ते शुक्र॑ शुक्र॒मा धू॑नोमि भ॒न्दना॑सु को॒तना॑सु नू॒तना॑सु रे॒शीषु॑ मे॒षीषु॑
वा॒शीषु॑ विश्व॑भृथ्सु मा॒द्ध्वीषु॑ ककु॒हासु॑ शक्व॑रीषु – [] 5

TS 3.3.3.2

शुक्रा॑सु ते शुक्र॑ शुक्र॒मा धू॑नोमि शु॒क्रं ते शु॒क्रेण॑ गृह्णाम्य॒हो रू॒पेण॑
सूर्य॑स्य रश्मि॑भिः ॥
आ॑ऽस्मिन्नु॒ग्रा अ॑चुच्यवुर्दिवो धा॒रा अस॑श्चत ॥
ककु॒हꣳ रू॒पं वृ॑षभस्य रोचते बृ॒हथ् सोमः॑ सोम॑स्य पु॒रोगाः॑ शु॒क्रः
शु॒क्रस्य॑ पु॒रोगाः॑ ॥
यत् ते सो॒मादा॑भ्यं नाम जा॑गृवि तस्मै॑ ते सोम॑ सोमा॑य स्वा॒होशिक्
त्वं दे॒व सोम॑ गाय॑त्रेण छन्द॑साऽग्नेः – [] 6

TS 3.3.3.3

प्रि॒यं पा॒थो अ॒पी॒हि व॒शी त्वं दे॒व सोम॒ त्रैष्टु॑भेन॒ छन्द॑सेन्द्र॒स्य प्रि॒यं
पा॒थो अ॒पी॒ह्यस्म॑त्सखा॒ त्वं दे॒व सोम॒ जाग॑तेन॒ छन्द॑सा॒ विश्वे॑षां दे॒वानां॑
प्रि॒यं पा॒थो अ॒पी॒ह्या नः॑ प्रा॒ण ए॒तु परा॑वत॒ आऽन्तरि॑क्षाद्वि॒स्प॒रि ।
आयुः॑ पृथि॒व्या अ॒द्ध्यमृ॑तमसि प्रा॒णाय॑ त्वा ॥

इन्द्रा॑ग्नी मे॒ वर्चः॑ कृणुतां॒ वर्चः॑ सोमो॒ बृह॑स्पतिः () ।
वर्चो॑ मे॒ विश्वे॑दे॒वा वर्चो॑ मे॒ धत्त॑मश्विना ॥

दध॑न्वे वा॒ यदी॒मनु॑ वोचद्ब्र॒ह्माणि॑ वे॒रु तत् ।
परि॑ विश्वा॒नि का॒व्या ने॒मिश्च॑क्रमिवा॒ भवत् ॥ 7

(शक्व॑रीष्व - ग्ने - बृ॒हस्प॑तिः - पञ्च॑विंशतिश्च) (A3)

TS 3.3.4.1

ए॒तद्वा अ॒पां ना॒मधे॒यं गु॒ह्यं य॑दा॒धावा॑ मा॒न्दासु॑ ते शु॒क्र शु॒क्रमा॑
धू॒नोमी॒त्याहा॒पामे॒व ना॒मधे॒येन॑ गु॒ह्येन॑ दि॒वो वृ॑ष्टि॒मव॑ रु॒न्धे शु॒क्रं ते॑
शु॒क्रेण॑ गृ॒ह्णामी॒त्याहै॒तद्वा अ॒हो रू॒पं य॑द्रा॒त्रिः सूर्य॑स्य र॒श्मयो॑ वृ॒ष्ट्या॑

ई॒शते॑ऽह ए॒व रू॒पेण॑ सू॒र्यस्य॑ र॒श्मिभि॑र्दि॒वो वृ॑ष्टिं

च्याव॑यत्याऽस्मिन्नु॒ग्रा - [] 8

TS 3.3.4.2

अ॒चु॒च्यवु॑रित्याह॒ यथा॑य॒जुरे॒वैतत् क॑कु॒ह॒ रूपं॑ वृ॒षभ॑स्य॒ रोच॑ते
बृ॒हदि॒त्याहै॒तद्वा अ॑स्य॒ ककु॑ह॒ रूपं॑ य॒द्-वृ॑ष्टी रू॒पेणै॒व वृ॑ष्टि॒मव॑
रु॒न्धे य॑त्ते सो॒मादा॑भ्यं॒ नाम॒ जागृ॑वीत्याहै॒ष ह॒ वै ह॒विषा॑ ह॒विर्य॑जति
योऽदा॑भ्यं॒ गृही॑त्वा सो॒माय॑ जु॒होति॒परा॒ वा ए॒तस्याऽऽ*युः॑

प्रा॒ण ए॒ति - [] 9

TS 3.3.4.3

योऽ॒ंशुं गृ॑ह्णात्या॒ नः प्रा॒ण ए॒तु परा॑वत॒ इत्या॑हाऽऽ*यु॒रेव॑ प्रा॒णमा॑त्मन्
ध॒त्ते ऽमृत॑मसि प्रा॒णाय॑ त्वेति॒ हिर॑ण्यम॒भि व्य॑नित्यमृतं॒ वै हिर॑ण्यमा॒युः
प्रा॒णोऽमृ॑ते॒नैवाऽऽ*यु॑रा॒त्मन् ध॒त्ते श॒तमा॑नं॒ भव॑ति श॒तायुः॑ पु॒रुषः॑
श॒तेन्द्रि॑य॒ आयु॑ष्येवेन्द्रि॒ये प्र॑तितिष्ठत्यप॒ उप॑ स्पृशति॒ भेष॑जं॒ वा
आपो॑ () भेष॒जमे॒व कुरु॑ते ॥ 10

(उ॒ग्रा - ए॒त्या - प - स्त्री॑णि च) (A4)

TS 3.3.5.1

वा॒युर॑सि प्रा॒णो॒ नाम॑ सवि॒तुराधि॑पत्येऽपानं॑ मे दा॒श्चक्षु॑रसि श्रोत्रं॑
 नाम॑ धा॒तुराधि॑पत्य आयु॒र्मे दा॑ रूप॒मसि॑ वर्णो॒ नाम॑ बृह॒स्पते॑राधिपत्ये
 प्र॒जां मे॑ दा ऋ॒तम॑सि स॒त्यं नामेन्द्र॑स्याऽऽ*धि॒पत्ये॑ क्ष॒त्रं मे॑ दा
 भू॒तम॑सि भव्यं॑ नाम॑ पि॒तृणा॑माधिपत्येऽपा-मोष॑धीनां गर्भं॑ धा ऋ॒तस्य॑
 त्वा व्यो॑मन ऋ॒तस्य॑ - [] 11

TS 3.3.5.2

त्वा वि॒भूम॑न ऋ॒तस्य॑ त्वा वि॒धर्म॑ण ऋ॒तस्य॑ त्वा स॒त्याय॑र्तस्य त्वा
 ज्यो॑तिषे प्र॒जाप॑ति वि॒राज॑मपश्यत् तया भू॒तं च॑ भव्यं॑ चा सृ॒जत॑
 तामृ॑षिभ्यस्तिरोऽद॒धात् तां ज॒मद॑ग्निस्तपसाऽ पश्य॑त् तया वै स
 पृ॒श्नीन् कामा॑नसृ॒जत॑ तत् पृ॒श्नीनां॑ पृ॒श्नित्वं॑ यत् पृ॒श्नयो॑ गृह्यन्ते
 पृ॒श्नीने॒व तैः कामा॑न् यज॒मानो॑ऽव रुन्धे वा॒युर॑सि प्रा॒णो - [] 12

TS 3.3.5.3

नामेत्या॑ह प्रा॒णापा॑नावेवाव रुन्धे चक्षु॑रसि श्रोत्रं॑ नामेत्या॑हाऽऽयु॒रेवा॑व
 रुन्धे रूप॒मसि॑ वर्णो॒ नामेत्या॑ह प्र॒जामे॑वाव रुन्ध॑ऋ॒तम॑सि स॒त्यं

नामेत्याह क्षत्रमेवाव रुन्धे भूतमसि भव्यं नामेत्याह पशवो वा
अपामोषधीनां गर्भः पशूनेवा – [] 13

TS 3.3.5.4

–व रुन्ध एतावद्वै पुरुषं परितस्तदेवाव रुन्ध ऋतस्य त्वा व्योमन
इत्याहेयं वा ऋतस्य व्योमेमामेवाभि जयत्यृतस्य त्वा विभूमन
इत्याहाऽन्तरिक्षं वा ऋतस्य विभूमान्तरिक्षमेवाभि जयत्यृतस्य त्वा
विधर्मण इत्याह द्यौर्वा ऋतस्य विधर्म दिवमेवाभि
जयत्यृतस्य – [] 14

TS 3.3.5.5

त्वा सत्यायेत्याह दिशो वा ऋतस्य सत्यं दिश एवाभि जयत्यृतस्य
त्वा ज्योतिष इत्याह सुवर्गो वै लोक ऋतस्य ज्योतिः सुवर्गमेव
लोकमभि जयत्येतावन्तो वै देवल्लोकास्तानेवाभि जयति दश
संपद्यन्ते दशाक्षरा विराडन्नं विराड् विराज्येवान्नाद्ये प्रतितिष्ठति ॥ 15

(व्योमन ऋतस्य – प्राणः – पशूनेव – विधर्म दिवमेवाभि
जयत्यृतस्य – षट्चत्वारिंशच्च) (A5)

TS 3.3.6.1

दे॒वा वै यद्-य॒ज्ञेन॑ ना॒वारु॑न्धत॒ तत् परै॑र॒वारु॑न्धत॒ तत् परा॑णां
 पर॒त्वं य॑त् परे॑ गृ॒ह्यन्ते॑ यदे॒व य॒ज्ञेन॑ ना॒वारु॑न्धे तस्या॒वरु॑द्ध्यै
 यं प्र॒थमं॑ गृ॒ह्णाती॑ममे॒व तेन॑ लो॒कम॑भि जयति॒ यं द्वि॑तीयमन्तरि॒क्षं
 तेन॑ यं तृ॒तीयम॑मुमे॒व तेन॑ लो॒कम॑भि जयति॒ यदे॒ते गृ॒ह्यन्त॑ ए॒षां
 लो॒काना॑मभिजित्या - [] 16

TS 3.3.6.2

उत्तरे॒ष्वहः॑ स्व॒मुतो॑ऽर्वाञ्चो॑ गृ॒ह्यन्ते॑ ऽभिजित्यै॒वेमां॑ लो॒कान् पुन॑रिमं
 लो॒कं प्र॒त्यव॑रोहन्ति॒ यत् पूर्वे॑ष्वहः॑ स्वि॒तः परा॑ञ्चो गृ॒ह्यन्ते॑ तस्मा॒दितः॑
 परा॑ञ्च इ॒मे लो॒का यदु॑त्तरे॒ष्वहः॑ स्व॒मुतो॑ऽर्वाञ्चो॑ गृ॒ह्यन्ते॑ तस्मा॒दमु॒तो
 ऽर्वा॑ञ्च इ॒मे लो॒कास्तस्मा॑दया॒तयाम्नो॑ लो॒कान् मनु॑ष्या
 उप॑ जी॒वन्ति॑ ब्र॒ह्मवा॑दिनो॒ वदन्ति॑ कस्मा॒त् स॒त्याद॑द्भ्य ओष॒धयः॑
 सं भ॑वन्त्योष॒धयो - [] 17

TS 3.3.6.3

मनु॑ष्याणाम॒न्नं प्र॒जाप॑तिं प्र॒जा अनु॑ प्रजायन्त॒ इति॑ परान॒न्विति॑
 ब्रू॒याद्-यद्-गृ॒ह्णात्य॑द्भ्यस्त्वौष॒धीभ्यो॑ गृ॒ह्णामी॑ति॒ तस्मा॑दद्भ्य

ओष॑धयः॒ सं॒भ॒वन्ति॒ यद्-गृ॒ह्णा॒त्योष॑धी॒भ्यस्त्वा॒ प्र॒जा॒भ्यो॑ गृ॒ह्णामी॒ति॒
तस्मा॑दोष॑धयो म॒नु॒ष्या॒णाम॒न्नं॑ यद्-गृ॒ह्णा॒ति प्र॒जा॒भ्यस्त्वा॒
प्र॒जाप॑तये गृ॒ह्णामी॒ति॒ तस्मा॑त् प्र॒जाप॑तिं प्र॒जा अनु॑ प्र॒जाय॑न्ते ॥ 18

(अ॒भि॒जि॒त्यै - भ॒वन्त्योष॑धयो - ऽष्टा च॑त्वारि॒ंशच्च॑) (A6)

TS 3.3.7.1

प्र॒जाप॑तिर्दे॒वासु॒रान॑ सृ॒जत॑ तद॒नु य॒ज्ञोऽसृ॑ज्यत य॒ज्ञं छ॒न्दा॒ँसि॒
ते वि॒ष्वञ्चो॑ व्य॒क्राम॑न्थ् सोऽसु॒रान॑नु य॒ज्ञोऽपा॑क्रामद्-य॒ज्ञं छ॒न्दा॒ँसि॒
ते दे॒वा अ॑म॒न्यन्ता॒मी वा इ॒दम॑भू॒वन् यद्-व॒यञ् स्म॑ इति॒ ते
प्र॒जाप॑तिमु॒पाऽधा॑वन्थ् सोऽब्र॑वीत्-प्र॒जाप॑तिश्छ॒न्दसां॑ वी॒र्य॑मा॒दाय॒
तद्वः॑ प्र दा॒स्यामी॒ति स छ॒न्दसां॑ वी॒र्य॑ - [] 19

TS 3.3.7.2

मा॒दाय॒ तदे॒भ्यः प्रा॑यच्छत् तद॒नु छ॒न्दा॒ँस्यपा॑ऽक्रामन् छ॒न्दा॒ँसि॒
य॒ज्ञस्ततो॑ दे॒वा अ॑भवन् परा॒सुरा॑ य ए॒वं छ॒न्दसां॑ वी॒र्यं॑ वे॒दाऽऽ
श्रा॒वया॑ऽस्तु श्रौष॑ड् य॒ज ये य॒जाम॑हे वषट्का॒रो भ॑वत्यात्म॒ना परा॑ऽस्य॒

भ्रातृ॑व्यो भवति॑ ब्र॒ह्मवा॒दिनो॑ वदन्ति॒ कस्मै॒ कम॑ध्व॒र्युरा॑ श्रावय॒तीति॒
छन्द॑सां वी॒र्यायेति॑ ब्रूयादे॒ तद् वै - [] 20

TS 3.3.7.3

छन्द॑सां वी॒र्यमा॑ श्रावया॒ऽस्तु श्रौष॑ङ् यज॒ ये यजाम॑हे वषट्कारो
य ए॒वं वे॒द सवी॑र्यैरेव॒ छन्दो॑भिरर्चति॒ यत् किं॑ चार्चति॒ यदिन्द्रो॑
वृ॒त्रम॑हन्न-मे॒द्ध्यं तद्-यद्-यती॑नपावपद-मे॒द्ध्यं तदथ॑ कस्मा॑दैन्द्रो
य॒ज्ञ आ स॑ऽस्थातो॒रित्याहु॑रिन्द्रस्य॒ वा ए॒षा य॒ज्ञिया॑ तनूर्यद्-
य॒ज्ञस्तामे॒व त () द्यज॑न्ति॒ य ए॒वं वे॒दोपै॑नं य॒ज्ञो न॑मति ॥ 21

(छन्द॑सां वी॒र्यं - वा - ए॒व त - द॒ष्टौ च॑) (A7)

TS 3.3.8.1

आ॒युर्दा॑ अ॒ग्ने ह॒विषो॑ जुषा॒णो घृ॒तप्र॑तीको घृ॒तयो॑निरेधि ।
घृ॒तं पी॒त्वा मधु॑चारु॒ गव्यं॑ पि॒तेव॑पु॒त्रम॑भि रक्षतादि॒मं ॥
आ वृ॑श्च्यते॒ वा ए॒तद्-यज॑मानो॒ऽग्निभ्यां॑ य॒देन॑योः शृ॒तं
कृ॒त्याथा॑ऽन्यत्रा-वभृ॒थम॑वैत्यायु॒र्दा अ॒ग्ने ह॒विषो॑ जुषा॒ण

इ॒त्य॒व॒भृ॒थ॒म॒वै॒ष्यन् जु॒हु॒या॒दा॒हु॒त्यै॒वैनौ॑ श॒म॒य॒ति॒ नाऽऽ*॒र्ति॒मा॒च्छ॒ति॒
य॒ज॒मा॒नो॒ यत् कु॒सी॒द - [] 22

TS 3.3.8.2

म॒प्र॒ती॒त्तं म॒यि॒ येन॑ य॒म॒स्य॑ ब॒लि॒ना च॒रामि॑ ।
इ॒है॒व सन् नि॒र॒व॒द॒ये तदे॒तत् तद॒ग्ने अ॒नृ॒णो भ॒वामि॑ ।
वि॒श्व॒लो॒प वि॒श्व॒दा॒व॒स्य॑ त्वा ऽऽस॒ज्जु॒हो॒म्य॒ग्धा॒दे॒को ऽहु॒ता॒दे॒कः
स॒म॒स॒ना॒दे॒कः ।
ते॒नः कृ॒ण्वन्तु॑ भे॒ष॒ज॒ꣳ स॒दः स॒हो व॒रे॒ण्यं ॥
अ॒यं नो॒ न॒भ॒सा पु॒रः स॒ꣳस्फा॒नो अ॒भि र॒क्ष॒तु ।
गृ॒हा॒णा॒म॒स॒म॒त्यै ब॒हवो॑ नो गृ॒हा अ॒सन् ॥
स त्व॒न्नो - [] 23

TS 3.3.8.3

न॒भ॒स॒स्प॒त ऊ॒र्जं नो॑ धे॒हि भ॒द्र॒या ।
पु॒न॒र्नो न॒ष्ट॒मा कृ॒धि पु॒न॒र्नो र॒यि॒मा कृ॒धि ॥

दे॒व स॒ऽस्फान॑ सह॒स्रपोष॑स्ये॒शिषे॑ स नो रा॒स्वाऽज्या॑नि॒ऽ राय॑स्पोष॒ऽ
सु॒वीर्य॑ऽ सँव॒थ्सरी॑णा॒ऽ स्व॒स्तिं ॥

अ॒ग्नि॒र्वाव॑ य॒म इ॒यं य॒मी कु॑सी॒दं वा ए॒तद्-य॒मस्य॑ यज॑मान आ द॒त्ते
यदोष॑धीभिर्वेदि॒ऽ स्तृ॒णाति॑ यदनु॒पौष्य॑ प्रया॒याद्ग्री॑वब॒द्धमे॑न - [] 24

TS 3.3.8.4

म॒मुष्मिन् ँलो॒के ने॑नीये॒रन् यत् कु॑सी॒दम॑प्र॒तीत्तं म॑यीत्यु॒पौष॑ती॒हैव
सन् य॒मं कु॑सी॒दं नि॒रव॑दा॒यानृ॑णः सु॒वर्गं ँलो॒कमे॑ति॒यदि॑ मि॒श्रमि॑व
चरे॑दज्जलि॒ना स॒क्तून् प्र॒दाव्ये॑ जुहु॒यादे॑ष वा अ॒ग्निर्वै॑श्चा॒नरो॑ यत्
प्र॒दाव्यः॑ स ए॒वैन॑ऽस्वद॒यत्य॑ह्नां वि॒धान्या॑-मे॒काष्ट॑का॒याम॑पू॒षं चतुः॑
शरा॑वं प॒क्त्वा प्रा॒तरे॒तेन॑ कक्ष॒मुपौ॑षेद्यदि - [] 25

TS 3.3.8.5

द॒हति॑ पु॒ण्य॒समं॑ भव॒ति यदि॑ न द॒हति॑ पा॒पस॑ममे॒तेन॑ ह॒स्म वा ऋ॑षयः
पु॒रा वि॒ज्ञाने॑न दी॒र्घस॑त्रमु॒प यन्ति॑ यो वा उप॒द्रष्टा॑रमु॒प-
श्रो॒तार॑मनु॒ख्याता॑रं वि॒द्वान् यज॑ते स॒ममु॑ष्मिन् ँलो॒क इ॑ष्टापूर्ते॒न
गच्छ॑तेऽग्नि॒र्वा उप॒द्रष्टा॑ वा॒युरु॑पश्रो॒ता ऽऽदि॒त्योऽनु॑ख्या॒ता तान् य

ए॒वं वि॒द्वान् यज॑ते॒ सम॒मुष्मिन् लो॒क इ॒ष्टापूर्ते॑न गच्छ॑ते ऽयं
नो नभ॑सा पु॒र - [] 26

TS 3.3.8.6

इ॒त्याहा॒ग्निर्वै नभ॑सा पु॒रोऽग्नि॑मे॒व तदा॑है॒तन्मे गो॑पायेति॒ स त्वं नो॑
नभ॑सस्प॒त इ॒त्याह वा॒युर्वै नभ॑सस्प॒तिर्वा॒युमे॒व तदा॑है॒तन्मे गो॑पायेति॒
दे॒व स॒ऽस्फा॒नेत्या॑हाऽसौ वा आ॒दि॒त्यो दे॒वः स॒ऽस्फा॒न आ॒दि॒त्यमे॒व
तदा॑है॒तन्मे गो॑पायेति॒ ॥ 27

(कु॒सीदं - त्वं न - ए॒न - मो॒षेद्यदि॑ - पु॒र - आ॒दि॒त्यमे॒व तदा॑है
तन्मे गो॑पायेति) (A8)

TS 3.3.9.1

ए॒तं यु॒वानं॑ परि॒ वो द॑दामि॒ तेन॑ क्रीड॑न्तीश्चर॑त प्रि॒येण॑ ।
मा नः॑ शा॒प्त ज॒नुषा॑ सु॒भागा॑ रा॒यस्पो॑षेण॒ समि॑षा म॒देम॑ ॥
नमो॑ म॒हि॒म्न उ॒त च॑क्षु॒षे ते म॑रु॒तां पि॒तस्त॑दहं गृ॒णामि॑ ।
अनु॑ म॒न्यस्व सु॒यजा॑ यजाम॒ जुष्टं॑ दे॒वाना॑मि॒दमस्तु॑ ह॒व्यं ॥

दे॒वाना॑मे॒ष उप॑नाह आ॒सीद॒पां गर्भ॑ ओष॒धीषु॑ न्यक्तः ।

सोम॑स्य द्र॒प्सम॑वृणीत पू॒षा – [] 28

TS 3.3.9.2

बृ॒हन्न॑द्रि॒रभव॑त् तदे॒षां ॥

पि॒ता व॒थ्स॑नां पति॒रघ्निय॑ानामथो पि॒ता म॒हतां॑ गर्ग॒राणां॑ ।

व॒थ्सो ज॒रायु॑ प्रति॒धुक् पी॒यूष॑ आ॒मिक्षा॑ मस्तु घृ॒तम॑स्य रे॒तः ॥

त्वां गा॒वोऽवृ॑णत रा॒ज्याय॑ त्वा॒ꣳ ह॑वन्त मरु॒तः स्व॒र्काः ।

व॒र्ष्मन् क्ष॒त्रस्य॑ क॒कुभि॑ शिश्रि॒याण॑स्ततो न उ॒ग्रो वि भ॑जा वसू॒नि ॥

व्यृ॒द्धेन॑ वा ए॒ष प॒शुना॑ यज॒ते य॒स्यैता॑नि न क्रि॒यन्त॑ ए॒ष ()

ह त्वै॑ समृ॒द्धेन॑ यज॒ते य॒स्यैता॑नि क्रि॒यन्ते॑ ॥ 29

(पू॒षा – क्रि॒यन्त॑ ए॒षो – ऽष्टौ॑ च) (A9)

TS 3.3.10.1

सू॒र्यो दे॒वो दि॒विष॑द्भ्यो धा॒ता क्ष॒त्राय॑ वा॒युः प्र॒जाभ्यः॑ ।

बृ॒हस्प॑तिस्त्वा प्र॒जाप॑तये ज्योति॒ष्मतीं॑ जुहोतु ॥

यस्या॑स्ते ह॒रितो॑ गर्भो॒ऽथो यो॑निर्.हि॒रण्ययी॑ ।

अङ्गान्यहु॑ता यस्यै॑ तां दे॒वैः सम॑जीगमं ॥
 आ॒ वर्त॑न वर्तय॒ नि नि॑वर्तन वर्तयेन्द्र॑ नर्दबुद ।
 भूम्याश्च॑तस्रः प्र॒दिश॑स्ताभि॒रा वर्त॑या पुनः ॥
 वि ते॑ भिनद्मि॒ तकरीं॑ वि॒योनिं॑ वि॒ गवी॑न्यौ ।

वि – [] 30

TS 3.3.10.2

मा॒तर॒ञ्च पु॒त्रं च॒ वि गर्भं॑ च ज॒रायु॑ च ॥
 ब॒हिस्ते॑ अस्तु॒ बालि॑ति ॥
 उ॒रु॒द्र॒प्सो वि॒श्वरू॑प इ॒न्दुः प॒व॒मा॒नो धी॑र आ॒न॒ञ्ज गर्भं॑ ॥
 ए॒क॒प॒दी द्वि॑पदी त्रि॒प॒दी च॒तु॒ष्प॒दी प॒ञ्च॒प॒दी षट्प॑दी
 स॒प्त॒प॒द्य॒ष्टा॒प॒दी भु॒व॒नाऽनु॑ प्रथ॒ता स्वा॑हा ॥
 म॒ही द्यौः पृ॒थि॒वी च॒ न इ॒मं य॒ज्ञं मि॑मिक्षतां ।
 पि॒पृ॒ता॒न्नो भ॑रीमभिः ॥ 31

(ग॒वि॒न्यौ वि – च॒तु॒श्च॒त्वारि॑ञ्च) (A10)

TS 3.3.11.1

इ॒दं वा॑मा॒स्ये ह॒विः प्रि॒यमिन्द्रा॑बृहस्पती ।

उ॒क्थं म॒दश्च॑ शस्यते ॥

अ॒यं वा॑ परि॒ षिच्य॑ते सोम॑इन्द्राबृहस्पती ।

चा॒रु॒र्मदा॑य पी॒तये॑ ॥

अ॒स्मे इन्द्रा॑बृहस्पती रयिं॑ ध॒त्तं श॑त॒ग्विनं॑ ॥

अ॒श्वाव॑न्तं सह॒स्रिणं॑ ॥

बृ॒हस्प॑तिर्नः परि॒पातु॑ प॒श्चादु॒तोत्तर॑स्मा॒दध॑रा॒दघा॑योः ।

इन्द्रः॑ पु॒रस्ता॑दु॒त म॑द्ध्यतो नः सखा॑ स॒खिभ्यो॑ वरि॒वः कृ॑णोतु ॥

वि ते॒ विष्व॒ग्वात॑जूतासो अ॒ग्ने भा॑मा॒सः – [] 32

TS 3.3.11.2

शु॒चे शु॒चय॑श्चरन्ति ।

तु॒वि॒म्रक्षा॑सो दि॒व्या न॑व॒ग्वा व॑ना वनन्ति धृ॒षता॑ रु॒जन्तः॑ ॥

त्वा॒मग्ने॑ मा॒नुषी॑रीडते वि॒शो हो॒त्रावि॒दं वि॒विचि॑ र॒त्नधा॑त॒मं ।

गुहा॑ सन्तं सु॒भग॑ वि॒श्वदर्श॑तं तु वि॒ष्मण॑सं सु॒यजं॑ घृ॒तश्रियं॑ ॥

धा॒ता द॑दातु॒ नो र॒यिमी॑शा॒नो ज॒गत॑स्पतिः ।

स नः॑ पू॒र्णेन॑ वाव॒नत् ॥

धा॒ता प्र॒जाया॑ उ॒त रा॒य ई॒शे धा॒तेदं॑ वि॒श्वं भु॑वनं ज॒जान॑ ।

धा॒ता पु॒त्रं य॑ज॒मानाय॑ दा॒ता – [] 33

TS 3.3.11.3

तस्मा॑ उ॒ ह॒व्यं घृ॑तव॒द्विधे॑म ॥

धा॒ता द॑दातु॒ नो र॒यिं प्रा॒चीं जी॒वातु॑म॒क्षितां॑ ।

व॒यं दे॒वस्य॑ धी॒महि॑ सु॒मति॑ꣳ स॒त्यरा॑धसः ॥

धा॒ता द॑दातु॒ दा॒शुषे॑ व॒सूनि॑ प्र॒जाका॑माय मी॒ढुषे॑ दुरो॒णे ।

तस्मै॑ दे॒वा अ॒मृताः॑ सँव्य॒यन्तां॑ वि॒श्वे दे॒वासो॑ अ॒दि॒तिः स॒जोषाः॑ ॥

अ॒नु नोऽद्याऽनु॑मतिर्य॒ज्ञं दे॒वेषु॑ म॒न्यतां॑ ।

अ॒ग्निश्च॑ ह॒व्यवा॑ह॒नो भ॑वतां दा॒शुषे॑ म॒यः ॥

अ॒न्विद॑नु॒मते॒ त्वं – [] 34

TS 3.3.11.4

म॒न्यासै॑ श॒ञ्चनः॑ कृ॒धि ।
 क्र॒त्वे द॒क्षाय॑ नो हि॒नु प्र॒ण आ॒यूँषि॑ तारिषः ॥
 अनु॑ म॒न्यता-म॒नुम॑न्यमा॒ना प्र॒जाव॑न्तँ र॒यिम॑क्षीयमा॒णं ।
 तस्यै॑ व॒यँ हे॒डसि॑ मा॒ऽपि भू॒म सा नो॑ दे॒वी सु॒हवा॑ श॒र्म य॑च्छतु ॥
 यस्या॑मिदं प्र॒दिशि॑ यद्वि॒रोच॑तेऽनु॒मतिं॑ प्र॒ति भू॑षन्त्या॒यवः॑ ।
 यस्या॑ उ॒पस्थ॑ उ॒र्वन्त॑रि॒क्षँ सा नो॑ दे॒वी सु॒हवा॑
 श॒र्म य॑च्छतु ॥ 35

TS 3.3.11.5

रा॒काम॑हँ सु॒हवाँ सु॒ष्टुती॑ हु॒वे शृ॑णोतु नः सु॒भगा॑ बो॒धतु॑ त्मना॑ ॥
 सी॒व्यत्व॑पः सू॒च्याऽच्छि॑द्यमा॒नया॑ ददातु वी॒रँ श॒तदा॑यमु॒क्थ्यं ॥
 यास्ते॑ रा॒के सु॒मतयः॑ सु॒पेश॑सो याभि॒र्ददा॑सि दा॒शुषे॑ वसू॒नि ।
 ताभि॑र्नो अ॒द्य सु॒मना॑ उ॒पाग॑हि स॒हस्र॑पोषँ सु॒भगे॑ ररा॒णा ॥
 सि॒नीवा॑लि >¹, या सु॒पाणिः॑ >² ॥
 कु॒हूम॑हँ सु॒भगां वि॒द्वना॑पस॒मस्मिन् य॒ज्ञे सु॒हवां॑ जो॒हवी॑मि ।

सा नो ददातु श्रवणं () पितॄणां तस्यास्ते देवि हविषा विधेम ॥

कुहू-देवानाममृतस्य पत्नी हव्या नो अस्य हविषश्चिकेतु ।

सं दाशुषे किरतु भूरि वामं रायस्पोषं चिकितुषे दधातु ॥ 36

(भामासो - दाता - त्व - मन्तरिक्षं सा नो देवी सुहवा शर्म

यच्छतु - श्रवणं - चतुर्विंशतिश्च) (A11)

Prasna Korvai with starting Padams of 1 to 11 Anuvaakams :-

(अग्ने॑ तेज॑स्विन् - वा॒यु - र्वस॑वस्त् - वैत॑द्वा अ॒पां - वा॒युर॑सि
प्रा॒णो ना॑म - दे॒वा वै यद्य॑ज्ञेन॒न - प्र॒जाप॑ति दे॒वासु॑रा - ना॒युर्दा -
ए॒तं यु॑वा॒नꣳ - सूर्यो॑ दे॒व - इ॒दं वा - मेका॑दश)

Korvai with starting Padams of 1, 11, 21 Series of Panchaatis :-

(अग्ने॑ तेज॑स्विन् - वा॒युर॑सि - छ॒न्दसां॑ वी॒र्यं - मा॒तर॑ञ्च -
षट्त्रिं॑शत्)

First and Last Padam of Third Prasnam of Kanda 3 :-

(अग्ने॑ तेज॑स्विꣳ - श्रि॒कितु॑षे दधातु)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां तृतीयकाण्डे तृतीयः प्रश्नः समाप्तः ॥

3.3.1 Appendix

3.3.11.5 – सिनी॑वालि > ¹, या सु॑पाणिः > ²

सिनी॑वालि पृथु॑ष्टुके॒ या दे॒वाना॑मसि॒ स्वसा॑ ॥

जुष॑स्व ह॒व्य माहु॑तं प्र॒जां दे॒वि दिदि॑ड्ढि नः ॥

या सु॑पाणिः स्व॒ङ्गुरिः सु॒षूमा॑ बहु॒सूवरी॑ ।

तस्यै॑ वि॒श्व॒न्नियै॑ ह॒विः सिनी॑वा॒ल्यै जु॑होतन ॥

(Appearing in TS- 3.1.11.4)

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3.4 तृतीयकाण्डे चतुर्थः प्रश्नः – इष्टिहोमाभिधानं

TS 3.4.1.1

वि वा ए॒तस्य॑ य॒ज्ञ ऋ॑द्ध्यते॒ यस्य॑ ह॒विर॑तिरिच्यते॒ सूर्यो॑ दे॒वो
दि॒विष॑द्भ्य॒ इत्या॑ह॒ बृह॑स्पति॒ना चै॒वास्य॑ प्र॒जाप॑ति॒ना च॒ यज्ञ॑स्य
व्यृ॒द्धम॑पि॒ वप॑ति॒ रक्षा॑ँसि॒ वा ए॒तत् प॑शुँ॒ सच॑न्ते॒ यदे॑कदे॒वत्य॑
आल॑ब्धो॒ भूया॑न् भवति॒ यस्या॑स्ते॒ हरि॑तो॒ गर्भ॑ इत्या॑ह॒ देव॑त्रै॒वैनां॑
गम॑यति॒ रक्ष॑साम॒पह॑त्या॒ आ वर्त॑न॒ वर्त॑येत्या॑ह – [] 1

TS 3.4.1.2

ब्र॒ह्मणै॒वैन॑मा॒ वर्त॑यति॒ वि ते॑ भि॒नद्भि॑ त॒करी॑मित्या॑ह॒ यथा॑य॒जुरे॒वैत॑दु-
रु॒द्रप्सो॑ वि॒श्वरू॑प॒ इन्दु॑रित्या॑ह॒ प्र॒जा वै प॑शव॒ इन्दुः॑ प्र॒जयै॒वैनं॑
प॒शुभिः॑ स॒मर्ध॑यति॒ दिवं॑ वै॒ यज्ञ॑स्य॒ व्यृ॒द्धं ग॑च्छति॒ पृथि॑वीमतिरिक्तं॒
तद्य॑न्न॒ शम॑येदा॒र्तिमा॑च्छेद्-य॒जमा॑नो॒ मही॑ द्यौः॒ पृथि॑वीच॒ न
इत्या॑ – [] 2

TS 3.4.1.3

ह॒ द्या॒वापृ॒थि॒वीभ्या॑मे॒व य॒ज्ञस्य॑ व्यृ॒द्धं चाति॑रिक्तं च शमयति
 नाऽऽ*ति॑माच्छति॒ यज॑मानो भस्म॒नाऽभि॑ समू॒हति॑ स्व॒गाकृ॑त्या अथो
 अनयो॒र्वा ए॒ष गर्भो॑ऽनयो॒रेवैनं॑ दधाति॒ यद॑वद्येदति॒ तद्रे॑चयेद्यन्नावद्येत्
 प॒शो॒राल॑ब्धस्य नाव॒ द्येत् पु॒रस्ता॒न्नाभ्या॑ अन्यद॑वद्येदुपरि॒ष्टादन्यत्
 पु॒रस्ता॒द्वै नाभ्यै॑ – [] 3

TS 3.4.1.4

प्रा॒ण उप॑रि॒ष्टाद॑पानो या॒वाने॒व प॒शुस्त॑स्याव॒ द्यति॑ वि॒ष्णवे॑ शि॒पिवि॑ष्टाय
 जुहोति॒ यद्वै य॒ज्ञस्या॑तिरिच्यते॒ यः प॒शोर्भू॑मा या पु॒ष्टिस्तद्-वि॑ष्णुः
 शि॒पिवि॑ष्टो ऽति॑रिक्त ए॒वाति॑रिक्तं दधात्यतिरिक्तस्य शान्त्या
 अ॒ष्टाप्रू॒ङ्ढि॑रण्यं दक्षि॒णाऽष्टा॑पदी ह्येषा ऽऽत्मा नवमः प॒शो॒राप्त्या॑
 अन्तर॑को॒श उ॒ष्णीषे॑णाऽऽ*वि॒ष्टितं॑ भवत्ये॒वमि॑व हि प॒शुरु॑ल्बमि॒व ()
 च॒र्म॑व मा॒ऽसमि॑वास्थी॒व या॒वाने॒व प॒शुस्त॑माप॒त्वाऽव॑ रुन्धे॒यस्यै॑षा
 य॒ज्ञे प्रा॑यश्चित्तिः क्रि॒यत॑ इ॒ष्ट्वा व॑सीयान् भवति ॥ 4

(व॒र्तय॑त्याह-न इति-वै नाभ्या-उल्बमि॒वै-क॑वि॒ऽशति॑श्च) (A1)

TS 3.4.2.1

आ वा॒यो भू॒ष शु॒चिपा॒ उप॒ नः स॒हस्रं॑ ते नि॒युतो॑ वि॒श्ववार॑ ।
 उपो॑ ते अ॒न्धो म॒द्यम॑यामि यस्य दे॒व दधि॑षे ॥ पूर्व॒पेयं॑ ॥
 आकू॒त्यै त्वा का॒माय॑ त्वा स॒मृधे॑ त्वा कि॒क्किटा॑ ते म॒नः प्र॒जाप॑तये
 स्वाहा॑ कि॒क्किटा॑ ते प्रा॒णं वा॒यवे॑ स्वाहा॑ कि॒क्किटा॑ ते चक्षुः॑ सू॒र्याय॑
 स्वाहा॑ कि॒क्किटा॑ ते श्रो॒त्रं द्या॒वापृ॑थि॒वीभ्या॑ स्वाहा॑ कि॒क्किटा॑ ते
 वाच॑ सर॒स्वत्यै॑ स्वाहा – [] 5

TS 3.4.2.2

त्वं तुरी॒या व॒शिनी॑ व॒शाऽसि॑ स॒कृद्यत्॑ त्वा म॒नसा॑ गर्भं आऽश॑यत् ।
 व॒शा त्वं वा॒शिनी॑ गच्छ दे॒वान्थ्-स॒त्याः स॒न्तु यज॑मानस्य का॒माः ॥
 अजा॑ऽसि रयि॒ष्ठा पृ॑थि॒व्या सी॒दोर्ध्वाऽन्तरि॑क्षमु॒प तिष्ठ॑स्व
 दि॒वि ते बृ॒हद्भाः॑ ॥
 तन्तुं॑ त॒न्वन् रज॑सो भा॒नुम॑न्विहि ज्योति॑ष्मतः प॒थो रक्ष॑ धि॒या कृ॑तान् ॥
 अनु॒ल्बणं॑ वा॒यत॑ जो॒गुवा॑मपो म॒नु () भ॑व ज॒नया॑ दै॒व्यं ज॒नं ॥
 म॒नसो॑ ह॒विर॑सि प्र॒जाप॑तेर्वर्णो॒ गात्रा॑णां ते गा॒त्रभा॑जो भू॒यास्म ॥ 6

(सर॒स्वत्यै॑ स्वाहा – म॒नु – स्त्रयो॑दश च) (A2)

TS 3.4.3.1

इ॒मे वै स॒हाऽऽ*स्तां॑ ते वा॒युर्व्य॑वा॒त् ते गर्भ॑म॒दधा॑तां त॒ꣳ सोमः॑
 प्रा॒ज॒न॒य-द॒ग्नि॑र॒ग्र॒स॒त स ए॒तं प्र॒जा॒प॒ति॑र॒ग्ने॒य-म॒ष्टा॑क॒पा॒ल॒म॒प॒श्य॑त् तं
 नि॒र॒व॒प॒त् ते॒नै॒वैना॑म॒ग्ने॒र॒धि नि॒र॒क्री॑णा॒त् तस्मा॑द॒प्य॒न्य॒दे॒व॒त्या॒मा॒ल॒भ॒मा॒न
 आ॒ग्ने॒य॒म॒ष्टा॑क॒पा॒लं पु॒र॒स्ता॒न्नि॒र्व॒पे॒द॒ग्ने॒रे॒वैना॑म॒धि
 नि॒ष्क्री॑याऽऽल॒भ॒ते यद् - [] 7

TS 3.4.3.2

वा॒युर्व्य॑वा॒त् तस्मा॑द्-वा॒य॒व्या॑ य॒दि॒मे गर्भ॑म॒दधा॑तां तस्मा॑द्-
 द्या॒वा॒पृ॒थि॒व्या॑ य॒थ् सोमः॑ प्रा॒ज॒न॒य॒द॒ग्नि॑र॒ग्र॒स॒त तस्मा॑द॒ग्नी॒षो॒मी॒या
 य॒द॒न॒योर्वि॒य॒त्योर्वा॑ग॒व॒द॒त् तस्मा॑त् सा॒र॒स्व॒ती य॒त् प्र॒जा॒प॒ति॑र॒ग्ने॒र॒धि
 नि॒र॒क्री॑णा॒त् तस्मा॑त् प्रा॒जा॒प॒त्या सा॒ वा ए॒षा स॑र्व॒दे॒व॒त्या॑ य॒द॒जा व॒शा
 वा॒य॒व्या॒मा ल॒भे॒त भू॑ति॒कामो॑ वा॒युर्वै॑ क्षे॒पि॒ष्ठा दे॒वता॑ वा॒यु॒मे॒व
 स्वे॒न- [] 8

TS 3.4.3.3

भा॒ग॒धे॒ये॒नो॒प धा॑व॒ति स ए॒वैनं॑ भू॒तिं ग॑म॒य॒ति द्या॒वा॒पृ॒थि॒व्या॒मा ल॒भे॒त
 कृ॒ष॒मा॒णः प्र॒ति॒ष्ठा॒कामो॑ दि॒व ए॒वा॒स्मै प॒र्जन्यो॑ व॒र्ष॒ति व्य॑स्या॒मोष॑ध॒यो

रो॒हन्ति॑ सम॒र्धु॑कमस्य॒ सस्यं॑ भवत्यग्नी॒षोमी॒यामा॑ ल॒भेत॑ यः
 काम॒येता॒न्नवान॒न्नादः॑ स्या॒मित्य॒ग्निनै॒वान्न॒मव॑ रुन्धे
 सोमे॒नान्नाद्य॑-म॒न्नवाने॒वान्नादो॑ भवति॒ सार॒स्वती॒मा ल॒भेत॑ य - [] 9

TS 3.4.3.4

ई॒श्वरो॑ वा॒चो व॒दितोः॑ सन् वा॒चं न॒वदे॒द्-वा॒ग्वै सर॑स्वती॒ सर॑स्वतीमे॒व
 स्वेन॑ भा॒गधे॒येनो॒प धा॒वति॑ सैवा॒स्मिन् वा॒चं द॒धाति॑ प्रा॒जाप॑त्यामा
 ल॒भेत॑ यः काम॒येता॒नभि॒जित॑म॒भि ज॒येय॑मि॒ति प्र॒जाप॑तिः सर्वा॑ दे॒वता॑
 दे॒वता॑भिरे॒वा-न॒भिजित॑म॒भि ज॒यति॑ वा॒यव्य॑योपा॒करो॑ति
 वा॒योरे॒वैना॒मव॒रुद्ध्य॑ऽऽ*ल॒भत॑ आ॒कूत्यै॑ त्वा॒ कामा॑य॒ त्वे - [] 10

TS 3.4.3.5

त्या॒ह यथा॑य॒जुरे॒वैतत्॑ कि॒क्कि॒टाका॑रं जु॒होति॑ कि॒क्कि॒टाका॑रेण॒ वै ग्रा॒म्याः
 प॒शवो॑ र॒मन्ते॑ प्रा॒ऽऽ*र॒ण्याः प॑तन्ति॒ यत् कि॒क्कि॒टाका॑रं जु॒होति॑
 ग्रा॒म्याणां॑ प॒शूनां॑ धृ॒त्यै पर्य॑ग्नौ क्रि॒यमा॑णे जु॒होति॑ जी॒वन्ती॑मे॒वैना॑ꣳ
 सु॒वर्गं॑ लो॒कं ग॑मयति॒ त्वं तु॒रीया॑ व॒शिनी॑ व॒शाऽसी॑त्या॒ह दे॒वत्रै॒वैनां॑
 ग॑मयति॒ स॒त्याः स॒न्तु य॑ज॒मान॑स्य॒ कामा॑ इ॒त्याहै॒ष वै कामो॑ -[] 11

TS 3.4.3.6

यज॑मानस्य॑ यद॒नार्त॑ उ॒दृचं॑ गच्छति॑ तस्मा॑दे॒वमा॑हाऽजाऽसि॑ रयि॒ष्ठेत्या॑है
 ष्वे॒वैनां॑ लो॒केषु॑ प्रति॒ष्ठाप॑यति दि॒वि ते बृ॑हद्वा इत्या॑ह सु॒वर्ग॑ ए॒वास्मै॑
 लो॒के ज्योति॑र् दधाति॑ तन्तुं॑ तन्वन् रज॑सो भानु॑मन्विहीत्या॑हे॒माने॒वास्मै॑
 लो॒कान् ज्योति॑ष्मतः करोत्यनु॒ल्बणं॑ वयत॑ जोगु॑वामप॒ इत्या॑- [] 12

TS 3.4.3.7

-ह॒ यदे॒व य॒ज्ञ उ॒ल्बणं॑ क्रि॒यते॑ तस्यै॒वैषा॑ शान्ति॒र्मनु॑र्भव
 जन॑या दै॒व्यं जन॑मित्या॑ह मान॒व्यो वै प्र॒जास्ता॑ ए॒वाऽऽ*द्याः॑
 कुरु॑ते मन॒सो ह॒विर॒सीत्या॑ह स्व॒गाकृ॑त्यै गात्रा॑णां ते गात्र॒भाजो॑
 भूया॑स्मेत्या॑हाऽऽ*शि॒षमे॒वैता॑मा शा॒स्ते तस्यै॒ वा ए॒तस्या॑
 ए॒कमे॒वा-दे॒वय॑जनं॑ य॒दाल॑ब्धायाम॒भ्रो - [] 13

TS 3.4.3.8

भव॑ति य॒दाल॑ब्धायाम॒भ्रः स्या॑द॒प्सु वा॑प्र॒वेश॑येथ् सर्वा॑ वा
 प्रा॒ञ्जीया॑द्य॒दप्सु॑ प्र॒वेश॑येद्य॒ज्ञवे॑शसं कुर्या॑थ् सर्वा॑मे॒व
 प्रा॒ञ्जीया॑दिन्द्रि॒यमे॒वाऽऽ*त्मन्॑ धत् ते सा॒ वा ए॒षा त्र॑या॒णामे॒वाव॑

रुद्धा सँवथ्सरसदः सहस्रयाजिनो गृहमेधिनस्त एवैतया
यजेरन् तेषामेवैषाऽऽप्ता ॥ 14

(यथ् - स्वेन - सारस्वतीमा लभेत यः - कामाय त्वा - कामो -
ऽप इत्य - श्रो - द्विचत्वारिंशच्च) (A3)

TS 3.4.4.1

चित्तं च चित्तिश्चा ऽऽ*कूतं चाऽऽ*कूतिश्च विज्ञातं च विज्ञानं च
मनश्च शक्वरीश्च दर्शश्च पूर्णमासश्च बृहच्च रथन्तरं च
प्रजापतिर्जयानिन्द्राय वृष्णे प्रायच्छदुग्रः पृतनाज्येषु तस्मै विशः
समनमन्त सर्वाः स उग्रः सहि हव्यो बभूवदेवासुराः सँयत्ता
आसन्थ्स इन्द्रः प्रजापतिमुपा () धावत् तस्मा एताज्जयान्
प्रायच्छत् तानजुहोत् ततो वै देवा असुरानजयन् यदजयन् तज्जयानां
जयत्वञ् स्पदर्धमानेनैते होतव्या जयत्येव तां पृतनां ॥ 15

(उप - पञ्चविंशतिश्च) (A4)

TS 3.4.5.1

अ॒ग्नि॒र्भू॒ताना॒मधि॒पतिः॑ समा॒ऽव॒त्विन्द्रो॑ ज्ये॒ष्ठानां॑ ँ॒यमः॑ पृ॒थि॒व्या
वा॒युर॒न्तरि॑क्षस्य॒ सूर्यो॑ दि॒वश्च॒न्द्रमा॒ नक्ष॑त्राणां बृ॒हस्प॑तिर्ब्र॒ह्म॒णो
मि॒त्रः स॒त्यानां॑ ँ॒वरु॑णो॒ऽपा॒ꣳ समु॒द्रः स्रो॒त्याना॒मन्न॑ꣳ
सा॒म्राज्या॒नामधि॑पति॒ तन्मा॑ऽवतु॒ सोम॒ ओष॑धीनाꣳ स॒विता॑ प्र॒स॒वानाꣳ
रु॒द्रः प॑शूनां त्वष्टा रू॒पाणां॑ ँ॒विष्णुः॑ पर्व॒तानां॑ म॒रुतो॑
ग॒णाना॒मधि॑पतयस्ते मा॒वन्तु॑ पि॒तरः॑ पि॒ताम॒हाः परे॑ऽवरे ()
॥ त॒तास्त॒ताम॒हा इ॒ह मा॑ऽवत ।

अ॒स्मिन् ब्र॑ह्मन् अ॒स्मिन् क्ष॒त्रेऽस्या॑-मा॒शिष्य॑स्यां पु॒रोधा॒याम॒स्मिन्-
क॒र्मन्त्र॑स्यां दे॒वहू॑त्यां ॥ 16 (अ॒वरे॑ - स॒प्तद॑श च) (A5)

TS 3.4.6.1

दे॒वा वै यद्य॒ज्ञेऽकु॑र्वत॒ तद॑सुरा अकुर्वत॒ ते दे॒वा
ए॒तान॑भ्याता॒नान॑पश्यन्- ता॒नभ्या॑तन्वत॒ यद्दे॒वानां॑ क॒र्माऽऽ*सी॒दाद॑र्ध्यत॒
तद्य॑दसुराणां न तदा॑द॒र्ध्यत॒ येन॑ क॒र्मणे॑थर्सेत् तत्र हो॒तव्या॑ ऋ॒द्ध्नो॒त्येव॑

तेन कर्मणा यद्विश्वे देवाः समभरन् तस्मादभ्याताना वैश्वदेवायत्-
प्रजापतिर्जयान् प्रायच्छत् तस्माज्जयाः प्राजापत्या - [] 17

TS 3.4.6.2

यद्-राष्ट्रभृद्भी राष्ट्रमाऽददत् तद्-राष्ट्रभृतां राष्ट्रभृत्त्वं ते देवा
अभ्यातानैरसुरानभ्यातन्वत् जयैरजयन्-राष्ट्रभृद्भी राष्ट्रमाऽददत्
यद्देवा अभ्यातानैरसुरानभ्यातन्वत् तदभ्यातानानामभ्यातानत्वं
यज्जयैरजयन् तज्जयानां जयत्वं यद्-राष्ट्रभृद्भी राष्ट्रमाऽददत्
तद्-राष्ट्रभृतां राष्ट्रभृत्त्वं ततो देवा अभवन् पराऽसुरा यो
भ्रातृव्यवान् स्यात् स () एतान् जुहुयादभ्यातानैरेव
भ्रातृव्यानभ्यातनुते जयैर्जयति राष्ट्रभृद्भी राष्ट्रमा दत्ते भवत्यात्मना
पराऽस्य भ्रातृव्यो भवति ॥ 18 (प्राजापत्याः-सौऽष्टा दश च) (A6)

TS 3.4.7.1

ऋताषाड् ऋतधामाऽग्नि-गन्धर्वस्त-स्यौषधयोऽप्सरस ऊर्जो नाम
स इदं ब्रह्म क्षत्रं पातु ता इदं ब्रह्म क्षत्रं पान्तु तस्मै स्वाहा ताभ्यः
स्वाहा संहितो विश्वसामा सूर्यो गन्धर्व-स्तस्य मरीचयोऽप्सरस
आयुवः सुषुम्नः सूर्य रश्मि-श्चन्द्रमा गन्धर्व-स्तस्य नक्षत्राण्य-

फ॒सर॒सो बे॒कुर॒योभु॒ज्युः सु॒पर्णो॑ य॒ज्ञो ग॒न्धर्व॑-स्तस्य दक्षिणा
अ॒प्सर॒स स्त॒वाः प्र॒जाप॑ति-वि॒श्वकर्मा॑ मनो - [] 19

TS 3.4.7.2

ग॒न्धर्व॑स्तस्यर्ख् सामान्य-फ॒सर॒सो वह॑यइषिरो वि॒श्वव्य॑चा वातो
ग॒न्धर्व॑-स्तस्याऽऽ*पो॑ ऽफ॒सर॒सो मु॒दाभु॑वनस्य पते यस्यत
उ॒परि॑ गृ॒हा इ॒ह च॑ ।

स नो॑ रा॒स्वाज्या॑निꣳ रा॒यस्पोषꣳ सु॒वीर्यꣳ संवँ॑त्सरीणाꣳ स्व॒स्तिं ॥
पर॑मेष्ठ्यधिपति-मृ॒त्युर् ग॒न्धर्व॑-स्तस्य वि॒श्वम॑प्सरसो भुवः सु॒क्षितिः-
सु॒भूति॑-र्भद्र॒कृत् सु॑व॒र्वान् पर्ज॑न्यो ग॒न्धर्व॑-स्तस्य वि॒द्युतो॑ ऽफ॒सर॒सो
रु॒चो दू॒रे हे॑तिर-मृ॒डयो॑ - [] 20

TS 3.4.7.3

मृ॒त्युर्ग॒न्धर्व॑-स्तस्य प्र॒जा अ॑प्सरसो भीरुवश्चारुः कृ॒पण॑ का॒शी
का॒मो ग॒न्धर्व॑-स्तस्याधयो॑ ऽफ॒सर॒सः शो॒चय॑न्तीर्नाम स इ॒दं ब्र॑ह्म
क्ष॒त्रं पा॑तु ता इ॒दं ब्र॑ह्म क्ष॒त्रं पा॑न्तु तस्मै स्वाहा ताभ्यः स्वाहा स
नो॑ भुवनस्य पते यस्यत उ॒परि॑ गृ॒हा इ॒ह च॑ ।

उ॒रु ब्र॒ह्म॒णेऽस्मै॑ क्ष॒त्राय॑ म॒हि श॒र्म य॒च्छ ॥ 21

(म॒नो – ऽमृ॒डयः॑ – षट्च॒त्वारि॑ंशच्च) (A7)

TS 3.4.8.1

रा॒ष्ट्रका॒माय॑ हो॒तव्या॑ रा॒ष्ट्रं वै ॥ रा॒ष्ट्रभृ॑तो रा॒ष्ट्रेणै॒वास्मै॑ रा॒ष्ट्रम॑व रु॒न्धे
रा॒ष्ट्रमे॒व भ॑वत्या॒त्मने॑ हो॒तव्या॑ रा॒ष्ट्रं वै ॥ रा॒ष्ट्रभृ॑तो रा॒ष्ट्रं प्र॒जा रा॒ष्ट्रं प॒शवो॑
रा॒ष्ट्रं यँ॑च्छ्रे॒ष्ठो भ॑वति रा॒ष्ट्रेणै॒व रा॒ष्ट्रम॑व रु॒न्धे व॑सिष्ठः स॒माना॑नां भ॑वति
ग्रा॒मका॒माय॑ हो॒तव्या॑ रा॒ष्ट्रं वै ॥ रा॒ष्ट्रभृ॑तो रा॒ष्ट्रं स॑जा॒ता रा॒ष्ट्रेणै॒वास्मै॑
रा॒ष्ट्रं स॑जा॒तान॑व रु॒न्धे ग्रा॒म्ये – [] 22

TS 3.4.8.2

–व भ॑वत्यधि॒देव॑ने जुहोत्यधि॒देव॑न ए॒वास्मै॑ सजा॒तान॑व रु॒न्धे
त ए॒नम॑वरु॒द्धा उप॑ तिष्ठन्ते रथ॒मुख॑ ओज॒स्काम॑स्य हो॒तव्या॑ ओजो॒ वै
॥ रा॒ष्ट्रभृ॑त ओजो॒ रथ॑ ओज॒सैवा॑स्मा ओजो॒ऽव रु॒न्ध ओज॑स्व्ये॒व भ॑वति
यो रा॒ष्ट्राद॑प॒भूतः॑ स्यात् तस्मै॑ हो॒तव्या॑ याव॑न्तोऽस्य रथाः स्यु॒स्तान्
ब्रू॑याद् यु॒ङ्ध्वमि॑ति रा॒ष्ट्रमे॒वास्मै॑ यु॒नक्त्या॑ – [] 23

TS 3.4.8.3

हु॒तयो॒ वा ए॒तस्याक्लृ॑प्ता॒ यस्य॑ रा॒ष्ट्रं न क॑ल्पते॒ स्वर॑थस्य॒ दक्षि॑णं
च॒क्रं प्र॑वृ॒ह्य ना॒डीम॑भि जुहु॒यादाहु॑तीरे॒वास्य॑ क॒ल्पय॑ति ता अ॒स्य
क॒ल्पमा॑ना रा॒ष्ट्रम॑नु क॒ल्पते॒ संग्रामे॑ सँय॑त्ते हो॒तव्या॑ रा॒ष्ट्रं वै
॥ रा॒ष्ट्रभृ॑तो रा॒ष्ट्रे ख॒लु वा ए॒ते व्या॑यच्छन्ते॒ ये सङ्ग्रा॑मं सं य॑न्ति
यस्य॑ पूर्॒वस्य॑ जुह्व॑ति स ए॒व भ॑वति॒ जय॑ति तं सं॒ग्रामं॑ मा॒न्धुक॑

इ॒द्धो- [] 24

TS 3.4.8.4

भ॒वत्य॑ङ्गारा ए॒व प्र॑ति॒वेष्ट॑माना अ॒मित्रा॑णाम॒स्य से॒नां
प्र॑ति॒वेष्ट॑यन्ति॒ य उ॒न्माद्ये॑त् तस्मै॑ हो॒तव्या॑ ग॒न्धर्वा॑प्सर॒सो वा
ए॒तमु॒न्माद॑यन्ति॒ य उ॒न्माद्य॑त्येते॒ खलु॑ वै ग॒न्धर्वा॑प्सर॒सो
॥ य॒द्राष्ट्र॑भृ॒तस्तस्मै॑ स्वा॒हा ताभ्यः॑ स्वा॒हेति॑ जुहो॒ति तेनै॒वैना॑ञ्छम॑यति
नै॒यग्रो॑ध औ॒दुम्बर॑ आ॒श्वत्थः॑ प्लाक्ष॒ इती॑द्धो भ॒वत्ये॑ते वै
ग॒न्धर्वा॑प्सर॒सां गृ॒हाः स्व॑ ए॒वैना॑ - [] 25

TS 3.4.8.5

ना॒य॒त॒ने॒ श॒म॒य॒त्य॒भि॒च॒र॒ता॒ प्र॒ति॒लो॒म॒ꣳ हो॒त॒व्याः॑ प्रा॒णा॒ने॒वा॒स्य॑
 प्र॒ती॒चः॑ प्र॒ति॒ यौ॒ति॒ तं॒ ततो॑ ये॒न॒ के॒न॒ च॒ स्तृ॒णु॒ते॒ स्व॒कृ॒त॒ इ॒रि॒णे॑
 जु॒हो॒ति॒ प्र॒द॒रे॒ वै॒त॒द्वा॒ अ॒स्यै॑ निर्॒ऋ॒ति॒गृ॒ही॒तं॒ निर्॒ऋ॒ति॒गृ॒ही॒त॒ ए॒वैनं॑
 निर्॒ऋ॒त्या॒ ग्रा॒ह॒य॒ति॒ य॒द्वा॒चः॑ कू॒रं॒ ते॒न॒ व॒षट्॑ करो॒ति॒ वा॒च॒ ए॒वैनं॑ कू॒रेण॑
 प्र॒वृ॒श्च॒ति॒ ता॒ज॒गा॒र्ति॒मा॒च्छ॒ति॒ यस्य॑ का॒म॒ये॒ता॒न्ना॒द्य॒ – [] 26

TS 3.4.8.6

मा॒ द॒दी॒ये॒ति॒ तस्य॑ स॒भा॒या॒मु॒त्ता॒नो॑ नि॒प॒द्य॒ भु॒व॒न॒स्य॑ प॒त॒ इति॑
 तृ॒णा॒नि॒ सं॒ गृ॒ह्णी॒यात्॑ प्र॒जा॒प॒ति॒र्वै॑ भु॒व॒न॒स्य॑ प॒तिः॑
 प्र॒जा॒प॒ति॒नै॒वा॒स्या॒न्ना॒द्य॒मा॒ दत्त॑ इ॒द॒म॒ह॒म॒मु॒ष्या॑ ऽऽ*मु॒ष्या॒य॒ण॒स्या॒न्ना॒द्यꣳ
 ह॒रा॒मी॒त्या॒हा॒न्ना॒द्य॒मे॒वा॒स्य॑ ह॒र॒ति॒ षड्भि॑र्ह॒र॒ति॒ षड्वा॑ ऋ॒त॒वः॑
 प्र॒जा॒प॒ति॒नै॒वा॒स्या॒ – न्ना॒द्य॒मा॒दा॒य॒र्त॒वो॑ऽस्मा॒ अनु॑ प्र॒य॒च्छ॒न्ति॒ – [] 27

TS 3.4.8.7

यो॒ ज्ये॒ष्ठ॒ब॒न्धु॒रप॑ भू॒तः॑ स्यात् तꣳस्थ॒ले॑ऽव॒सा॒य्य॑ ब्र॒ह्मौ॒द॒नं॑ च॒तुः॑
 श॒रा॒वं॒ प॒क्त्वा॑ तस्मै॑ हो॒त॒व्या॑ वर्ष्म॒ वै रा॑ष्ट्र॒भृ॒तो॒ वर्ष्म॒ स्थ॒लं॑ व॒र्ष्म॒णै॒वैनं॑
 व॒र्ष्म॒ स॒मा॒ना॒नां॑ ग॒म॒य॒ति॒ च॒तुः॑ श॒रा॒वो॑ भ॒व॒ति॒ दि॒क्ष्वे॒व॒ प्र॒ति॒ति॒ष्ठ॒ति॒ क्षी॒रे॑

भवति रुचमेवास्मिन् दधात्युद्धरति शृतत्वाय सर्पिष्वान् भवति
मेद्ध्यत्वाय चत्वार आर्षेयाः प्राश्नन्ति दिशामेव ज्योतिषि
जुहोति ॥ 28

(ग्रामी - युनक्ती - ध्मः - स्व एवैना - नन्नाद्यं - यच्छन्त्ये -
कात्र पञ्चाशच्च) (A8)

TS 3.4.9.1

देविका निर्वपेत् प्रजाकामश्छन्दाँसि वै देविकाश्छन्दाँसीव
खलु वै प्रजाश्छन्दोभिरेवास्मै प्रजाः प्रजनयति प्रथमं धातारं
करोति मिथुनी एव तेन करोत्यन्वेवास्मा अनुमतिर्मन्यते राते राका
प्र सिनीवाली जनयति प्रजास्वेव प्रजातासु कुह्वा वाचं दधात्येता एव
निर्वपेत् पशुकामश्छन्दाँसि वै देविकाश्छन्दाँसी - [] 29

TS 3.4.9.2

व खलु वै पशवश्छन्दोभिरेवास्मै पशून् प्रजनयति प्रथमं धातारं
करोति प्रैव तेन वापयत्यन्वेवास्मा अनुमतिर्मन्यते राते राका प्र
सिनीवाली जनयति पशूनेव प्रजातान् कुह्वा प्रतिष्ठापयत्येता एव

निर्व॑पेद्-ग्रा॒मका॒मश्छन्दा॑ऽसि॒ वै दे॒विका॒श्छन्दा॑ऽसी॒ व खलु॑ वै
ग्रा॒मश्छन्दा॑भिरे॒वास्मै॒ ग्रा॒म - [] 30

TS 3.4.9.3

मव॑ रुन्धे॒ मद्ध्य॑तो॒ धा॒तारं॑ करोति॒ मद्ध्य॑त ए॒वैनं॑ ग्रा॒मस्य॑ दधात्ये॒ता
ए॒व निर्व॑पेज्ज्यो॒गामया॑वी॒ छन्दा॑ऽसि॒ वै दे॒विका॒श्छन्दा॑ऽसि॒ खलु॑ वा
ए॒तम॑भि॒ मन्य॑न्ते॒ यस्य॑ ज्यो॒गामय॑ति॒ छन्दा॑भिरे॒वैन-म॑गदं करोति
मद्ध्य॑तो॒ धा॒तारं॑ करोति॒ मद्ध्य॑तो॒ वा ए॒तस्या॑क्लृप्तं॒ यस्य॑
ज्यो॒गामय॑ति॒ मद्ध्य॑त ए॒वास्य॑ तेन॒ कल्प॑यत्ये॒ता ए॒व नि - [] 31

TS 3.4.9.4

व॑पेद्यं॒ यज्ञो॑ नो॒पन॑मे॒च्छन्दा॑ऽसि॒ वै दे॒विका॒श्छन्दा॑ऽसि॒ खलु॑
वा ए॒तं नो॑प॒ नम॑न्ति॒ यं यज्ञो॑ नो॒पन॑मति॒ प्रथ॑मं॒ धा॒तारं॑ करोति
मु॒खत॑ ए॒वास्मै॒ छन्दा॑ऽसि॒ दधा॑त्यु॒पैनं॑ यज्ञो॒ नम॑त्ये॒ता ए॒व
निर्व॑पेदी॒जान॑श्छन्दा॑ऽसि॒ वै दे॒विका॑ या॒तया॑मानी॒व खलु॑ वा
ए॒तस्य॑ छन्दा॑ऽसि॒ य ई॒जान॑ उ॒त्तमं॑ धा॒तारं॑ करो - [] 32

TS 3.4.9.5

–त्यु॒परि॑ष्टादे॒वास्मै॑ छन्दा॒ऽस्य॑या॒तया॑मान्यव॒ रुन्ध॑ उपै॒नमु॑त्तरो
य॒ज्ञो न॑मत्ये॒ता ए॒व निर्व॑पे॒द्यं मे॒धा नो॒पन॑मेच्छन्दा॒ऽसि॒ वै
दे॒विका॑श्छन्दा॒ऽसि॒ खलु॑ वा ए॒तं नो॒प न॑मन्ति॒ यं मे॒धा नो॒पन॑मति
प्रथ॒मं धा॒तारं॑ करोति॒ मुख॑त ए॒वास्मै॑ छन्दा॒ऽसि॒ दधा॑त्युपै॒नं
मे॒धा न॑मत्ये॒ता ए॒व निर्व॑पे – [] 33

TS 3.4.9.6

द्रुक्काम॑श्छन्दा॒ऽसि॒ वै दे॒विका॑श्छन्दा॒ऽसी॒व खलु॑ वै रुक्
छन्दा॑भिरे॒वास्मिन्॑ रुचं॒ दधा॑तिक्षीरे॒ भव॑न्ति रुच॒मेवा॑स्मिन् दधति
मद्ध्य॒तो धा॒तारं॑ करोति॒ मद्ध्य॑त ए॒वैन॑ऽरुचो॒ दधा॑तिगाय॒त्री वा
अनु॑मतिस्त्रि॒ष्टुग्रा॒का जग॑ती॒ सिनी॑वा॒ल्यनु॑ष्टुप् कु॒हूर्धा॑ता वषट्कारः
॥ पूर्॒वप॑क्षो रा॒काऽप॑रपक्षः कु॒हूर॑मावा॒स्या सिनी॑वा॒ली
॥ पौ॒र्णमा॑स्यनु॒मतिश्च॑न्द्रमा॒ धा॒ताऽष्टौ॑ – [] 34

TS 3.4.9.7

वस॒वोऽष्टा॑क्षरा गाय॒त्र्येका॑दश रु॒द्रा ए॒काद॑शाक्षरा त्रि॒ष्टुब्
द्वाद॑शाऽऽ*दि॒त्या द्वा॒दशा॑क्षरा जग॑ती प्र॒जाप॑तिरनु॒ष्टुब् धा॒ता वषट्कार

ए॒तद्वै दे॒विकाः॑ सर्वा॒णि च॒ छन्दा॑ऽसि॒ सर्वा॑श्च दे॒वता॑ वषट्कार॒स्ता
यथ् सह॑ सर्वा॒ निर्व॑पेदी॒श्वरा॑ ए॒नं प्र॒दहो॑ द्वे प्र॒थमे॑ निरु॒प्य धा॒तुस्तृ॒तीयं॑
निर्व॑पेत् तथो॑ ए॒वोत्तरे॑ निर्व॑पेत् तथै॒नं न प्र॑दहन्त्य () थो॒ यस्मै॑
का॒माय॑ निरु॒प्यन्ते॑ तमे॒वाऽऽ*भि॒रुपा॑ऽऽ*प्नोति॑ ॥ 35

(प॒शुका॑म॒श्छन्दा॑ऽसि॒ वै दे॒विका॑श्छन्दा॑ऽसि-ग्रा॒मं-क॒ल्पय॑त्ये॒ता ए॒व
नि-रु॒त्तम॑न्धा॒तारं॑ करोति - मे॒धा न॑मत्ये॒ता ए॒व निर्व॑पे - द॒ष्टौ -
द॑हन्ति - न॒व च) (A9)

Special Korvai:

(दे॒विकाः॑ प्र॒जाका॑मो मि॒थुनी॑ प॒शुका॑मः प्रै॒व ग्रा॑मका॒मो ज्यो॑गा॒मया॑वी
यं यँ॒ज्ञो य ई॒जानो॑ यं मे॒धा रु॒क्कामो॑ऽष्टौ ।
दे॒विका॑ भवन्ति दधति रा॒ष्ट्रका॑माय भवति दधाति ।)

TS 3.4.10.1

वा॒स्तो॒ष्पते॑ प्र॒ति जा॑नी ह्य॒स्मान्त् स्वा॑वेशो॒ अन॑मी॒वो भ॑वानः ।
यत् त्वे॒महे॑ प्र॒तित॑न्नो जुषस्व शन्न ए॒धि द्वि॒पदे॑ शञ्चतु॒ष्पदे॑ ॥
वा॒स्तो॒ष्पते॑ श॒ग्मया॑ स॒ऽ सदा॑ते सक्षी॒महि॑ र॒ण्वया॑ गा॒तुम॑त्या ।

आ॒वः॑ क्षे॒म उ॒त यो॒गे वर॒न्नो यू॒यं पा॒त स्व॒स्तिभिः॑ स॒दानः॑ ॥

यथ् सा॒यं प्रा॒तर॒ग्निहो॒त्रं जु॒होत्याहु॑ती॒ष्टका॑ ए॒व ता उप॑

धत्ते – [] 36

TS 3.4.10.2

यज॑मानोऽहो॒रात्रा॒णि वा ए॒तस्ये॑ष्टका॒ य आ॑हि॒ताग्नि॑र्यथ्
सा॒यं प्रा॒तर्जु॑होत्यहो॒रात्रा॒ण्ये॒वा ऽऽ*प्त्वे॑ष्टकाः कृ॒त्वोप॑ धत्ते द॒श
समा॑नत्र जुहोति द॒शाक्ष॑रा वि॒राड् वि॒राज॑मे॒वाऽऽ*प्त्वे॑ष्टकां कृ॒त्वोप॑
धत्ते॑ऽथो वि॒राज्ये॒व य॒ज्ञमा॑प्नोति चि॒त्यश्चि॑त्योऽस्य भवति तस्मा॒द्यत्र
द॒शोषि॑त्वा प्र॒याति॑ तद्-य॒ज्ञवा॒स्त्ववा॒स्त्वे॒व तद्यत्

ततो॑ऽर्वाचीनं – [] 37

TS 3.4.10.3

रु॒द्रः खलु॑ वै वा॒स्तोष्प॑तिर्यदहु॒त्वा वा॒स्तोष्प॑तीयं प्र॒यायाद् रु॒द्र ए॒नं
भू॒त्वाऽग्नि॑रनू॒त्थाय॑ ह॒न्याद्वा॒स्तोष्प॑तीयं जुहोति भा॒गधे॑ये॒नैवैनं॑
शम॑यति नाऽऽ*र्ति॒माच्छ॑ति यज॑मानो यद्यु॒क्ते जुहु॑याद्यथा प्र॒याते

वा॒स्ता॒वा॒हु॒तिं जु॒हो॒ति ता॒दृ॒गे॒व तद्य॒दयु॒क्ते जु॒हु॒याद्य॒था क्षे॒म आ॒हु॒तिं
जु॒हो॒ति ता॒दृ॒गे॒व तद॒हु॒तम॒स्य वा॒स्तो॒ष्प॒ती॒यꣳ स्या - [] 38

TS 3.4.10.4

दक्षि॑णो यु॒क्तो भव॑ति स॒व्योऽयु॒क्तोऽथ॑ वा॒स्तो॒ष्प॒ती॒यं जु॒हो॒त्यु॒भय॑मे॒वाऽ
कर॑परि॒वर्ग॑मे॒वैनꣳ श॑मयति यदे॒कया॑ जु॒हु॒याद्वि॒हो॒मं कुर्या॑त्
पुरोऽनु॒वा॒क्या म॒नू॒च्य या॒ज्यया॑ जु॒हो॒ति सदे॒वत्वा॒य यद्धु॑त आ॒दद्ध्या॑द्
रु॒द्रं गृ॒हा॒नन्वा॒रो॒हये॑द्-यद॒व॒क्षा॒णान् य॒सं प्र॑क्षाप्य प्रया॒याद्य॑था
य॒ज्ञवे॑श॒सं वाऽऽद॑हनं वा ता॒दृ॒गे॒व तद॒यन्ते॑ यो॒निर्ऋ॒त्विय॑ इत्य॒रण्योः॑
समा॒रो॒हय॑ - [] 39

TS 3.4.10.5

-त्येष॑ वा अ॒ग्नेर्यो॒निः स्व॒ ए॒वैनं॑ यो॒नौ समा॒रो॒हय॑त्यथो
ख॒ल्वाहु॑र्यद॒रण्योः॑ समा॒रूढो॑ नश्येदु॒दस्या॒ग्निः सी॑देत् पुनरा॒धेयः॑
स्या॒दिति॑ या ते अ॒ग्ने य॒ज्ञिया॑ तनू॒स्तये॑ह्या रो॒हेत्या॒त्मन्त् समा॒रो॒हय॑ते
यज॑मानो वा अ॒ग्नेर्यो॒निः स्वा॒यामे॒वैनं॑ यो॒न्याꣳ समा॒रो॒हय॑ते ॥ 40
(ध॒त्ते-ऽर्वा॑चीनꣳ -स्याथ्-समा॒रो॒हय॑ति -पञ्च॑च॒त्वारिꣳश॑च्च) (A10)

TS 3.4.11.1

त्वमग्ने बृहद्वयो दधासि देव दाशुषे ।

कविर्गृहपतिर्युवा ॥

हव्यवाडग्निरजरः पिता नो विभुर्विभावा सुदृशीको अस्मे ।

सुगार्हपत्याः समिषो दिदीह्यस्मद्रियख्सं मिमीहि श्रवाञ्सि ॥

त्वं च सोम नो वशो जीवातुं न मरामहे ।

प्रियस्तौत्रो वनस्पतिः ॥

ब्रह्मा देवानां पदवीः कवीनामृषिर्विप्राणां महिषो मृगाणां ।

श्येनो गृद्ध्राणाञ् स्वधिति र्वनानाञ् सोमः - [] 41

TS 3.4.11.2

पवित्रमत्येति रेभन् ॥

आ विश्वदेवञ् सत्यतिञ् सूक्तैरद्या वृणीमहे ।

सत्यसवञ् सवितारं ॥

आसत्येन रजसा वर्तमानो निवेशयन्नमृतं मर्त्यञ्च ।

हिरण्ययेन सविता रथेनाऽऽ* देवोयाति भुवना विपश्यन् ॥

यथा॑ नो॒ अदि॒तिः॑ क॒रत् प॒श्वे नृ॒भ्यो यथा॑ ग॒र्वे ॥

यथा॑ तो॒काय॑ रु॒द्रियं॑ ॥

मा न॑ स्तो॒के तन॑ये मा न॒ आयु॑षि मा नो॒ गोषु॑ मा- [] 42

TS 3.4.11.3

नो॒ अश्वे॑षु री॒रिषः॑ ।

वी॒रान् मा॒नो रु॒द्र भा॒मितो॑ व॒धीर्ह॑विष्मन्तो नम॑सा वि॒धेम॑ ते ॥

उद॑प्रुतो न वयो रक्ष॑माणा वाव॑दतो अ॒भ्रिय॑स्येव घोषाः॑ ।

गि॒रिभ्र॑जो नो॒र्मयो॑ म॒दन्तो॑ बृ॒हस्प॑तिम॒भ्यर्का॑ अ॒नावन् ॥

ह॒सैरि॑व स॒खिभि॑र्वाव॒दद्भिर॑श्मन्म॒यानि॑ न॒हना॑ व्यस्यन् ।

बृ॒हस्प॑तिर॒भिक॑नि॒क्रद॑द्वा उ॒त प्रा॑स्तौ॒दुच्च॑ वि॒द्वा अ॑गायत् ॥

ए॒न्द्र सान॑सि॒रयि॑ - [] 43

TS 3.4.11.4

सजि॑त्वान् सदा॒सहं॑ ॥

वर्षि॑ष्ठमू॒तये॑ भर ॥

प्रस॑साहि॒षे पु॒रुहू॑त श॒त्रून् ज्ये॑ष्ठस्ते शु॒ष्म इ॒ह रा॒तिर॑स्तु ।

इन्द्राऽऽ* भर॑ दक्षि॒णेना॑ व॒सूनि॑ प॒तिः सि॒न्धूना॑म॒सि रे॒वती॑नां ॥

त्व॒ सु॒तस्य॑ पी॒तये॑ स॒द्यो वृ॒द्धो अ॒जाय॑थाः ।

इ॒न्द्र ज्यै॑ष्ठ्याय सु॒क्रतो ॥

भुव॑स्त्वमि॒न्द्र ब्र॑ह्मणा म॒हान् भुवो॑ विश्वे॒षु स॑वनेषु य॒ज्ञियः॑ ।

भुवो॑ नृ॒ञ्च्यौ॒लो विश्व॑स्मिन् भ॒रे ज्येष्ठ॑श्च मन्त्रो – [] 44

TS 3.4.11.5

विश्व॑चर्षणे ॥

मि॒त्रस्य॑ चर्ष॒णीधृ॑तः श्रवो॑ दे॒वस्य॑ सा॒नसिं॑ ।

स॒त्यं चि॒त्र श्र॑वस्तमं ॥

मि॒त्रो ज॒नान् या॑तयति प्र॒जानन् मि॒त्रो दा॑धार पृथि॒वीमु॒त द्वां ।

मि॒त्रः कृ॒ष्टीर॑निमिषा॒भि च॑ष्टे स॒त्याय॑ ह॒व्यं घृ॒तव॑द्-वि॒धेम ॥

प्र॒समि॑त्र म॒र्तो अ॑स्तु प्र॒यस्वा॑न् यस्त॑ आ॒दित्य॑ शि॒क्षति॑ व्र॒तेन॑ ।

न ह॑न्यते न जी॒यते॑ त्वोतो॑ नैन॒म॒हो अ॑श्नोत्यन्ति॒तो न दू॒रात् ॥

य– [] 45

TS 3.4.11.6

च्चि॒द्धि ते॒ विशो॑ यथा॒ प्रदे॑व वरुण॒ व्रतं॑ ।

मिनी॒मसि॒ द्यवि॑द्यवि ॥

यत् किञ्चेदं॑ वरुण॒ दैव्ये॒ जने॑ऽभिद्रोहं॒ मनु॑ष्याश्चरामसि ।

अचि॑त्तीयत् तव॒ धर्मा॑ युयोपिममा॒ नस्तस्मा॑ देनसो देव रीरिषः ॥

कि॒तवा॒सो यद्रि॑ रिपुर्न दीवि यद्वा॒ घा स॒त्य मु॒तय॑न्न वि॒द्म ।

सर्वा॒ ता वि॒ष्य शि॒थिरे॒ () व॑ देवा॒था ते स्याम॑ वरुण॒ प्रिया॑सः ॥ 46

(सोमो-गोषु मा- रयिं - मन्त्रो -य-च्छिथिरा-सप्त च) (A11)

Prasna Korvai with starting Padams of 1 to 11 Anuvaakams :-

(वि वा ए॒तस्या॑ – ऽ॒वा॒यो – इ॒मे वै – चि॒त्त॒ञ्चा – ऽ॒ग्नि॒भू॒ता॒नां॑ –
दे॒वा वा अ॒भ्या॒ता॒ना – नृ॒ता॒षा॒ङ् – रा॒ष्ट्र॒का॒मा॒य – दे॒वि॒का –
वा॒स्तो॒ष्प॒ते – त्व॒म॒ग्ने बृ॒ह – दे॒का॒द॒श)

Korvai with starting Padams of 1, 11, 21 Series of Panchaatis :-

(वि वा ए॒तस्ये॑ – त्या॒ह – मृ॒त्यु॒र्गन्ध॒र्वो – ऽव॑ रु॒न्धे म॒द्ध्य॒त –
स्त्व॒म॒ग्ने बृ॒ह॒त् – षट्च॑त्वारि॒ंश॒त्)

First and Last Padam of Fourth Prasnam of Kandam 3 :-

(वि वा ए॒तस्य॑ – प्रि॒या॒सः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां तृतीयकाण्डे चतुर्थः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3.5 तृतीयकाण्डे पञ्चमः प्रश्नः – इष्टिशेषाभिधानं

TS 3.5.1.1

पूर्णा पश्चादु॒त पूर्णा पु॒रस्ता॒दुन्म॑द्ध्यतः पौ॒र्णमा॒सी जि॑गाय ।
तस्यान् दे॒वा अधि॑ सँव॒सन्त॑ उत्त॒मे नाक॑ इ॒ह मा॑दयन्तां ॥
यत्ते दे॒वा अ॑दधु॒र्भा॒गधे॒यम॑मा॒वास्ये॑ सँव॒सन्तो॑ म॒हित्वा॑ ।
सानो॑ य॒ज्ञं पि॑पृ॒हि वि॒श्ववा॑रे॒रयि॑ नो॒ धेहि॑ सु॒भगे सु॒वीरं॑ ॥
नि॒वेश॑नी स॒ङ्गम॑नी व॒सूनां॑ वि॒श्वा रू॒पाणि॑ व॒सू॒न्यावे॑शयन्ती ।
सह॒स्रपो॑षं सु॒भगा॑ रराणा सा न आ॒गन् वर्च॑सा – [] 1

TS 3.5.1.2

सँवि॒दाना॑ ॥
अ॒ग्नी॒षोमौ॑ प्रथ॒मौ वी॒र्ये॑ण व॒सून् रु॒द्राना॑दि॒त्यानि॒ह जि॑न्वतं ।
मा॒द्ध्यं हि॑ पौ॒र्णमा॒सं जु॒षेथां॑ ब्र॒ह्मणा॑ वृ॒द्धौ सु॒कृते॑न
सा॒ताव॑थाऽस्मभ्यं सह॒वीरां॑ र॒यिं नि॑ यच्छतं ॥

आ॒दि॒त्याश्चा॒ङ्गि॒रस॒श्चा॒ग्नी॒नाऽद॒धत॒ ते द॒र्.श॒पूर्ण॒मा॒सौ प्रै॒प्सन्
तेषा॒मङ्गि॒रसां॒ निरु॒प्तं ह॒वि॒रासी॒दथाऽऽ*दि॒त्या ए॒तौ
हो॒माव॒पश्य॒न् ताव॑जुह॒वुस्ततो॒ वै ते द॒र्.श॒पूर्ण॒मा॒सौ – [] 2

TS 3.5.1.3

पूर्व॒ आ ऽल॒भन्त द॒र्.श॒पूर्ण॒मा॒सा-वा॒लभ॑मान ए॒तौ हो॒मौ
॥ पु॒रस्ता॑ज्जुह॒याथ् सा॒क्षादे॒व द॒र्.श॒पूर्ण॒मा॒सावा ल॑भते ब्र॒ह्मवा॒दिनो॑
वद॒न्ति स त्वै द॒र्.श॒पूर्ण॒मा॒सावा ल॑भेत य ए॒नयो॒रनु-लो॒मञ्च॑
प्र॒तिलो॒मञ्च॑ वि॒द्यादि॒त्यमा॒वास्या॒या ऊ॒र्ध्वं तद॑नुलो॒मं पौ॒र्णमा॒स्यै
प्र॒तीची॒नं तत् प्र॒तिलो॒मं यत् पौ॒र्णमा॒सीं पूर्वा॑माल॒भेत॑
प्र॒तिलो॒ममे॒नावा ल॑भेता-मु॒मप॒क्षीय॑माण-म॒न्वप॑ – [] 3

TS 3.5.1.4

क्षी॒येत सा॒रस्व॒तौ हो॒मौ पु॒रस्ता॑ज्जुह॒याद॒मावा॒स्या वै
सा॒रस्व॒त्यनु॒लोम॑-मे॒वैना॒वा ल॑भते ऽमु॒माप्या॑यमा॒नम॒न्वा प्या॑यत
आ॒ग्नावै॒ष्णव॑-मे॒काद॑शक॒पालं पु॒रस्ता॑न्निर्व॒पेथ् सा॒रस्व॒त्यै च॒रुं
सा॒रस्व॒ते द्वा॒दश॑क॒पालं य॑दा॒ग्नेयो भ॑वत्य॒ग्निर्वै य॑ज्ञमु॒खं

य॒ज्ञमु॒खमे॒वर्द्धि॑ पुर॒स्ताद्-ध॒त्ते यद्-वै॒ष्ण॒वो भ॒वति॑ य॒ज्ञो वै
विष्णु॑र्य॒ज्ञमे॒वाऽऽ*र॒भ्य प्र॑तनु॒ते सर॑स्वत्यै () च॒रुर्भ॑वति सर॒स्वते
द्वाद॑शकपालोऽमा॒वास्या॑ वै सर॒स्वती पू॒र्णमा॒सः सर॑स्वान् तावे॒व
सा॒क्षादा॑ र॒भत ऋ॒द्ध्नो॒त्याभ्यां॑ द्वाद॑शकपालः सर॒स्वते भ॒वति
मिथु॑न॒त्वाय॑ प्र॒जात्यै॑ मिथु॒नौ गा॒वौ दक्षि॑णा स॒मृद्ध्यै॑ ॥ 4
(वर्च॑सा - वै ते द॒र्श॑पूर्णमा॒सा - व॒ष - तनु॑ते सर॒स्वत्यै -
पञ्च॑वि॒ंशति॑श्च) (A1)

TS 3.5.2.1

ऋ॒षयो॑ वा इन्द्रं॑ प्र॒त्यक्षं॑ नाप॒श्यन् तं॑ व॒सिष्ठः॑ प्र॒त्यक्ष॑मप॒श्यथ्
सोऽब्र॑वीद्-ब्राह्म॑णं ते वक्ष्या॒मि यथा॑ त्वत्पु॒रोहि॑ताः प्र॒जाः
प्र॒जनि॑ष्यन्तेऽथ॒ मेत॑रेभ्य॒ ऋषि॑भ्यो॒ मा प्र॑वोच॒ इति॑ तस्मा॑
ए॒तान्थ॑स्तोम॒-भा॒गान॑ब्रवीत् ततो॑ व॒सिष्ठ॑पुरोहि॒ताः प्र॒जाः प्रा॒जाय॑न्त
तस्मा॑द्-वा॒सिष्ठो॑ ब्र॒ह्मा का॒र्यः प्रै॒व जा॑यते र॒श्मिर॑सि क्षया॒य
त्वा क्ष॑यं जि॒न्वे - [] 5

TS 3.5.2.2

–त्याह दे॒वा वै क्ष॒यो दे॒वेभ्य॑ ए॒व य॒ज्ञं प्रा॒ऽऽ*ह॑ प्रेति॒रसि॑ ध॒र्माय॑
 त्वा ध॒र्मं जि॒न्वेत्या॑ह म॒नुष्या॑ वै ध॒र्मो म॒नुष्ये॑भ्य ए॒व य॒ज्ञं
 प्रा॒ऽऽ*हान्वि॑तिरसि दि॒वे त्वा दि॒वं जि॒न्वेत्या॑हैभ्य ए॒व लो॒केभ्यो॑ य॒ज्ञं
 प्रा॒ऽऽ*हवि॑ष्ट॒म्भोऽसि॑ वृ॒ष्ट्यै॑ त्वा वृ॒ष्टिं जि॒न्वेत्या॑ह वृ॒ष्टिमे॒वाव॑ – [] 6

TS 3.5.2.3

रु॒न्धे प्र॒वाऽस्य॑नु॒वाऽसी॑त्याह मि॒थुन॒त्वायो॒शिग॑सि व॒सुभ्य॑स्त्वा
 व॒सूज्जि॒न्वेत्या॑हाष्टौ व॒सव॑ ए॒काद॑श रु॒द्रा द्वा॒दशा॑ऽऽ*दि॒त्या ए॒ताव॑न्तो
 वै दे॒वास्ते॑भ्य ए॒व य॒ज्ञं प्रा॒ऽऽ*हौजो॑ऽसि पि॒तृभ्य॑स्त्वा पि॒तृन्
 जि॒न्वेत्या॑ह दे॒वाने॒व पि॒तृन॑नु स॒न्तनो॑ति त॒न्तुर॑सि प्र॒जाभ्य॑स्त्वा
 प्र॒जा जि॒न्वे – [] 7

TS 3.5.2.4

–त्याह पि॒तृने॒व प्र॒जा अ॒नु स॒न्तनो॑ति पृ॒तना॒षाड॑सि प॒शुभ्य॑स्त्वा
 प॒शूज्जि॒न्वेत्या॑ह प्र॒जा ए॒व प॒शून्नु स॒न्तनो॑तिरे॒वद॑स्यो–
 ष॒धीभ्य॑ स्त्वौष॒धी–जि॒न्वेत्या॑हौष॒धीष्वे॒व प॒शून् प्र॑तिष्ठापयत्यभि॒जिद॑सि

यु॒क्त॒ग्रा॒वेन्द्रा॒य त्वेन्द्रं॑ जि॒न्वेत्या॒हाभि॒जित्या॑ अधि॒पति॑रसि प्रा॒णाय॑
त्वा प्रा॒णं – [] 8

TS 3.5.2.5

जि॒न्वेत्या॒ह प्र॒जास्वे॒व प्रा॒णान् द॑धाति त्रि॒वृद॑सि प्र॒वृद॑सीत्या॒ह
मि॒थुन॑त्वाय स॒॒रोहो॑ऽसि नी॒रोहो॑ऽसीत्या॒ह प्र॒जात्यै॑ वसु॒कोऽसि॑
वे॒षश्चि॑रसि वस्य॑ष्टि॒रसीत्या॑ह प्र॒तिष्ठि॑त्यै ॥ 9

(जि॒न्वेत्य॑ – व – प्र॒जा जि॒न्व – प्रा॒णन् – त्रि॒॒श॒च्च॑)(A2)

TS 3.5.3.1

अ॒ग्निना॑ दे॒वेन॑ पृ॒तना॑ जया॒मि गा॒यत्रे॑ण छ॒न्दसा॑ त्रि॒वृता॑ स्तो॒मेन॑
रथ॑न्त॒रेण॑ सा॒म्ना व॑षट्का॒रेण॑ वज्रे॑ण पू॒र्वजा॑न् भ्रातृ॒व्यान॑ध॒रान्
पा॒दया॑म्यवै॒नान् बा॒धे प्र॒त्येना॑न्नुदे॒ऽस्मिन् क्ष॒येऽस्मिन्॑ भू॒मिलो॑के
यो॑ऽस्मा॒न् द्वेष्टि॑ यञ्च॒ वयं॑ द्वि॒ष्मो वि॒ष्णोः क्र॒मेणा॑त्ये॒नान् क्रामा॑मीन्द्रे॒ण
दे॒वेन॑ पृ॒तना॑ जया॒मि त्रै॒ष्टुभे॑न छ॒न्दसा॑ पञ्च॒दशे॑न स्तो॒मेन॑ बृ॒हता॑
सा॒म्ना व॑षट्का॒रेण॑ वज्रे॑ण – [] 10

TS 3.5.3.2

सह॑जान् विश्वे॑भिर्दे॒वेभिः॑ पृ॒तना॑ जयामि जाग॑तेन॒ छन्द॑सा सप्तद॒शेन॑
स्तोमे॑न वामदे॒व्येन॑ साम्ना॑ वषट्कारेण॒ वज्रे॑णा पर॒जानिन्द्रे॑ण स॒युजो॑
वय॑ꣳ सास॒ह्याम॑ पृ॒तन्य॑तः ।

घ्नन्तो॑ वृ॒त्राण्य॑प्रति ।

यत्ते॑ अग्ने॒ तेज॒स्तेना॒हं तेज॒स्वी भूया॑सं यत्ते॑ अग्ने॒ वर्च॒स्तेना॒हं
वर्च॒स्वी भूया॑सं यत्ते॑ अग्ने॒ हर॒स्तेना॒हꣳ हर॒स्वी भूया॑सं ॥ 11

(बृ॒हता॑ साम्ना॑ वषट्कारेण॒ वज्रे॑ण – षट्च॑त्वारि॒ꣳशच्च॑) (A3)

TS 3.5.4.1

ये दे॒वा यज्ञ॑हनो॒ यज्ञ॑मुषः पृथि॒व्याम॑द्ध्यासते ।

अ॒ग्निर्मा॑ तेभ्यो॒ रक्ष॑तु गच्छेम॒ सुकृ॑तो॒ वयं॑ ॥

आ॒ऽगन्म॑ मि॒त्रावरु॑णा वरेण्या॒ रात्री॑णां भा॒गो यु॒वयो॒र्यो अ॒स्ति ।

नाकं॑ गृह्णा॒नाः सु॒कृत॑स्य लो॒के तृ॒तीये॑ पृ॒ष्ठे अधि॑ रोच॒ने दि॒वः ॥

ये दे॒वा यज्ञ॑हनो॒ यज्ञ॑मुषोऽन्तरि॒क्षेऽद्ध्या॑सते ।

वा॒युर्मा॑ ते॒भ्यो र॑क्षतु गच्छेम सु॒कृ॒तो व॒यं ॥

यास्ते॑ रा॒त्रीः स॒वित॑ – [] 12

TS 3.5.4.2

–दे॒व॒या॒नीर॑न्तरा द्यावापृ॒थि॒वी वि॒यन्ति॑ ।

गृ॒हैश्च॑ स॒र्वैः प्र॒जया॑ न्वग्रे सु॒वो रु॒हा॒णास्तर॑ता रजाँ॒सि ॥

ये दे॒वा य॑ज्ञ॒हनो॑ य॒ज्ञमु॑षो दि॒व्यद्ध्या॑सते ।

सू॒र्यो मा॑ ते॒भ्यो र॑क्षतु गच्छेम सु॒कृ॒तो व॒यं ॥

येनेन्द्रा॑य स॒मभ॑रः पयाँ॒स्युत्त॑मेन ह॒विषा॑ जा॒तवे॑दः ।

तेनाँ॒ग्ने त्वमु॑त व॒र्धये॑मँ स॒जा॒तानाँ॒ श्रैष्ठ्य॑ आ धै॒ह्येन॑ ॥

य॒ज्ञ॒हनो॑ वै दे॒वा य॑ज्ञ॒मुषः॑ – [] 13

TS 3.5.4.3

सन्ति॑ त ए॒षु लो॒केष्वा॑सत आ॒द॒दा॒ना वि॒मथ्ना॑ना यो द॒दाति॑ यो

य॒जते॑ तस्य ।

ये दे॒वा य॑ज्ञ॒हनः॑ पृ॒थि॒व्याम॑द्ध्या॒सते॑ ये अ॒न्तरि॑क्षे ये

दि॒वीत्या॑हे॒माने॒व लो॒काँस्ती॒र्त्वा स॒गृहः॑ स॒पशुः॑ सु॒वर्गं॑ लो॒कमे॒त्यप॑

वै सोमेने॑ जाना॒द्दे॒वता॑श्च य॒ज्ञश्च॑ क्रा॒मन्त्या॑ग्ने॒यं पञ्च॑कपालमु॒दवसा॑नी॒यं
निर्व॑पेद॒ग्निः सर्वा॑ दे॒वताः॑ – [] 14

TS 3.5.4.4

पाङ्क्तो॑ य॒ज्ञो दे॒वता॑श्चै॒व य॒ज्ञञ्चा॑व रु॒न्धेगा॑य॒त्रो वा अ॒ग्निर्गा॑य॒त्र
छ॒न्दास्तं॑ छ॒न्दसा॑ व्य॒र्धय॑ति यत् पञ्च॑कपालं क॒रोत्य॑ष्टा॒कपालः॑
का॒र्योऽष्टा॑क्ष॒रा गा॑य॒त्री गा॑य॒त्रोऽग्नि॑-र्गा॒यत्र॑ छ॒न्दाः स्वेनै॒वैनं॑ छ॒न्दसा॑
सम॑र्धयति प॒ङ्क्त्यौ॑ या॒ज्यानु॑वा॒क्ये भव॑तः पाङ्क्तो॑ य॒ज्ञस्तेनै॒व
य॒ज्ञान्नैति॑ ॥ 15

(स॒वि॒त-दे॒वा य॒ज्ञमु॒षः – सर्वा॑ दे॒वता॑ – स्त्रि॒च॒त्वारि॑ञ्च॒) (A4)

TS 3.5.5.1

सू॒र्यो मा दे॒वो दे॒वेभ्यः॑ पा॒तु वा॒युरन्त॑रि॒क्षाद्-यज॑मानोऽग्नि॒र्मा
पा॒तु चक्षु॑षः ।
सक्ष॑ शू॒ष स॒वि॒तर्वि॑श्च॒र्षण॑ ए॒तेभिः॑ सोम॑ ना॒मभि॑र्वि॒धेम॑ ते तेभिः॑
सोम॑ ना॒मभि॑र्वि॒धेम॑ ते ॥
अ॒हं प॒रस्ता॑द-ह॒मवस्ता॑द॒हं ज्योति॑षा वि तमो॑ व॒वार ।

यदन्तरिक्षं तदु मे पिताऽभूदहं सूर्यमुभयतो ददर्शाहं भूया समुत्त
मः समानाना - [] 16

TS 3.5.5.2

मा समुद्रा-दाऽन्तरिक्षात्-प्रजापतिरुदधिं च्यावयातीन्द्रः
प्रस्नौतु मरुतो वर्षयन्तून्मभय पृथिवीं भिन्धीदं दिव्यं नभः ।
उद्रो दिव्यस्य नो देहीशानो विसृजा दृतिं ॥
पशवो वा एते यदादित्य एष रुद्रो यदग्निरोषधीः प्रास्याग्नावादित्यं
जुहोति रुद्रादेव पशूनन्तर्दधात्यथो ओषधीष्वेव पशून् - [] 17

TS 3.5.5.3

प्रतिष्ठापयति कविर्यज्ञस्य वितनोति पन्थां नाकस्य पृष्ठे अधि
रोचने दिवः ।
येन हव्यं वहसि यासि दूत इतः प्रचेता अमुतः सनीयान् ॥
यास्ते विश्वाः समिधः सन्त्यग्नेयाः पृथिव्यां बर्हिषि सूर्ये याः ।
तास्ते गच्छन्त्वाहुतिं घृतस्य देवायते यजमानाय शर्म ॥
आशासानः सुवीर्यं रायस्पोष स्वश्रियं ।
बृहस्पतिना राया स्वगाकृतो मह्यं यजमानाय () तिष्ठ ॥ 18

(समानाना-मोषधीष्वेव पशून् - मह्यं यजमाना - यैकञ्च) (A5)

TS 3.5.6.1

सं त्वा नह्यामि पयसा घृतेन सं त्वा नह्याम्यप ओषधीभिः ।
सं त्वा नह्यामि प्रजयाऽहमद्य सा दीक्षिता सनवो वाजमस्मे ॥
प्रैतु ब्रह्मणस्पती वेदिं वर्णेन सीदतु ।
अथाहमनुकामिनी स्वे लोके विशा इह ॥
सुप्रजसस्त्वा वयं सुपत्नीरुप सेदिम ।
अग्ने सपत्नदम्भनमदब्धासो अदाभ्यं ॥
इमं विष्यामि वरुणस्य पाशं - [] 19

TS 3.5.6.2

यमबद्धनीत सविता सुकेतः ।
धातुश्च योनौ सुकृतस्य लोके स्योनं मे सह पत्या करोमि ॥
प्रेह्युदेह्युतस्य वामीरन्वग्निस्तेऽग्रं नयत्वदितिर्मद्ध्यं ददतां
रुद्रावसृष्टाऽसि युवा नाम मा मा हिंसीर्वसुभ्यो रुद्रेभ्य आदित्येभ्यो

वि॒श्वेभ्यो॑ वो दे॒वेभ्यः॑ प॒न्नेजनी॑र्गृह्णामि य॒ज्ञाय॑ वः प॒न्नेजनीः॑ सादयामि
वि॒श्वस्य॑ ते वि॒श्वावतो॑ वृ॒ष्णि॒यावत॑ - [] 20

TS 3.5.6.3

स्त॒वाग्ने॑ वा॒मीर॑नु स॒न्दृशि॑ वि॒श्वा रेता॑सि धि॒षीया॑ऽगन् दे॒वान् य॒ज्ञो
नि दे॒वीर्दे॒वेभ्यो॑ य॒ज्ञम॑शिषन्नस्मिन्त् सु॒न्वति॑ यज॒मान आ॒शिषः॑
स्वाहा॑कृताः समु॒द्रेष्ठा॑ गन्ध॒र्वमाति॑ष्ठतानु ।
वा॒तस्य॑ प॒त्मन्नि॒ड ई॒डिताः॑ ॥ 21

(पा॒शं - वृ॒ष्णि॒यावत॑ - स्त्रि॒श॒च्च) (A6)

TS 3.5.7.1

व॒षट्का॑रो वै गा॒यत्रि॑यै शि॒रोऽछि॑नत् तस्यै र॒सः प॒राऽप॑तत् स पृ॒थि॒वीं
प्रा॒वि॒श॒थ्स ख॑दि॒रोऽभ॑वद्यस्य ख॒ादि॑रः सु॒वो भ॑वति छ॒न्द॒सामे॒व
र॒से॒नाव॑ द्यति सर॒सा अ॒स्याऽऽ*हु॑तयो भवन्ति तृ॒तीय॑स्यामि॒तो दि॒वि
सोम॑ आसीत् तं गा॒यत्र्या॑ऽ ह॒रत् तस्य॑ प॒र्णम॑च्छिद्यत् तत् प॒र्णोऽभ॑वत्
तत् प॒र्णस्य॑ प॒र्णत्वं य॑स्य प॒र्णम॑यी जुहू - [] 22

TS 3.5.7.2

–र्भवति सौम्या अस्याऽऽ*हुतयो भवन्ति जुषन्तेऽस्य देवा आहुतीर्देवा
वै ब्रह्मन्नवदन्त तत् पर्ण उपाऽ*शृणोथ सुश्रवा वै नाम यस्य
पर्णमयी जुहूर्भवति न पापः श्लोकः शृणोति ब्रह्म वै पर्णो
विण्मरुतोऽन्नं विण्मारुतोऽश्वत्थो यस्य पर्णमयी जुहूर्भवत्या–श्वत्–
थ्युपभृद्– ब्रह्मणैवान्नमव रुन्धेऽथो ब्रह्मै – [] 23

TS 3.5.7.3

–व विश्वदध्यूहति राष्ट्रं वै पर्णो विडश्वत्थो यत् पर्णमयी
जुहूर्भवत्या–श्वत्थ्युपभृद्–राष्ट्रमेव विश्वदध्यूहति प्रजापतिर्वा
अजुहोथ सा यत्राऽऽ*हुतिः प्रत्यतिष्ठत् ततो विकङ्कत उदतिष्ठत् ततः
प्रजा असृजत यस्य वैकङ्कती ध्रुवा भवति प्रत्येवास्या
ऽऽ*हुतयस्तिष्ठन्त्यथो प्रैव जायत एतद्वै सुचाः () रूपं यस्यैव
रूपाः सुचो भवन्ति सर्वाण्येवैनः रूपाणि पशूनामुपतिष्ठन्ते
नास्याप–रूपमात्मज्जायते ॥ 24

(जुहू – रथो ब्रह्म – सुचाः – सप्तदश च) (A7)

TS 3.5.8.1

उ॒प॒या॒म॒गृ॒ही॒तोऽसि॑ प्र॒जा॒प॒त॒ये त्वा॒ ज्यो॒ति॒ष्म॒ते ज्यो॒ति॒ष्म॒न्तं गृ॒ह्णामि॑
द॒क्षाय॑ द॒क्ष॒वृ॒धे रा॒तं दे॒वेभ्यो॑ऽग्नि॒ जिह्वे॑भ्यस्त्वर्तायुभ्य
इन्द्र॑ज्येष्ठेभ्यो वरु॒णरा॒जभ्यो॑ वा॒तापि॑भ्यः पर्ज॒न्या॑त्मभ्यो दि॒वे
त्वाऽन्तरि॑क्षाय त्वा पृ॒थि॒व्यै त्वाऽपे॑न्द्र द्विषतो मनोऽप जि॒ज्या॑सतो
जह्य॑प यो नोऽरा॒ती॒यति॑ तं जहि प्रा॒णाय॑ त्वाऽपा॒नाय॑ त्वा व्या॒नाय॑
त्वा स॒ते त्वाऽस॑ते त्वाऽद्भ्यस्त्वौष॒धीभ्यो॑ () वि॒श्वेभ्य॑स्त्वा भू॒तेभ्यो॑
यतः॑ प्र॒जा अ॒क्खि॒द्रा अ॒जा॒यन्त॑ तस्मै॑ त्वा प्र॒जा॒प॒त॒ये वि॒भू॒दाव्.न्ने
ज्यो॒ति॒ष्म॒ते ज्यो॒ति॒ष्म॒न्तं जु॒होमि॑ ॥ 25

(ओष॑धीभ्य - श्व॑तुर्दश च) (A8)

TS 3.5.9.1

यां वा॑ अ॒ध्व॒र्युश्च॑ यज॒मानश्च॑ दे॒वता॑मन्तरितस्तस्या आ वृ॒श्च्ये॑ते
प्रा॒जा॒प॒त्यं द॒धि॒ग्र॒हं गृ॒ह्णी॒यात् प्र॒जा॒प॒तिः सर्वा॑ दे॒वता॑ दे॒वता॑भ्य ए॒व
नि॒हु॒वा॒ते ज्ये॒ष्ठो वा॑ ए॒ष ग्र॒हाणां॑ य॒स्यैष॑ गृ॒ह्यते॑ ज्यैष्ठ्यमे॒व ग॒च्छति॑
सर्वा॑सां वा॑ ए॒तद्दे॒वता॑नां रूपं य॒देष॑ ग्र॒हो य॒स्यैष॑ गृ॒ह्यते॑
सर्वा॑ण्ये॒वैनं॑ रूपाणि प॒शूना॑मुपतिष्ठन्त उप॒या॒म॒गृ॒ही॒तो - [] 26

TS 3.5.9.2

–ऽसि प्रजापतये त्वा ज्योतिष्मते ज्योतिष्मन्तं गृह्णामीत्याह
ज्योतिरेवैनं॑ समानानां॑ करोत्यग्नि-जिह्वेभ्यस्त्वर्तायुभ्य
इत्याहैतावतीर्वे देवतास्ताभ्य एवैनं॑ सर्वाभ्यो गृह्णात्यपेन्द्र द्विषतो
मन इत्याह भ्रातृव्यापनुत्यै प्राणाय त्वाऽपानाय त्वेत्याह प्राणानेव
यजमाने दधाति तस्मै॑ त्वा प्रजापतये विभूदाव्.न्ने ज्योतिष्मते
ज्योतिष्मन्तं जुहोमी – [] 27

TS 3.5.9.3

–त्याह प्रजापतिः सर्वा देवताः सर्वाभ्य एवैनं॑ देवताभ्यो
जुहोत्याज्यग्रहं गृह्णीयात् तेजस्कामस्य तेजो वा आज्यं तेजस्व्येव
भवति सोमग्रहं गृह्णीयाद्-ब्रह्मवर्चस्कामस्य ब्रह्मवर्चसं॑ वै सोमो
ब्रह्मवर्चस्येव भवति दधिग्रहं गृह्णीयात् पशुकामस्योर्ग्वै दद्ध्यूर्क्
पशव ऊर्जेवास्मा ऊर्जं॑ पशूनव रुन्धे ॥ 28

(उपयामगृहीतो – जुहोमि – त्रिचत्वारिंशच्च) (A9)

TS 3.5.10.1

त्वे॑ क्र॒तुम॑पि॒ वृ॒ज्जन्ति॑ वि॒श्वे द्वि॑र्यदे॒ते त्रि॑-॒र्भव॑न्त्यू॒माः ।
 स्वा॒दोः स्वा॑दी॒यः स्वा॒दुना॑ सृ॒जा सम॑त ऊ॒ षु म॑धु म॒धुना॑ऽभि यो॒धि ।
 उ॒प॒याम॑गृहीतोऽसि॒ प्र॒जाप॑तये॒ त्वा जु॑ष्टं गृ॒ह्णाम्ये॒ष ते यो॑निः
 प्र॒जाप॑तये॒ त्वा ॥
 प्रा॒णग्र॑हान् गृ॒ह्णात्ये॒ताव॑द्वा अ॒स्ति याव॑दे॒ते ग्र॑हाः स्तो॒माश्छ॑न्दाऽ॒सि
 पृ॒ष्ठानि दि॑शो याव॑दे॒वास्ति॒ त - [] 29

TS 3.5.10.2

-द॒व रु॒न्धे ज्ये॑ष्ठा वा ए॒तान् ब्रा॑ह्म॒णाः पु॒रा वि॒दाम॑क्रन् तस्मा॒त् तेषा॑ऽ
 सर्वा॑ दि॒शोऽभि॑जिता अ॒भूव॑न्॒ यस्यै॒ ते गृ॑ह्यन्ते ज्यै॒ष्ठ्यमे॒व ग॑च्छत्य॒भि
 दि॒शो ज॑यति पञ्च गृह्यन्ते पञ्च दि॒शः सर्वा॑स्वे॒व दिक्ष्व॑-वृ॒द्धनु॑वन्ति
 न॒वन॑व गृह्यन्ते न॒व वै पु॑रु॒षे प्रा॑णाः प्रा॒णाने॒व य॑ज॒माने॑षु दधति
 प्रा॒यणी॑ये चोद॒यनी॑ये च गृह्यन्ते प्रा॒णा वै प्रा॑णग्र॒हाः - [] 30

TS 3.5.10.3

प्रा॒णैरे॒व प्र॑यन्ति प्रा॒णैरु॑द्यन्ति द॒शमे॑ऽहन् गृह्यन्ते प्रा॒णा वै
 प्रा॒णग्र॑हाः प्रा॒णेभ्यः॒ खलु॑ वा ए॒तत् प्र॑जा यन्ति य॒द्वाम॑दे॒व्यं

ॐ॒यो॒ने॒श्च॒यव॑ते द॒शमे॑ऽह॒न् वाम॑दे॒व्यं ॐ॒यो॒ने॒श्च॒यव॑ते
यद्-द॒शमे॑ऽह॒न् गृ॒ह्यन्ते॑ प्रा॒णेभ्य॑ ए॒व तत् प्र॒जा न॑यन्ति ॥ 31
(तत् - प्रा॒णग्र॑हाः - स॒प्तवि॑ंशच्च) (A10)

TS 3.5.11.1

प्र दे॒वन्दे॒व्या धि॒या भर॑ता जा॒तवे॑दसं ।
ह॒व्या नो॑ वक्ष॒दानु॑षक् ॥
अ॒यमु॒ष्य प्र॑दे॒वयु॑र्हो॒ता य॒ज्ञाय॑ नी॒यते॑ ।
रथो॑ न यो॒रभी॑वृ॒तो घृ॑णी॒वान् चे॒तति॑ त्मना॑ ॥
अ॒यम॒ग्निरु॑रुष्य॒त्यमृ॑तादि॒व जन्म॑नः ।
सह॑स॒श्चि॒त् स॒हीयान्॑ दे॒वो जी॒वात॑वे कृ॒तः ॥
इ॒डाया॑स्त्वा प॒दे व॒यं ना॒भा पृ॑थि॒व्या अधि॑ ।
जा॒तवे॑दो नि धी॒म॒ह्यग्ने॑ ह॒व्याय॑ वोढ॒वे ॥ 32

TS 3.5.11.2

अ॒ग्ने वि॒श्वेभिः॑ स्व॒नीक॑ दे॒वैरू॑र्णा॒वन्तं॑ प्रथ॒मः सी॒द यो॒निं ॥
कु॒ला॒यिनं॑ घृ॒तव॑न्तं स॒वि॒त्रे य॒ज्ञं न॑य॒ यज॑मानाय सा॒धु ॥

सीद॑ हो॒तः स्व॑ उ॒ लो॒के चि॒कित्वा॑न्त्स॒ादया॑ य॒ज्ञं सु॒कृ॒तस्य॑ यो॒नौ ।
 दे॒वावी॑र्दे॒वान्, ह॒विषा॑ य॒जास्य॑ग्ने बृ॒हद्-य॑ज॒माने॑ वयो॑ धाः ॥
 नि॒ होता॑ हो॒तृष॑द॒ने वि॒दान॑स्त्वेषो दी॒दिवा॑ अ॒सद॑त् सु॒दक्षः॑ ।
 अ॒द॒ब्धव्र॑त-प्र॒मति॑र्व॒सिष्ठः॑ स॒हस्रं॑ भ॒रः शु॒चिजि॑ह्वो अ॒ग्निः ॥

त्वं दू॒तस्त्व - [] 33

TS 3.5.11.3

मु॒ नः पर॑स्पास्त्वं ँ॒वस्य॑ आ वृ॒षभ॑ प्र॒णेता॑ ।
 अ॒ग्ने तो॑कस्य॒ नस्त॑ने॒ तनू॑नामप्रयुच्छन् दी॒द्यद्बो॑धि गो॒पाः ॥
 अ॒भि त्वा॑ दे॒व स॒वि॒तरी॑शा॒नं वा॒र्या॑णां ।
 स॒दाऽव॑न् भा॒गमी॑महे ॥
 म॒ही द्यौः पृ॑थि॒वी च॑न॒ इमं॑ ँ॒य॒ज्ञं मि॑मिक्षतां ।
 पि॒पृतां॑ नो भ॒रीम॑भिः ॥
 त्वा॒मग्ने॑ पु॒ष्करा॑द॒ध्यथ॑र्वा नि॒रम॑न्थत ।
 मू॒र्ध्नो विश्व॑स्य वा॒घतः॑ ॥
 तमु॒ - [] 34

TS 3.5.11.4

त्वा द॒द्ध्यङ्॑ ऋ॒षिः पु॒त्र ई॒धे अ॒थर्व॑णः ।

वृ॒त्रह॑णं पु॒रन्द॑रं ॥

तमु॑ त्वा पा॒थ्यो वृ॒षा समी॑धे दस्यु॒हन्त॑मं ।

ध॒नं ज॒यꣳ र॒णैरणे॑ ॥

उ॒त ब्रु॑वन्तु ज॒न्तव॑ उ॒दग्नि॑र्वृ॒त्रहाऽज॑नि ।

ध॒नं ज॒यो र॒णैरणे॑ ॥

आ यꣳ ह॒स्ते न॒ खादि॑नꣳ शि॒शुं जा॒तं न बि॑भ्रति ।

वि॒शाम॒ग्निꣳ स्व॑द्ध्व॒रं ॥

प्र॒देवं दे॒ववी॑तये॒ भर॑ता वसु॒वित्त॑मं ।

आ॒स्वे यो॒नौ नि॑ षी॒दतु॑ ॥

आ – [] 35

TS 3.5.11.5

जा॒तं जा॒तवे॑दसि प्रि॒यꣳ शि॒शी॒ताऽति॑थिं ।

स्यो॒न आ गृ॑हपतिं ॥

अ॒ग्निना॒ऽग्निः॑ समि॒द्ध्यते॑ क॒विर्गृ॒हपति॑र्यु॒वा ॥

ह॒व्यवा॑ङ् जु॒ह्वास्यः॑ ॥

त्व॒ ह्यग्ने॑ अ॒ग्निना॒ विप्रो॑ वि॒प्रेण॑ सन्थ॒सता॑ ।

सखा॑ स॒ख्या समि॒द्ध्यसे॑ ॥

तं म॑र्जयन्त सु॒क्रतुं॑ पु॒रोया॑वा॒नमा॒जिषु॑ ।

स्वेषु॑ क्षयेषु॑ वा॒जिनं॑ ॥

य॒ज्ञेन॑ य॒ज्ञम॑यजन्त दे॒वास्तानि॑ ध॒र्माणि॑ प्रथ॒मान्या॑सन् ।

ते ह॑ नाकं॑ म॒हिमानः॑ सचन्ते॒ यत्र॑ () पूर्वे॑ सा॒द्ध्याः

सन्ति॑ दे॒वाः ॥ 36

(वो॒ढवे॑ - दू॒तस्त्वं - तमु॑ - सी॒दत्वा - यत्र॑ - च॒त्वारि॑ च) (A11)

Prasna Korvai with starting Padams of 1 to 11 Anuvaakams :-

(पूर्ण - र्षयो - ऽग्निना - ये देवाः - सूर्यो मा - सन्त्वा
नह्यामि - वषट्कारः स खदिर - उपयामगृहीतोऽसि - यां वै -
त्वे क्रतुं - प्रदेव - मेकादश)

Korvai with starting Padams of 1, 11, 21 Series of Panchaatis :-

(पूर्णा - सहजान् - तवाग्ने - प्राणैरेव - षट्त्रिंशत्)

First and Last Padam of Fifth Prasnam of Kandam 3:-

(पूर्णा - सन्ति देवाः)

Kanda Korvai with starting Padams of 5 Prasnam of Kandam 3:

(प्रजापति - र्यो वा - अग्ने - वि वै - पूर्णा - पञ्च)

॥ हरिः ओं ॥

॥ कृष्ण यजुर्वेदीय तैत्तिरीय संहितायां तृतीयकाण्डे पञ्चमः प्रश्नः समाप्तः ॥

॥ इति तृतीयं काण्डं ॥

Details of Anuvakam, Panchati and Padam for Kandam 3

	Anuvakam	Panchati	Padams
Prasna 1	11	42	2248
Prasna 2	11	46	2335
Prasna 3	11	36	1857
Prasna 4	11	46	2392
Prasna 5	11	36	1790
Totals	55	206	10622